



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material


9340

U. G. H. K. M. W. Y. S.
u. k. p. m. G. Y. S. C.

891.99

9.76

4. D. N. L. H. U.
1887



391.99

2-76

48

5

ԳՐԻԳՈՐ ԶՕՅՐԱՊ

ԱՆՅԵՏԱՑԱԾ ՍԵՐՈՒՆԴ ՄԸ



ՊՕԼՍԱԿԱՆ ՎԷՊ

Կ. ՊՈԼԻՍ

ՏՊԱԳՐ. ԱՐԵՎԵԼԿ ԵՒ ՄԱՍԻՍ ԼՐԱԳՐԱՑ

1897

23437 ԵԱՂ

ԱՆՃԵՏԱՑԱԾ ՍԵՐՈՒՆԴ ՄԸ

ՄԱՍՆ Ա. Ս Ե Դ Ր Ա Ք

Նրեք ուսանող երիտասարդներ էին ասոնք, երեքն ալ զատ զատ գաղափարներու, զգացումներու եւ յատկութեանց ներկայացուցիչ. այսօր և ոչ մին մնաց անոնցմէ, մին մահը տարաւ, միւսը սղանդխտութիւնը տարագրեց եւ երրորդին ոչ ոք գիտէ ուր ըլլալը: — Հետք ու յիշատակ չի թողուցին. ո՛ր սկից եկան եւ ո՛ր գացին ասոնք. ոչ ոք կրցաւ երբէք իմանալ. բայց անոնց տարօրինակ կեանքէն քանի մը հատուածներ դեռ բերնէ բերան կը զրուցուին: Պարզ ու սըրտայայտ է այս անհետացած երիտասարդաց վրայի աւանդութիւնը:

Նրբ ուսանող կ'ըսեմ, կ'երեւակայէք



2675-55

2003

անմիջապէս քսակով թեթեւ, յոյսով հարուստ, զուարթ, լքեալ, անտէր ու անհոգ էակ մը. ոչինչ աւելի հետաքրքիր է քան գոյութիւնն այս արարածին որ ուսման խնամութիւնն իր անսպառ զուարթութեամբ կը թեթեւցնէ, ու շատ անգամ անողոք ճակատագրի դառնութեան դէմ կը մաքառի:

Ընկերական արդի գիրքին մէջ ուսանողի կեանքն յատուկ գոյութիւն մ'է խորին ուսումնասիրութեան արժանի. այս տարօրինակ կեանքն ընկերական պայքարին մէջ առաջին պատերազմի դաշտն է այսուհետեւ:

Ուսանողն՝ ամէն բանի փափաքող ու ամէն բանէ զուրկ՝ հեզնող ու դժգոհ անձնաւորութիւն մ'է:

Այն երեք պատանիներն՝ որոց պատմութիւնը կ'ստանձնենք, Բերայի Համալսարանին ազատ ուսանողներէն էին, ատեն մը երբ իրաւաբանական ու երկրաչափական ճիւղերը կը դասախօսուէին հոն:

Երեքն ալ առանց ընտանիքի ու առանց ստակի երիտասարդներ էին. ի՞նչպէս գըտեր էին զիրար. պարզապէս Համալսարանին մէջ հանդիպելով. միատեղ ճամբորդութիւնը միշտ բարեկամութիւն յառաջ կը բերէ եւ ուսանողութիւնը ճամբորդու-

թեանց լաւագոյնն է. ուստի շուտով մըտերմացեր էին այս երիտասարդներն որք միասին ճամբայ ելած էին դէպ ի անձանօթն:

Քսակնին սովորաբար պարապ, ու պարտաւոր գոլով երբեմն ցերեկուան ճաշն առողջագահիկ կանոնաց հակառակ եւ հետեւաբար աւելորդ դատելու, այս պարոններն երբէք չ'էին մտաբերած բաղդին խնստութեանը դէմ գանգատելու. բարձրագոյն գիտութեանց հետեւելով, ըիջ շատ փիլիսոփայ այլ զուարթ փիլիսոփայներ էին ասոնք:

Պասախօսութեանց ժամը լրանալուն պէս, այս երիտասարդներն՝ իրբեւ Բերայի փողոցներուն մշտաըջիկ ոգիներն՝ վարձու սենեակ որոնելու պատրուակաւ տուններու մէջ փակուած գեղուհիներն երեւան հանելը բան գործ ըրած էին իրենց:

Բայց այս ճրի ու հաճոյալի պարապումը երկար չի տեւեց. բաղդատաբար շատ կարճ միջոցի մէջ, վարձու տուն կամ սենեակ ունեցողներուն ամէնքն ալ այս երեք թափառիկ այցելուները ճանչցան և իրարու ճանչցուցին, այնպէս սր օր մը բոլոր տունները փակ գտան իրենց առջեւ:

Այս կացութիւնը ծանր էր ու չէր կրնար շարունակել. երեք բարեկամներուն ամե-

նէն հանճարեղին կ'իյնար ճար մը մտածել, գիւտ մը ընել, եթէ ոչ ուսմանց մէջ անուն ստանալու՝ գոնէ ամենօրեայ նոր գրօսանք մը հնարելու համար:

Հարկը մարդս հնարավիտ կ'ընէ:

Բերայի տանուտեարը առաւօտ մը տեսան երկրաչափական գործիքներով զինուած մի քանի երիտասարդներ որք իրենց տանը յատակագիծը շինելու զբաղած էին:

Փողոցներուն նոր ուղղութիւն մը տալու խօսք կար. ասոնցմէ մին տունները երեքական մեթր ներս քաշելու հարկին վրայ կը պնդէր . . . երեք մեթր . . . տանուտեարք ահարեկեցան. Թաղապետական Վեցերորդ շրջանակը՝ փողոցի համար փլցուցած տուններուն արժէքը հատուցանելու կողմէն հռչակ հանած չէր, ու ասով երրորդը կ'ըլլար որ երկրաչափները դարձեալ իրենց բնակութիւնը քանդել կ'որոշէին: Կալուածատէրներէն մին մօտեցաւ այն երիտասարդին որ խումբին մեծը կ'երեւէր ու զայն տուն հըրամցուց անոր սիրտը շահելու համար: Երիտասարդը դժուարութիւն չ'ըրաւ եւ իր ընկերներով այս հրաւերին պատասխանեց:

Այս փոքրիկ քաղաքավարութիւնը բոլոր այն փողոցի տունները փրկեց, վասն զի երկրաչափներն իրենց գործիքները վերցնելով ուրիշ տեղ փոխադրեցին: Աւելորդ է ըսել

որ այս սպառնալից կատակն ուսանողներուն նորահնար մէկ միջոցն էր:

Ահա այս եւ ասոր նման հազար խաղերով իրենց ցերեկուան ժամերը կ'անցունէին այս հովիտը դատարկաշրջիկներն, ինչպէս կ'ըսէր բարեյիշատակ Ռուսինեան:

Գիւերները տարբեր խնդիր էր. զբօսանքի նեղութիւն չի կար. դժուարութիւնն ընտրութեան մէջ էր. Բերայի բոլոր Գաֆէ շահաւաններն հիւրամեծօր կը գտնուէին այս տղոց համար, վասն զի ամէն մէկուն մէջ մէկ մէկ երգիչ աղջկան համակրութիւնը շահած էին:

Երբեմն ազգասիրական զգացում մը մուտ կը գտնէր այս զուարճութեանց մէջ. որ մը տեսան որ Տիգրան՝ երեք մտերմաց կրտսեսերագոյնը՝ Արեւելեան Ալքազարի մէջ նորեկ ու գեղանի Գերմանուհոյ մը բարեկամութիւնը շահեր էր. դիտեցին որ այս կապակցութիւնը սովորականէն աւելի ջերմ էր. Տիգրան ամէն օր մէկ երկու ժամ այս աղջկան տունը կ'անցունէր:

Ամիս մը վերջը գիւեր մը Տիգրան Համալսարանին բոլոր աստանդական ուսանողները ժողովեց ու Ալքազար տարաւ. Նս եմ գծեզ հրաւիրողը, պարօններ, ըսաւ Տիգրան ասոնց առջեւն իյնալով. երիտասարդներն յօժարակամ հետեւեցան իրենց դեռահաս ընկերին:

Դրամվէյի նոր գծին շինուելէն առաջ
ամէնուն ծանօթ էր այս հռչակաւոր սրահն ,
ուր այսօր Նոր թատրոնը կը բարձրանայ
իր չքեղ ճակատով :

Ամէն ոք գիտէ կամ չը գիտէ թէ ի՛նչ է
Քաֆէ շահրան մը . — Հոս՝ տեղը չէ բա-
րոյականի տեսակէտով քննել այս զբօսանաց
վայրերը . սա չափ հարկ է ըսել միայն որ
այս սրահներուն մէջ ամբողջ երկու մասի
կը բաժնուի , մին որ սրահին մէջ , պարզա-
միտ ու ապշած , կ'ունկնդրէ կիսամերկ ու
հրատուրիչ աղջկան մը երգերուն . ասի հան-
գիսատեսներուն նորեկ , դեռավարժ ու
աղքատ մասն է . միւսն որ արհամարհելով
պարզ ունկնդրոյ մը համեստ դերն , իր ժա-
մերը կ'անցունէ դերասանուհեաց յատուկ
սրահներուն մէջ , այս դիցուհեաց մօտ ու
առաւելի սեղանին քով , իր կեանքը բաժ-
ներով ցոփութեան ու խաղամոլութեան մէջ :

Այլազարի սրահն այս գիշեր կարծես
սովորականէն աւելի փայլ մ'ունէր . երգիչ-
ներն իրարու կը յաջորդէին իրենց ճօն ու
չռայլ շրջագգեստներուն երկայն քղանցքովը
ծածկելով տեսարանին կէսն . ընդհանուր
զուարթութիւն մը կար սրահին մէջ :

Կարգը Քերմանուհեոյն եկաւ : Քերտնի
երգիչն յառաջացաւ տեսարանին առջեւ .
սեւ արակէ պարզ ու անզարդ շրջագգեստ

մը հագած էր որ իր գեղեցիկ մարմինն
ընդգրկելով անոր բոլոր հրապոյրը երեւան
կը հանէր . մազերը ժողված չէր , այլ ցիրու-
ցան թողած ուսին վրայ . իր դէմքը խո-
ժու ու տրտում արտայայտութիւն մ'ուն-
էր : Աղջիկն սիսաւ երգել . . . :

Եւրօպացիներն ի զուր ջանացին բառ մը
հասկնալ այս անսովոր արտասանութենէն ,
մինչդեռ անագնալուր ու որոտածայն ծա-
փահարութիւն մը երգին առաջին տունը
կ'ողջունէր : Երգիչ մը չէր նա , այլ ներ-
շնչեալ ու գերագոյն ոգի մը որ կ'իջևէր
բոլոր ներկայից վրայ . սրահին մէջ գտնուող
բոլոր Հայերն ոտք ելեր էին միևնոյն զսպա-
նակէն մղեալ . դերասանուհին Մայր Արագ-
օնի առաջին տունը երգեր էր :

Առաջին անգամն էր որ հայերէն երգ մը
կը լսուէր այս սրահին մէջ , ու այս հաճո-
յալից դաղափարը Տիգրանի երեւակայու-
թեան ծնունդն էր :

Տիգրան իրաւաբանութեան ուսանող
մ'էր . ճպուռի մը պէս շատախօս , թռչնոյ
մը պէս երգող ու անոր պէս անհաստատ ,
աղջկան մը պէս քնքոյշ , սատանայի չափ
խելացի պատանեակ մ'էր . առաջինն էր
Համալսարանին մէջ ուր ամէնքը գինքը կը
սիրէին , միշտ օգնող ու ձեռնաու գտնուած
էր իր դասակիցներուն որոց անբաժանելի

ընկերն էր, մասնաւորապէս Սեղրաքի համար (երկրաչափութեան ուսանող մը) որու զաւակէ աւելի սիրելի էր :

Տասնևեօթը տարեկան կար այս պատանին, համեստ իր գիտութեան մէջ, պարզ, համարձակ, վիճող ու զայրացկոտ տղայ մը : Բարձրագոյն գիտութեանց հետեւելով՝ մայրենի լեզուի գրագիտութիւնը մէկ կողմ թողած չ'էր :

Քացէ ի բաց կ'արհամարհէր անոնք որ հազիւ օտար լեզուի մը մէջ դեռավարժ, իրենց ազգութիւնն ամօթ ու նուաստութիւն կը համարին ու մայրենի լեզուն կը վճռեն անհամ, կոշտ ու տճեւ . նոյնչափ կ'արհամարհէր գուցէ անոնք որք գիտութեանց նախնական ծանօթութիւններն ըստանալով անմիջապէս աշխարհաքաղաքացի կը դառնան :

Հետեւապէս ազգային կեանքի հմուտ ու հետամուտ, քննադատող ու դժգոհ ոգի, ի բնէ ընդդիմադիր ամէն վարչութեան, քիչ շատ մատ ունեցած էր իր բարեկամներուն հետ այն զանազան ժողովրդական ցոյցերու մէջ որմէ ասլիկար վարչութիւն մը ու նուաստացած երեսփոխանութիւն մը կը սարսափին : Քանիցս այս երկու ժողովները պաշարած էր Մատենադարանի սենեկին մէջ որ մեր ազգային փախստական իշխա-

նութեան սովորական ապաստանն է :

Ղալաթիոյ եկեղեցւոյ բակին մէջ շատ անգամ լուած էր անոր ըմբոստ ու գրգռիչ ձայնն որ պանդուխտ Մշեցիներն իր շուրջը կը հաւաքէր, կը հրահրէր ու կ'արձակէր . ժողովրդեան պատանի ու սիրելի հեռետորն էր ասի՝ զոր ամէնքը կը ճանչնային այն ատենները :

Այս վատթարացման դարուն մէջ ուր միտքն հոգին կը մոռցնէ, ուր մարդկութիւնն ազգութիւնը կ'անհետացնէ, թերեւս միակ այս երիտասարդն էր նիւթաւալտ փիլիսոփայ մը՝ առանց զուրկ լինելու այն բանաստեղծական ոգիէն զոր պատանութիւնն ու դժբաղդութիւնը կուտան եւ զոր չափահասութիւնն ու երջանկութիւնը ետ կ'առնուն :

Տիգրանի ընտանիքը ծանօթ չ'էր ու ինքը բնաւ չ'էր խօսեր անոր վրայ . իր մանկութեանը Պէշիքթաշ կը բնակէր, վերջէն Օրթագիւղ անցաւ ու յետոյ Բերայի մէջ հանդիպեցան անոր :

Իր ընկերներն Համալսարանին մէջ ճանչցան զինքը . շիկնոտ ու մեղամաղձոտ, սըրտափակ ու գլխահակ տղայ մ'էր . ժամանակով սրտի մօտ, հպարտ ու զուարթ պատանի մ'եղաւ . քաշուած ու առանձնացած էր առաջ . հիմա մօտեցող, թերեւս յարձակող մէկն էր :

Այս տղան միջակ ու վայելուչ հասակով, մութ չափանակագոյն մազերով պատանի մ'էր. գեղեցիկ դէմք ու գեղեցկագոյն աչքեր ունէր զորս Համալսարանին շուրջը գրտնուող տուներուն աղջիկները շուտով նշմարեցին :

Տիգրան սիրեց առաջին աղջիկն որ իրեն ժպտեցաւ ու ինքն իսկ իր սիրոյ սաստկութենէն վախցաւ : Պիցուհւոյ մը պէս գեղանի ու մանկամարդ հելլենուհի մ'էր այս որ Համալսարանին պարզեւարաշխութեան հանդիսին մէջ տեսեր էր պատանին առաջին ելնող այնքան տարիքոտ ընկերներու մէջէն. նա մանաւանդ զարմացեր ու հաւաներ էր անոր ձեւերուն որոց շնորհը պարզութեանը մէջ կը կայանար :

Կատակ մը, պարզ կատակ մ'ընել կարծեր էր ժպտելով անոր երեսին ու անոր սրտին հազորդ ելով իւր աչերուն աւերիչ կըրակը. վերջէն Տիգրանի յափշտակութիւնը տեսնելով գրօններ էր քիչ մը ու յետոյ ձանձրացեր էր անկից. այս քմահաճոյքը լուրջ բան մը չ'էր աղջկան համար, այլ մահացու կրնար լինիլ պատանւոյն սրտին :

Հելլենուհին ամուսնացաւ. ահաւոր ու սարսափելի հարուած մը եղաւ ասիկա Տիգրանին որ մազ մնաց պիտի մեռնէր. մէկու մը չի բացաւ իր վիշտն ու մէկու մը չի

զանգատեցաւ. արժանապատուութեան ըզզացումն որ ամէնէն հզօր կը խօսէր իւր հոգւոյն, զինքը փրկեց. չի մտածեց այլ եւս անոր, բայց չի ջնջեց անոր սէրն իր սրտէն. ամուսնացող անխոհեմուհին իր սիրած աղջիկը չ'էր. իր սիրածը մեռած համարեց այլ եւս եւ երկիւղած բարեպաշտութեամբ մը իր սրտին մէջ խոր ու շատ խոր թաղեց առաջին սիրոյ յիշատակն ու ամրացաւ ճակատագրին դէմ :

Ոչ ոք իշխեց իրեն սիրով անկից վերջը. ի փոխարէն ինքը բուռն ու կատաղի եռանդով մը նետուեցաւ կանանց մէջ. սիրած էր ու խարած էին զինքը. կարգն իրեն էր խարելու. Տիգրան ձախորդութեան կը հաւատար. ուստի ծանր չ'եկաւ իրեն միոյն վրէժը միւսէն լուծել. հատուցման մէջ կիները մէկգլուխու երաշխաւոր կը ճանչնար :

Ուստի ամէն կնոջ միւսնոյն աշխուժով ու միւսնոյն համոզմամբ կրկնեց իր սէրն ու դիմացինը համոզեց. իրեն համար բազդատութիւն ու տարբերութիւն չի կար կանանց մէջ. մանկամարդը կամ տարիքն առնողը, գեղանին կամ տղեղը, տիրուհին կամ սպասուհին, գործաւորուհին կամ իշխանուհին, կրօնաւորուհին կամ հասարակաց աղջիկը միւսնոյն բանն էին իրեն համար :

Սեղրաք երեք բարեկամներուն ամէնէն

ճանրաբարոյն էր ու քսաներեք տարեկան լինելով Տիգրանի համար գրեթէ մեծ եղբայր մ'էր . տժգոյն , նիհար ու խարտիչահեր երիտասարդ մ'որոյ սովորաբար դալուկ դէմքին վրայ նեղ ու բարակ չրթուներն աչքի կը զարնէր իր կարմիր գոյնովը :

Գեղեցիկ կապոյտ աչքեր , լայն ու ժամանակէն առաջ աղօսեալ ճակատ մը , սիրուն մօրուք մը ու սեւ երիզով կախուած ակնոց մը կը տեսնուէր այս երիտասարդին գէլքին վրայ որ միշտ լուրջ թերեւս խօսուած երեւոյթ մ'ունէր . կատարեալ հակապատկեր մը լինելով հանդերձ իւր կրտսերագոյն բարեկամին , իր արտաքին ցուրտ ձեւերուն ներքեւ փափուկ ու վեհանձն սիրտ մը կը կրէր :

Անձնուէր մինչ ի մահ առանց բառ մը արտասանելու , գաղտնապահ , խորհրդատու , մէկ բառով եղական ընկեր մ'էր :

Իր սկզբունքներն ու ճաշակը ծանօթ էին , որոց համար մտքբախտն Անգլիացւոյ մը սլէս անողոք էր . կառավարութեանց միապետութիւնը , կանանց մէջ խարտեալը , գոյներուն մէջ սեւը կը ճանչնար միայն :

Երաժշտութեան մէջ Մէնտէլսօնը կ'ընտրէր իր յամբ , անորոշ ու տրտում շեշտերովը . նկարչութեան մէջ Այվազովսքին իր անհուն ու անխուսափելի ծովին , իր ծրփ-

ծրփուն ալլքներուն , իւր կապարագոյն ու ցիրուցան ամպերուն եւ այն անբացատրելի խորութեան հետ որ այս մեծ արհեստաւորին յատուկ է :

Բանաստեղծութեանց մէջ արեւելեան երգերը կը սիրէր : Երբեմն մեղամաղձոտ , յուսակտուր այլ համբերատար ոգի մը կայ այս երգերուն մէջ , երբեմն արհամարհոտ շեշտ մը :

Անոնք որք անդէտ են օսմանեան գրագիտութեան , պախարակելէ ուրիշ կերպով չ'են յիշատակեր գայն . է՛հ , Տէր Աստուած , ո՞վ է սա մուրացիկ երգիչն որ սրճարանին մութ մէկ խորշին մէջ կը նուագէ . յարգալից բազմութիւն մը խոր լուծեան մէջ կ'ունկընդդէ նմա . Արեւելքի ժողովրդեան չափ ո՛չ ոք մեծարած է բանաստեղծներն :

Ու Սեդրաք յօժարափոյթ կ'երթար Պուսոյ ամենէն անծանօթ մէկ խորշին մէջ . տաճիկ թաղի մը մէկ անկիւնը բարեմիտ ու ծերունի Թուրքաց հետ ունկնդրել այս գընչու բանաստեղծներուն : Երբեմն Հայ մ'է այս համեստ երգիչն՝ որ իւր մայրենի լեզուին անծանօթ՝ օսմանցի բանաստեղծներուն մէջ ստացած է փառայեղ անուն մը : Արդարեւ թուրք երգիչներն՝ որպէս նախնի ժամանակի ասպետներ՝ յատուկ անուն մը ունին իրենց ասպարէզին մէջ որով կը յիշատակուին :

Սեղրաք անյագ հետաքրքրութեամբ կը հաւաքէր մոռացեալ հայ բանաստեղծներու վրայ այն ամէն աւանդութիւնները՝ զորս ժամանակը դեռ չ'էր անհետացուցած : Ու կը պատահէր որ անուանի Նաֆ մը ելնէր ասոնց մէջէն, դեռահասակ ու վաղամեռիկ երգիչ, գրագէտ ու փիլիսոփայ մը, պարծանք հայ տաղանդին, բոլորովին մոռացեալ ու անծանօթ եսամուլ հայ գրագիտաց մէջ :

Ո՛ր տեղացի էր եւ ո՛ր ընտանիքի կը վերաբերէր Սեղրաք . ահաւասիկ հարցում մը զոր երբէք չ'էին մտաբերած անոր բարեկամներն . հեռուէ հեռու լսած էին որ Առաքիւնի ասիական եզերքէն լաւագոյն ընտանիքի մը անդրանիկ զաւակն էր . իր անկախ դիրքն ու ազատ դաստիարակութիւնը չ'էր յարմարած հայրենի տան նահապետական ընթացքին ուր անառակ ու անդարձ որդի մը նկատուած էր :

Մայրն, ո՛վ անհաւատալի գաղտնիք կանացի սրտին, իր ժպիտը միւս զաւակացը յատկացուցած էր ու խոժոռ ու աններող դէմը մը միայն կար Սեղրաքի դէմը : Հայրը խրոխտ յանդիմանութեամբ ու սպառնալեօք կը հիւրընկալէր այս անշահ զաւակն՝ որ իր հօր առեւտրական տեսարակները բռնել կը մերժէր : Եղբարքն՝ ամէնքն ալ իրմէ փոքր՝

իր վրայ կը ծիծաղէին . կատարեալ լքում մը տեսաւ այս տղան նոյն իսկ իր ընտանեաց գրկին մէջ ու ալ առանձին կեանքը անհրաժեշտ դարձաւ :

Սեղրաքի բաժանմամբ կարծես բեռ մը վերցաւ ընտանեացը վրայէն. ամէնքը գոհ ու երջանիկ կարծեցին իրենքզիրենք այս տղուն հեռանալովը, իսկ ինքը չի կրցաւ բոլորովին անտարբեր բաժնուիլ մայրենի ծոցէն . ահաւասիկ իւր խորհրդածութիւններէն մաս մը զորս թուզթի մը վրայ նըշանակած էր .

« 1873 տարւոյ սեպտեմբերի 7-ը օրը
« բաժնուեցոյ ընտանիքէս զատ ու ազատ
« տարելու համար . բաժանուել միշտ ազէկ
« ու տխուր բան մ'է . վերջաւորութիւն
« մ'է . հոն նախորդ կեանքը կը դադրի ու
« ինչ որ ալ ըլլայ նոր սկսելիքը, կարելի չէ
« անտարբեր սրտով առաջինը թողուլ . յե-
« տահայեաց նայուածք մ'ունինք ամէն բա-
« նի զոր կը թողունք կամ որ զմեզ կը թո-
« ղու, — իսկ բաժանումներու աղէկութիւնը
« հոն է որ ո եւ է ոյժ անջատմամբ չի ջը-
« լատուիր այլ կը կրկնապատկուի . աշխար-
« հիս յառաջող իմութիւնը կեդրոնացմամբ
« չ'է գոյացած . համախմբութիւնն անկար-
« գութիւն ու խռովութիւն յառաջ կը բերէ,
« ուստի բաժանումը տկարութիւն չի նշա-

« նակեր ինչպէս շատ անգամ կը կարծուի .
 « աշխարհիս մէջ կեանքը բաժանուումով կ'ըս-
 « կըսի . որդին պէտք է բաժնել մօրն ար-
 « գարդէն որպէս զի ծնի ու ապրի , ո՞վ զը-
 « ժընդակ ու արդիւնաւոր ճակատագիր
 « մարդկութեան : »

Ուրիշ տեղ մը այսպէս գրեր էր . « Գի-
 « շերները մինակ կը դառնամ ամայի սենեակս
 « որ համեստ կահ կարասիք մը միայն կը պա-
 « րունակէ . ամէն ինչ կանոնաւոր շտկուած
 « ու իր տեղն է . ճրագս լուցկիին մօտ ,
 « փայտը վառարանին քով, զգեստներս իրենց
 « ծածկոցին ներքեւ . ժամացոյցի պէս լար-
 « ւուած սենեակ մը որու դէմ ի զուր գան-
 « զատելու պատճառ կը փնտռեմ . ո՛չ , այս
 « երկրաշափական անխոտորութենէն չեմ ա-
 « խորժիր . քիչ մը անխնամութեան երեւոյթ
 « պէտք է ինձի . վարձկան ձեռքի մը ծառա-
 « յութիւնը չէ այլ սրտի մտօք անձի մը խը-
 « ւնաօքն որ կրնայ շէնցնել այս անարձագանք
 « պատերը : »

Սեղրաքի ընտանեկան բաժանումն ու-
 ըրիչ պատճառով մ'ալ ծանր ու դժուարին
 եղաւ . հայրենի տունէն մեկնելով հարկ
 եղաւ նաեւ թողուլ մանկութեան ընկե-
 րուհի մը :

Քոյր ու եղբայր ըսուելու չափ տղայ հա-
 սակէ ի վեր , Սեղրաքի հետ մեծցած գե-

Յրբեմն գիտութեանց եւ ուսմանց վը-
 րայ կը դառնար խօսակցութիւնը . պար-
 մանուհին , իր սեռին յատուկ բարեպաշ-
 տութեամբ , ըստ կարի կը գիտադէր այն
 կարուկ վճիռներուն՝ որով գիտութիւնն իր
 անխուսափելի ճամբտութիւնները կը ծա-
 նուցանէ . երկրաբանութենէ մինչեւ աստ-
 զաբանութեան վրայ կը խօսէին եւ Սեղրաք
 իր բարձր կրթութեան շնորհիւ մի առ մի
 կը բացատրէր այն անողոք ու մշտնջենական
 օրէնքներն՝ որով անհունապէս փոքրիկ հիւ-
 լէն ու անհունապէս մեծ տիեզերքը միևնոյն
 ներդաշնակութեամբ կը կառավարուին : —
 Ընկերական կենաց մշտայոյզ խնդիրներն ի
 կարգին վիճարանութեան նիւթ կը լինէին .
 ազգաց ճակատագիրն , անհատներու ազա-
 տութիւնը , լեզուի ու կրօնքի տարբերու-
 թիւնն հետզհետէ կը քննուէին : — Սուրբիկ
 յուզեալ ձայնիւ կը սլաշտպանէր աշխատա-
 ւորներու տառապեալ դասն ու հարստու-
 թեան ի գործ դրած բռնութեան դէմ կ'ո-
 րոտար , մինչդեռ երիտասարդն հանդարտ
 ձայնով կը բացատրէր տնտեսական գիտու-
 թեան այն ամէնանուիրական սկզբունքն
 որ ամէն առուտուրի ազատութիւնն յար-
 գելու մէջն է եւ տրամութեամբ կը թուէր
 այն տարբեր տարբեր պատճառներն որոց
 մէջ փնտուել պէտք է թշուառութեանց
 գաղտնիքը :



Սյուպէսով եւ եւրոպացի հեղինակներու ընթերցանութեամբ ստացաւ ծաղկահասակ աղջիկն հիմնաւոր ու առողջ կրթութեան մը բոլոր տարերքը :

Սուրբիկ միանգամայն վարպետ գրչի տէր ու մանաւանդ տաղանդաւոր դաշնակահար մ'էր : Դաշնակը փոթորկեալ կամ հանդարտ ծովու մը պէս կը պատկերացնէր անոր մըրկոտ կամ անդորր ոգին . անդգայ գործիքի մը ձայնը չ'էր որ կը բարձրանար , այլ անոր ճարտար ու փափուկ մատներէն դղրդուած անբացատրելի ու հմայիչ ներդաշնակութիւն մ'էր հնչուն , պայծառ ու ազատ որ կը սաւառնէր ունկնդրին զմայլած հոգւոյն վրայ : Իր ամենէն սիրած վարպետը Մէնտէլսօնն էր , վասն զի Սեղրաքի սիրածն էր այն . ձայնն վերջն երբ խօսակցութեանց նիւթն սպառէր ու կամենային հանգիստ առնուլ , այն ատեն կը զարնէր այն Սնոթներէն մին՝ որոց տրամուծիւնն ու վստեմութիւնը միշտ գաղտնիք մը պիտի մնայ ամէնուն համար :

Հագուազիւտ բացառութեամբ մը պատանուհին զերծ էր այն ողբալի ազատամտութենէն՝ որով նորատի աղջիկներն ու պառաւ կիներն իգական սեռին անհաւասարութեան դէմ կը բողոքեն շարունակ :

Սչխարհիս վրայ աղջիկը՝ պահանջող , պա-

ռաւը՝ գանգատող պիտի մնայ յաւիտեան :

Ոչ մէկ դար , ոչ մէկ լուսաւորութիւն պիտի կարենայ երբէք գոհացնել այս երկու անձնաւորութիւնները զորս բնութիւնը մի և նոյն դժգոհութեան շրջանակին մէջ միացուած է :

Սղջիկն՝ յոյս ունենալուն վրայ կը զայրանայ , պառաւը՝ չ'ունենալուն համար , ու այս երկու հակառակ պահանջումները մի և նոյն բողոքով երեւան կ'եւնեն :

Դիտեցէք որ երբէք մանկամարդ ու ամուսնացեալ կին մը իգական սեռին գերութեան վրայ չի խօսիր . երիտասարդութիւնն ու ամուսնութիւնը կնոջ ամենազօրութեան միջոցն է . բայց ամէն իշխանութիւն իր անկումն ունի ու զարմանալի չ'է որ տարիքնին առնող կիները , զուրկ ամէն թեկնածութենէ , անհամ ու անկարգ գտնեն այն ընկերական կեանքը՝ զոր իրենց երիտասարդութեան ժամանակ այնչափ հրապուրիչ կը գտնէին :

Սիրող հոգիները միշտ անձնութիւնութեան պատրաստ են ու Սուրբիկ այս անձնուէր էակներէն էր . բնութեամբ խրոխտ , այլ վեհանձն յօժարութեամբ երիտասարդին գաղափարաց բարձրութիւնը ճանչցեր ու մեծարեր էր , առանց սնտոխի հպարտութիւն մը ցոյց տալու : Սակայն այս խորին մտեր-

մութիւնն առանց վտանգի չ'էր : Այս փոխադարձ յարգանքն ու համակրանքն, երկու ծաւալման կարօտ հոգիներու ամենօրեայ մութիւնը, տարիքնին, գաղափարաց ու զգացմանց ներդաշնակութիւնն՝ անքակտելի կապ մը յառաջ բերին :

Պատանուհւոյն հրաշլի գեղեցկութիւնը Սեդրաքի խելքը գլխէն չ'առաւ, բայց անոր գորովալից մտերմութիւնը զայն չղթայեց ու աշխարհ այս աղջկան վրայ միայն հիմնուած երեւցաւ անոր աչքին :

Սեդրաք ու Սուրբիկ զիրար սիրեցին . բայց այս սէրը չ'էր այն վաղանցիկ ու խաբեբայ աւիւնն՝ որ հովի պէս կուգայ ու կ'անցնի, այլ խորին, սուրբ ու հոգեկան միաւորութիւն մը :

Ահա այս պատճառով Սիդրաքի բաժանումը դժնդակ զրկում մը դարձաւ . ընտանեկան գորովէ արդէն զուրկ, կարօտ մնաց նաև այն միակ երեսին որ իրեն կը ժպտէր : Անցեալ օրերու յիշատակն հեռաւոր ու կորուսեալ երջանկութեան մը պատկերին պէս անոր շփոթ մտքին մէջ կը նկարուէր : Յայտնի եղաւ որ չի պիտի կարենար անկէ զատուած ապրիլ : Գաղտնի նամակադրութիւն մը ըստ կարելոյն մեղմացուց այս անջատման ցաւն : Երկար և անվերջանալի նամակներ էին ասոնք զորս ամէն գիշեր կը գրէր,

իր հոգւոյն ամէն տպաւորութիւնները, սըրտին գառնութիւններն, յոյսերն պատրանքն և ցնորքը ցրուելով թօթափելով անգգայ թղթին վրայ . սիրոյ բա՛ռ մը շի կար այս գրութեանց մէջ . ո՛չ . սիրելը շատ չընչին, շատ տկար բառ մ'էր որ իր անհուն խանդաղատանքը չ'էր կարող բացատրել . եւ ոչ մ'կ բառի մէջ, եւ ոչ մէկ նամակի մէջ կարելի էր ամփոփել իր փոթորկեալ հոգին :

Սուրբիկի նամակները մի և նոյն խոովեալ արձագանքները, մի եւ նոյն անհուն անձնուիրութիւնն ու ապագայի մտահոգութիւնները կը պարունակէին .

« Սիրելիս, քու սիրովդ ու հմտութեամբդ « սնուցիր զիս . յիմար եռանդով մը նետ « ուեցայ ամէն գաղտնիք իմանալու . դուն « քովս էիր ու ամէն ինչ ուսուցիր ինձ . « խրոխտ, գիտուն ու սիրեցեալ առաջնորդ « մ'էիր, ահաւոր վարդապետութիւններ « ունէիր լեզուիդ ծայրն որք քու բերնիդ « մէջ իրենց սոսկումը կը կորսնցունէին . ի « զուր ուզեցի մաքառիլ անոնց դէմ, քու « սէրդ յաջողեցաւ ընել ինչ որ հմտութիւնդ « նախապաշարմանցս դէմ չ'էր կարող ընել . « համոզուեցայ քեզի : Կապուած էի բեզի « այն միակ սիրով զոր երիտասարդու « հին երկու անգամ չ'ունենար իր բոլոր

« կեանքին մէջ . մօտ թէ հեռու միշտ պաշ-
 « տեցեալ յիշատակ մ'ունիս սրտիս մէջ զոր
 « երկկեղած բարեպաշտութեամբ կը պա-
 « հեմ : »

Ուրիշ նամակի մը մէջ այսպէս կ'ըսէր .
 « Ուր ես , Սեդրաք : Ձմրան գիշեր է ցըր-
 « տին , ձիւն ու բուք կը տեղայ , ի՞նչ կ'ը-
 « նես առանձին ու մթին սենեկիդ մէջ . այս
 « տունը բանտ մ'է նսեմ քանի որ հոս չ'ես .
 « ծնողացս սէրը չի շնուր այն պարապը զոր
 « դուն թողուցիր : Չ'ըլլայ թէ յուսահատ
 « քաջութեամբ , չափազանց աշխատութեամբ
 « առողջութիւնդ վտանգես : Անձիդ տը-
 « ուած հարուածը միայն քեզի չը պիտի
 « զարնէ : »

Եւ այլուր . « Լսեցի քննութեանցդ յա-
 « ջողութիւնը . մաթեմաթիքը միշտ կը սի-
 « րէիր , ու ճշմարտութեան գիտութիւնն է
 « կ'ըսէիր . կը տեսնես թէ ի՞նչպէս կը յի-
 « շեմ բոլոր խօսքերդ . սակայն չ'ըլլայ թէ
 « այդ պարապունը Սուրբիկդ մոռցնել
 « տայ քեզ : Ես կ'ուզեմ որ քու համբաւդ
 « այնչափ մեծ ըլլայ որչափ մինչեւ հիմա
 « տեսած զրկումիդ : Քու անունդ պէտք է ,
 « կ'ուզեմ որ մեծարանօք յիշուի ու ես ա-
 « նով պարծենամ : »

« Դուն հարուստի աղջիկ ես , կը գրէր
 « օր մը անոր երիտասարդը , ես ալ հա-

« րուստի որդի էի , բայց հիմա ոչինչ եմ .
 « ատեն մը չ'էի եւ հիմա ալ չ'եմ սար կա-
 « րեւորութիւն հարստութեան , բայց թէ
 « որ միջոց մ'է այդ քեզ մօտենալու , Սուր-
 « բիկ , հնդիկ իշխանի մը չափ հարուստ
 « պիտի ըլլամ : Անուան ու փառքի հետա-
 « մուտ չ'էի եւ չ'եմ , սակայն եթէ քու ծը-
 « նողացդ աչքին այդ է այն պատուանդանն .
 « որով մինչեւ քեզ բարձրանալ ներնալ է ,
 « լա՛ւ ուրեմն , պիտի մոռնամ , պիտի փա-
 « կեմ սիրտս , ու միտքս միայն մաշցնելով
 « պիտի ստանամ այն դիրքը զոր ընկերու-
 « թիւնը կը պահանջէ նորեկներէ : »

Այս հաստատ համոզմամբ ձեռք զարկա-
 իր երկրաչափական ուսմանց զորս քանի մը
 տարիէն աննման յաջողութեամբ մը պիտի
 աւարտէր , և Համալսարանին մէջ ճանչցաւ
 Տիգրանն ու սիրեց զայն եղբօր մը չափ .
 Այս երկու պատանիներն այնչափ աւելի զի-
 բար կը սիրէին որքան մինչեւ ցայն վայր
 զլացուած էր իրենց ամէն գորովանք : Իրա-
 բու համար գաղտնիք չ'ունեցան եւ ոչ մէկ
 ժամանակ :

Տարիքի պզտիկ տարբերութիւն մը պատ-
 ճառ չ'եղաւ իրենց սրտի կապերը մեմեանց
 հաղորդելու . Սեդրաքի նոր բարեկամն ա-
 նոր սիրտանք ու քաջալերութեան օրի-
 նակ մ'եղաւ եւ անոր զուարթ ու խնդուն

երեսը՝ մասամբ թեթեցուց ուսման տարի-
ներու աշխատութիւնն ու տխրութիւնը :

Տիգրանի միջոցաւ ծանօթացաւ նաեւ
Խոսրովին հետ որ նոյնպէս զուարթ ու
զուարճախօս ուսանող մ'էր, եւ այս ընկե-
րական կեանքով կարծես անզգալի կերպով
վերջացուցին տարեշրջաններն ու վերջին
քննութիւնները տուին :

Խոսրով դատաւորական ճիւղն ընտրեց .
Տիգրան ազատութիւն կը սիրէր միշտ, ու
փաստաբանական ասպարէզը մտաւ . պաշ-
տօնէութեան փառքն, որ Խոսրովին բոլոր
ակնկալութիւնն էր, իրեն համար նշանա-
կութիւն չ'ունէր : Այս երեք մարդիկը՝ չորս
տարի դասընկերութիւն ընելէ վերջ՝ ի-
րարմէ կը բաժնուէին աշխարհի պայքարին
մէջ մտնելու համար :

Բայց Խոսրով պարզ ու գոհ սրտով չի
զատուեցաւ իր ընկերէն . դաւառացի՝
այսինքն ի բնէ խորամանկ՝ բնաւորութեամբ
խիստ հեռի էր Տիգրանէն : Սակայն իրաւ
է որ երբէք միմեանդ դէմ մեղադրելի վար-
մունքի մէջ գտնուած չ'էին ու թէ որ Տիգ-
րանին ծանր եկած բան մը միայն կար,
այն ալ սա էր թէ իր ընկերը ջանացած
էր ատեն մը իր յոյն սիրուհին ձեռքէն
կորզել . բայց աղջիկը՝ բացէ ի բաց ծաղր
ու ծանակ ըրած էր արդէն իր դժբաղդ

հակառակորդն ու զայն Համալսարանին բո-
լոր ուսանողաց կատակներուն ու հեգնու-
թեանց մատնած էր :

Խոսրով՝ ամէն բանէ աւելի ընկերական
գիրք մը ձեռք բերելու հետամուտ՝ յօժարա-
կամ իր նպատակի յաջողութեան գոհած էր
ամէն զգացում . կատարեալ տէր իր ան-
ձին, վարժած ծածկելու այն ամէն դառ-
նութիւնը՝ զոր Համալսարանին մէջ Տիգրա-
նին բարձր գիրքն իր նախանձօտ սրտին
մէջ կը թափէր, բայց ամէն ատեն կարօտ
անոր օգնութեան, վկայագիր մը ձեռք բե-
րելու համար, վկայագիր՝ որ ամէն ասպա-
րէզ պիտի բանար իր առջեւ, խոհեմու-
թիւն համարած էր զգուշանալ ամէն ընդդի-
մութեան ու հակառակութեան փորձերէ :
Ընդհակառակն խոնարհ ու հաճելի ձեւե-
րով անոր պաշտպանութեան ապաւինիլ կը
ցուցուէր, սրով յաջողեր էր Տիգրանի կա-
տարեալ վստահութիւնը շահելու :

Անգամ մը միայն քիչ մնացեր էր վար
առնլու այս կեղծաւորութեան դիմակը .
Վայրենի ու վաւառտ սէրով մը սիրած էր
այն գեղեցիկ յելլենուհին որ Տիգրանի կը
ժպտէր շարունակ . ինքն երկու տարիէ ի
վեր մէկ ժպտին կարօտ, մէկ նայուածքին
կապուած, մաշեր ու սպառեր էր երբ իր
երջանիկ ընկերն, ամէն բանի մէջ ճակատա-

գրէն օգտուած, անյուսալի յաջողութիւն մը ձեռք կը բերէր եւ որ աւելին է, ամէն օր համար կուտար իրեն՝ վայելած բոլոր շնորհներուն :

Ափսոս, վայելչութեան կողմէ չէր կարող մրցիլ իր գեղեցիկ սոսիսին հետ . իր կարճ հասակով, ցած ձևկտով, գոռզ մազերով ու ծաղկաւեր դէմքով, բարեձեւութեան պահանջումներ չէր կարող ունենալ . բայց իր առաւելութիւններն ալ կը կռէր անոր փոխարէն . իր հայրենիքէն ոտքով եկած էր Պոլիս, եօթն տարեկան եղած ատենը, և Ղալաթիոյ վարժարանին մէջ տընտեսին քով ու անոր կերակուրներով ապրած էր մինչեւ տասներեք տարեկան հասակը երբ յաջողեցր էր Շահազարեան վարժարանը մտնել . ամէն բանի կարօտ, ամէն բան ձեռք բերեր էր աննման հաստատամտութեամբ . մանկութենէն դատապարտուած ընկերական ամէն մահացումներու, մարգատեաց մէկը դարձած էր ու կիսկատար փիլիսոփայութեամբ մը զոր իր մոլար սկզբմանցը կը համաձայնէր, շուտով համոզուած էր թէ չարն ու բարին գոյութիւն չունին, թէ վատութիւնը տեղին համեմատ ազնուութիւն է, թէ մարդուս գերագոյն նպատակն իր ետութեան մէջ կը կայանայ :

Հետեւապէս գէշ ոգով ու սխալ դաս-

տիարակութեամբ զօրացած, և ոչ մէկ բանի մէջ լաւ կողմը կրցած էր նշմարել : Հելլենուհւոյն սէրն անգամ չէր այն բարձր ու ազնիւ զգացումն որ մարդն անասուններէն կը բաժնէ, այլ վայրագ ու հաւաոր իղձ մը ու տանջանք մ'էր :

Երբէք չէր ներած իր պատանի ընկերոջը դասի մէջ առաջնութիւնը . սիրոյ սուպարէզին մէջ անոր նախամեծար համարուիլն իր համբերութեան չափը լեցուց . մութին մէջ սպասող կատարեալ թշնամի դարձաւ իր սրտէն, թէ եւ անկարող անոր փնտեսելու : Աղջկան մօտ իր խնդիրքն ու հետեւանքն հետեւեալօրը Տիգրանին միջոցաւ տարածուելով Համալսարանին մէջ, մին իր ծաղրանկարը իններ էր որուն մէջ իր ծակոտեալ երեսը գեղուհւոյն շրթանցը կը մօտեցնէր երբ սա զգուանօք գլուխը կը դարձնէր . ուրիշ մը փոքրիկ ռոտանաւոր մ'էր շիններ անոր վրայ որ բոլոր ուսանողներուն բերանն ինկաւ :

Այն ատեն անհաշտ ու ոխակալ լուրթեամբ մը պաշտպանեց ինքզինքը . երկու տարի կար չըջանն աւարտելու . քիչ մը վերջը Տիգրանի լքումն ալ տեսնելով անհուն գուհացում մը ունեցեր, կատարեալ վրէժխնդրութեան համ մ'առեր էր անկից : Բայց այդ իր նուաստութիւնը չէր փոխարինած .

բաղղն հարուած մը տուած էր Տիգրանին ,
ինք իր կողմէն բան չ'էր կրցեր ընել :

Ասոր հետ մէկտեղ մտերմութեան ու
բարեկամութեան ցոյցերը կրկնապատկել
հարկ եղաւ երբ աւարտման ըննութիւնը
մօտեցան :

Արդարեւ անօգուտ չ'եղաւ այսքան կեղ-
ծաւորութիւն . իր վկայագիրը Տիգրանի շը-
նորհիւն ստացաւ . ամէն դասի մէջ յետա-
դէմ , իր բարեկամին դասատուաց ըով ը-
րած բարեխօսութեամբ ձեռք բերաւ այդ
պաշտելի թուղթն որու վրայ իրաւամբ կը
հիմնէր իր բոլոր ապագան :

Չատուեցան իրարմէ փոխադարձ անձ-
նուիրութեան խոստումներով . « Դատաւոր
եղած ատենդ չ'ըլլայ որ իմ իրաւունքներս
անտես ընես », ըսաւ Տիգրան , Խոսրովին
ձեռքը սեղմելով . — « Ոչ ոք զքեզ պաշտ-
պանելու յաւակնութիւնը կրնայ ունենալ
երբ դուն կեցած ես », պատասխանեց իր
բարեկամը :

Իսկ Սեդրաքի ու Տիգրանի բաժանումն
աւելի սրտայոյզ եղաւ . երկու եղբայր այն-
չափ չ'էին սիրած զիրար որչափ այս երկու
ուսանողները . իրենց վիշտերն եւ ուրա-
խութիւնը միասին բաժնած էին մինչեւ
այն ատենը :

Սեդրաք իր երկրաջափական վկայագիրն

ստանալէ յետոյ Ատանայի երկրորդ երկրա-
չափ անուանեցաւ ու մեկնեցաւ Պուլէն .
անտանելի թուեցաւ այս բաժանումը Տիգ-
րանին . ամէնքն այս գաւառին վատ ու մա-
հաբեր օդին վրայ կը խօսէին , իսկ Սեդրաք
բնաւ չի դեղեւեցաւ . իր բարձր արժա-
նիքը գործով պիտի ապացուցանէր . իր սի-
րուհւոյն ճանչնալը չ'էր բաւեր իրեն , անոր
ընտանիքն ալ համոզել կ'ուզէր : « Սուրբի'կ ,
քեզի համար կը մեկնիմ », ըսաւ նորատի
աղջկան : Սուրբիկ այս զօրաւոր մարդուն
միակ տկար կողմն , այս Աքիւլլէսին միակ
վիրաւորելի կէտն էր :

Տարի մը կայ որ երիտասարդ երկրաչափն
իր պաշտօնին գլուխն է , ուր յաջողած է
իր պաշտօնակցաց եւ մեծերուն յարգանքն
ու համակրանքը շահիլ : Ատանայի դաշտին
մահաբեր օդը բարւոքելու համար եղած
ջանքերէն եւ ո'չ մին յաջողած էր . Սեդրաք
այս մեծ ու մարդասիրական նպատակին
նուիրեց ինքզինքն . իր պատրաստած յա-
տակագիծն ու ծրագիրը բոլորովին պիտի
մաքրէին այդ տղմուտ դաշտին վատաւողջ
ժանտահոտութիւններն , ու երկրագործին
պիտի տային ընդարձակ ու բարեբեր հողեր .
Սեդրաքի առաջարկութիւնը բոլոր գաւա-
ռին համար կենսատու խնդիր մ'էր եւ իր
ծրագիրն ամբողջապէս ընդունուեցաւ . գա-

ւառին կառավարիչը Մէճիտիէի շորորդ-
 աստիճանը խնդրեց այս եռանդուն պաշ-
 տօնակալին համար, որ անմիջապէս շնորհ-
 ուեցաւ: Այլ գանգատելու տեղի չի կար-
 բաղղը կ'սկսէր ժպտիլ: Իր առանձնու-
 թեան մէջ չէր յուսահատած երբէք. սի-
 րուհւոյն պատկերն հոն էր որ զինքը կը
 քաջալերէր: Քայլ մ'եւս եւ ահա առաջին
 երկրաչափ պիտի անուանուէր: Ո՛հ, այն
 ատեն բաց ճակատով պիտի դառնար Պոլիս
 ամուսնութեան խնդրելու իր սիրած աղ-
 ջիկը. ընտանիքը չէր կրնար դժկամակիւ
 այլ եւս: Երազէ իրականութեան մէջ անց-
 նելու համար այս քայլը միայն մնացեր էր:
 Սեգրաք իր աշխատութիւնը կրկնապատկեց.
 կառավարութեան պաշտօնէի մը յարմար
 հանդարտ գործունէութիւն մը չէր, այլ
 հիւանդոտ տենդէ մը վարակեալ անձի մը
 նման կը վարէր իր անտանելի աշխատու-
 թիւնը: Զորս մարդու գործ էր ստանձնեը
 ու քսան մարդու գործ կը տեսնէր. անի-
 մանալի պատերազմ մ'էր զոր ժամանակը
 փութացնելու համար կը մղէր ամէն օր.
 պաշտօնի բարձրացում խոստացեր էին ի-
 րեն, բայց վեց ամսէն առաջ չէր կրնար
 կատարուիլ. ապրիլի վերջն էին. վեց ա-
 միս՝ վեց տարուան չափ երկար թուեցաւ.
 իր անհամբեր սրտին: Եթէ զաշխարհ բեռ-

ցընէին իր ուսին վրայ այս պայմանաժամը
 կարճցնելու համար, յօժարութեամբ պիտի
 ընդունէր այս նոր Աթլասը:

Մէսաժըրիի Քահաճ երկկայմ շոգենաւն,
 որ այն ատենը Պոլսոյ եւ Աղէքսանդրիոյ մի-
 ջեւ թղթատարութիւն կ'ընէր, իր շարա-
 թական ուղեւորութիւնը կատարելով մա-
 յիսի մէջ կիրակի առաւօտ մը Վուսիորի
 ջուրերը կը մտնէր նոր հարսի մը պէս
 քծնելով: Նաւուն կամրջին վրայ երիտա-
 սարդ ուղեւոր մը կը տեսնուի գունա-
 թափ ու դողդոջուն. մակոյկներն անմի-
 ջապէս կը շրջապատեն նորեկ շոգենաւն.
 ասոնց միոյն մէջ Տիգրան կը գտնուէր որ
 առանց սպասելու շոգենաւին կենալուն,
 չուաններէն վեր ելնելով դէպի երիտա-
 սարդը վազեց ու զայն ողջաբուրեց. Տիգ-
 րան, Սեգրաք, այս երկու բառերը մի-
 ասին լսուեցան ու երկու բարեկամներն
 արտասուելով իրարու գիրկ նետուեցան.
 Քէչ մ'ատեն հեծկտանքէ ուրիշ բան չի
 լսուեցաւ. արգարեւ սրտայոյզ տեսարան
 մ'էր գիտել այս երկու երիտասարդները՝
 զոր ճակատագիրն եղբայրութենէ աւելի
 սերտ կապով մը միացուցած էր: «Սրի-
 ացիր, Սեգրաք» ըսաւ վերջապէս Տիգ-
 րան վեր առնելով ու համբուրելով իր բա-

րեկամին դալկահար ճակատը . « Ճշմարի՞տ է ուրեմն », հարցուց տարաբաղդէն հազիւ լսելի ձայնով մը :

Տիգրան չի պատասխանեց , այլ տոմս մը միայն նետեց ուղեւորին ոտքը :

Տիկին եւ Պ . Գ . պատիւ ունին խընդրել որ հաճին ներկայ գտնուել այս կիրակի առաւօտ իրենց Սուրբիկ դստեր վսեմ . Արամ էֆէնտիի հետ պսակման արարողութեան որ պիտի կատարուի Գատը - Գիւղի Ս . Թագաւոր եկեղեցւոյն մէջ :

Ահա ինչ որ ուղեւորին շուարած ու նըսեմացած ակնարկը կարողաց այս հեշտաբոյր ու ոսկետառ տոմսակին վրայ : Ստոյգ էր ուրեմն այն անհաւատալի գոյժն . եւ ինքն երեսի վրայ թողլով իր պաշտօնն , առանց վայրկեան մ' սպասելու վազեր եւ հասեր էր այն օրն հազիւ յորում Սուրբիկ պիտի պսակուէր :

Գատը - Գիւղի Ս . Թագաւոր եկեղեցին քառակուսի , պզտիկ ու գեղեցիկ շէնք մ' է եւ հոյակապ մարդու մը առատաձեռնութեան արդիւնք : — Խուռն բազմութիւն մը եկեղեցւոյն ամէն կողմը կանուխէն գրաւած է . բակը , բանկալը , խորհրդարանին մէջ անգամ կենալու տեղ չի կայ . հետա-

քլքիր ամբոխն հրաւիրելոց մուտք անգամ թողած չ' է :

Ժամը վեցն է . հանդիսին տէրերն հըրաւիրեալներուն հետ հասան ու անանցանելի մարդկային պատնէչէ մը թափանցելով յաջողեցան եկեղեցին մտնել . պսակի արարողութիւն կայ . հանդիսականներուն մէջ կը նշմարուին Պոլսոյ առեւտրական տանց գլխաւոր ներկայացուցիչները , դատական իշխանութեան անդամներ եւ հայազգի բարձրաստիճան պաշտօնատարք . փեսայն քառասնամեայ պաշտօնակալ մ' է՝ որ վայելչապէս կը կրէ Միւթէմայիլի ոսկեճամուկ համազգեստը . հարսն հագած է սպիտակ կօծի երկար շրջագգեստ՝ հարսանեկան թափանցիկ շղարչով ու իր կոհակածուփ մագերով ծածկուած . դիւրին է նշմարել բարեձեւ հասակ մը , նեղ , նեղ , տփի մէջ ամփոփուելու ու ձգմուելու շափ նեղ մէջք մը որ թաւալուն , հպարտ ու շացուցիչ կուրծ մը կը կրէ , ճակատ մը անամպ արշալոյսի պէս պայծառ , աչքեր սեւ ու խոշոր որոց վրայ շուք կուտան իր երկար բիւբերը , բերան մը գարնան վարդի պէս թարմ ու կարմիր . քիթն ուղիղ , ուռնգերն ուռած , թափանցիկ , դիւրայոյզ ու հրապուրիչ . սպիտակ ձեռնոցներ մինչեւ թեւերը կ'երկարին ու երեւան կը հանեն անոր քնքոյշ ու ան-

նմանելի գիծերն , ու նոյնպէս ճերմակ սըն-
դուսէ կիսակօշիկներ կը սեղմեն անոր փոք-
րիկ ոտները :— Տասնևեօթը տարեկան կայ
այս աղջիկն , այս մեհեանին մէջ ճշմարիտ
դիցուհին՝ որ կ'իջիսէ բոլոր հաւատացեցող
վրայ :

Պատկի արարողութիւնն սկսաւ , մահ-
ուան ողբերու նման տխուր երաժշտութեամբ
մը . միշտ խորին տպաւորութիւն մը յառաջ
կը բերեն այս տխրանուագ աղօթքներն .
ապստամբ միտքը սլահ մը կ'ընդարմանայ ու
հոգին հմայութեան մը ներքեւ կը վերա-
նայ ու անմատչելի երկնադաւաններու մէջ
կը սաւառնի . բարեսպաշտ լուսթիւն մը կը
տիրէր . պսակադիր քահանայն ձայնը բարձ-
րացուց ու փեսին դառնալով՝ « Տէ՛ր ես
այս օրիորդին » ըսաւ հանդիսաւոր հար-
ցումը կրկնելով . « Այո՛ » պատասխանեց
փեսան գլուխը խոնարհեցնելով . « Եւ դու
հնազա՞նդ ես , աղջիկս » , ըսաւ քահանայն
օրիորդին ուղղելով խօսքն . աղջիկը վեր ա-
ռաւ գլուխն . . . երկու տղաներ , ո՛չ , եր-
կու հրացայտ շանթեր պատահեցան իր մո-
լորեալ ակնարկին . բողբող , սպառնացող ,
որոտացող ձայն մը կարծեց լսել , նենգաւոր
բառը կարծես ականջին զարկաւ , աչքերը
մթաղնեցան , խուլ բծծանքով ականջը լեց-
ուեցաւ ու դէմքը մահատիպ թալկութիւն

մը գրաւեց . Սեդրաք իր բարկացայտ նայ-
ուածքը աղջկան վրայ սեւեռեր էր :

Սեզրաք , անշուշտ իրական բան մը չ'էր
կրնար ըլլալ ասի , այլ արհաւիրից տեսիլ
մը զոր իր խռովեալ խզճմտանքը միայն ար-
տադրած էր : Սեզրաքի ներկայութիւնն ան-
բացատրելի էր : Այն վայրկենին իսկ ուր նոր
ուխտով մը աւելի հին , աւելի նուիրական
ուխտ մը կը դրժէր , ճիշդ այդ վայրկենին
երիտասարդին նայուածքը մահատու դաշոյնի
մը պէս շողացեր էր աչքին . թէ որ ապտակ
մը ուտէր , յօժարակամ պատրաստ էր նե-
րելու . այլ այս անխօս ներկայութիւնն այն-
չափ աւելի նախատալից թուեցաւ որչափ
լուին ու իրաւացի էր :

Մարդս ամէնէն աւելի անիրաւ եղած
ատենը կը բարկանայ . նոյն բանը պատա-
հեցաւ Սուրբիկին . կանացի սիրտն անյա-
տակ ու անքննելի վիճ մ'է . ճշդիւ չ'է կա-
րելի անոր հոգւոյն վրճակն հաստատել : Եւ
սաչափն ստոյգ է որ ուրիշի մը հետ ամուս-
նանալ որոշելով հանդերձ՝ Սուրբիկ իր վա-
ղեմի բարեկամը յաւիտեան կը սիրէր : Անոր
հեռացումն ու տաժանելի վրճակն իր գը-
թութիւնը շարժեր էր , եւ սէրը տարօրի-
նակ երեւոյթ մը կ'զգենու երբ գթութեան
կը միանայ . տեսակ մը շնորհ կը դառնայ
որ տուողին բարի կամեցողութեան ձըգ-

ուած է . սէրը շի մուրացուիր այլ կը պահանջուի . ողորմութիւն մը չ'է այլ տուրք մը :

Նրիտասարդին վիճակն ազդկան մետ աւելի պաշտպանութեան զգացում մը յառաջ բերած ու այս կերպով իր սէրը պարտականութիւն մը լինելէ դադրած էր առանց անհետանալու . միւս կողմէ իր ընտանեաց ճնշումն որ բռնութեան մօտեցած էր , իրեն խոստացուած ամուսնոյն բարձր դիրքն ու պզտիկ փառասիրութեան զգացում մը՝ ամէնքը միացեր էին հեռաւոր անձի մը տըրուած խոստումը մէկզի ընելու : Բայց այս յանկարծական վերադարձն հաշուի մէջ չ'էր . ինչպէս ըսինք Սուրբիկ իր մանկութեան տարաբազդ ընկերը միշտ կը սիրէր . զայն տեսնելուն յիմար փափագ մը ունեցեր էր անոր զիրկը նետուելու ու արտասուելու . բայց առանց կանխաւ իրմէ ո՛ր եւ է բացատրութիւն խնդրելու՝ անոր այս յանկարծական ներկայութիւնն , հրապարակաւ զինքն ամօթահար ընելու անողոր փորձ մը ու թշնամանք մը նկատեց եւ իր բոլոր սիրոյն հակառակ՝ զինքը նուաստացնելու այս ջանքը խիստ ծանր եկաւ իրեն : Ինքնիրեն երիտասարդին համար մեծ գոհողութիւններ ըրած ըլլալ կը կարծէր ու դիմացինն ապշաբախ համարեց այս թշնամութեան ցոյցին

համար ու այլ եւս ամէն բարեկամութիւն վերջացած : Յանցանքն իրը չ'էր եթէ գացեր էր աշխարհիս մէկ ծայրն ու անպաշտպան թողեր էր զինքն անգուժ հօր մը բռնութեանց ներքեւ ու հիմա եկեր էր իբրեւ թէ համար պահանջելու իրմէն : Զինքը սիրել խոստանալով յախտենական գերութեան դաշն կուած չ'էր ու Սեդրաք իրաւունք չ'ունէր այնչափ ատեն անտարբեր ու լուռ կենալէ վերջը ճիշդ պսակի արարողութեան ժամուն սպառնալից ստուերի մը պէս երեսին զարնելու իր ընթացքը : — Նահանջել կարելի չ'էր այլ եւս . բոլոր գիւղին մէջ ծաղր ու ծանակ ու շողակրատ ամբօխի մ'առջեւ ամօթահար ըլլալու վախը մեռնելէ աւելի սարսափելի էր :

Ու Սեդրաք ճիշդ զինքն այս նուաստութեան մատնել եկեր էր անշուշտ : Այս մտածումները մէկ մանրեկրորդի մէջ Սուրբիկի մտքէն անցան , ու յիմարուհին՝ ինքնիրեն եթէ ոչ պարկեշտութիւն գէթ արդարացում մը գտնել կարծեց իր վարմունքին մէջ . նա մանաւանդ աչքին զարկեր էր երիտասարդին ճամբորդութեան անճուռի հագուստներն հրաւիրելոց սեւ ու անքնադատելի զգեստներուն մէջ . անոր արեւէն ու հողմէն սեւցած երեսը չը գիտեմ ի՛նչ վայրենութեան երեւոյթ մը տուեր էր անոր սո-

վորաբար տրտում երեսին ու անմիջապէս մեծ տարբերութիւն մը նշմարեր էր երիտասարդին ու իր ամուսնոյն մէջ :

Սեղրաք իրեն համաստիճան մէկը չէր . իրմէ վար դասի մը պատկանող անձի մը կողմէն , նոյն իսկ թէ որ պաշտեցեալ մէկը լինէր այդ անձը , Սուրբիկ թշնամանքի մը հանդուրժողներէն չէր ու չի հանդուրժեց . ամբարտաւան կերպով մը վեր առնելով իր գլուխն՝ « Ս,յո՛, Տէր Հայր » , ըսաւ քահանային , « հնազանդ եմ » :

Ս,յապիսի հանդիսաւոր վայրկեաններու մէջ բնական եղող յուզումէ ի վատ ոչ որ բան մը նշմարեց հարսին դէմքին վրայ . այս անգարձ որոշումը կայծակի արագութեամբ տրուեր էր անոր մաքին մէջ ու մէկ բառով ճակատագիր մը խորտակեր էր : Ահա այսպիսի խախուտ ու անիրաւ յատճառաբանութեան մը կը յենուր այս անողոր որոշումն , որ մանկութեան ու պատանութեան ամէնէն նուիրական կապերը դանակի մը պէս մէկ հարուածով կը ջնջէր . ափսոս . ու հարկ է աւելցնել որ այս աղջիկը թերեւս լաւագոյն կինն էր աշխարհիս վրայ :

Սեղրաք իր պաշտօնատեղին չի վերագարձաւ եւ ոչ իսկ հրաժարական մը կամ լուր մը զրկեց . ի՛նչ օգուտ այլ եւս : Ս,յս

անլուր մատնութիւնն ահարկու հարուած մ'եղաւ գլխուն որ զինքն ընդարմացուց ու ապշեցուց . իր սէրն , իր անձնութիւնն , այս ուխտագրութ աղջիկն , այս հարսայնիքըն , ուրիշ բան չ'էին կրնար լինիլ բայց անհաճոյ երազ մը ուսկից սթափիլ կ'ուզէր : Ինչ որ հզորագոյն յուզումները չ'էին կարողացեր ընել այս ուժով մարդուն վրայ , մատնուած սէրը կարողացաւ ընել : Սեղրաք ընկճեցաւ . իր սրտէն զարկեր էին զինքն . այս աղէտը խորտակեր էր իր հոգւոյն միակ զսպանակն , և ուղեղը չ'էր կըրցած դիմադրել այս անակնունելի բաղխման . բժիշկները մօտալուտ խելագարութեան նշաններ նշմարեցին անոր վրայ :

Եէտի - Գուլէէն Վէլի - Էֆէնտի երթալու ճամբուն վրայ ամայի եւ առանձնացեալ դաշտի մը մէջ երկյարկ , փայտաչէն ու քառակուսի շէնք մը չի բարձրանար այլ կը տարածուի . հին , գրեթէ խարխուլ ու ընդարձակ յարկ մ'է որուն յաւիտենական դեղին գոյնն առածի կարգ անցած է . զիմացը կայ փոքրիկ պարտէզ մը որուն մէկ մասը բանջարեղինաց յատուկ է ու միւս մասն հասարակաց զբօսավայր մը լինելու յաւակնութիւնն ունի : Ադրիանուպոլսոյ շոգեկառքն անոր արեւմտեան կողմը քերելով իր

երկաթէ ճամբուն վրայ կը սրանայ :

Այս պատմական շէնքն Հայոց Ազգային Հիւանդանոցն է : Ես չ'եմ նայիր ո՛չ անոր փլատակ սպառնացող պատերուն և ո՛չ աղքատիկ անկողիններուն . անոր տխուր ճակատը զարդարող աչքային անունն իմ սիրտս կը գրաւէ ու անմիջապէս կը սիրեմ այս քայքայուն շէնքը :

Օրինաւորութիւն , ճշգրութիւն ու հայրական հոգածութիւն մը կը տիրեն այս ճըշմարիտ ազգային հաստատութեան մէջ : Անոր հիմնադրին նուիրական ոսկերտութիւն Մայր-Եկեղեցւոյ մէջ կը հանգչին , այլ անոր ազգանուէր ոգին յաւիտեան կը հսկէ այս սփոփանաց յարկին վրայ :

Հիւանդանոցին մէջ մաս մը կայ որ ամուր պատերով բաժնուած է ու երկաթէ հաստատ ձողեր անոր պատուհանները կը զարդարեն . 40 - 50 հոգւոյ չափ բազմութիւն մը կ'ապրի հոն հզօր ու որոտաձայն պահապանի մը ազդած սարսափին տակ հնազանդ : Գլուխներն պղտիկ գգակ մը , լայն և հաստ բրդէ շապիկ մը , նոյնպէս լայն ու միւնոյն կտաւէ տաքատ մը այս թշուառութեան զինուորներուն միօրինակ համազգեստն է : Մեծ մասը նստած է փայտէ տախտակամածի մը վրայ ու շրջանակ մը կազմած է : Դէմքերնին լուրջ ու խոժոռ , ակնարկնին

չըջուն ու մուրեալ , ձայներնին ցած ու հանդարտ , այս մարդիկը նորեկ այցելուին աչքին կարծես ծանր ու դժուարին խնդրոյ մը համար խորհրդակցութեան մէջ են . մաս առ մաս իրարու հետ կը խօսին , կը պատասխանեն , կը վիճին ու առանց մօտէն ականջ տալու անոնց խօսակցութեան անկարելի է դատել այս տարաբաղդներուն վիճակը :

Յիմարներն են ասոնք :

Ահաւոր ու կարեկցութեան արժանի տեսարան :

Այս միազգեստ տարաբաղդներուն մէջ երիտասարդ մը կը նշմարուի իր զուարթ ու խնդուն երեսոյցն ու համակրելի ձեւերովը . արագ , գրեթէ տենդային արտասանութիւն մը ունի . հակառակելու չի գար անոր , անմիջապէս կը զայրանայ ու կ'սպառնայ . իր բաղդակիցներէն միոյն հետ կը խօսի շարունակ որ իրեն մտիկ չ'ընեն . կը խօսի ու կը խօսի , կարծես պատմութիւն մը կ'ընէ ու վճիռ մը կ'սպասէ անկից . — Ի՞նչ կը շաղկրատէ այս յիմարն . երբեմն կ'երգէ ու գիշերն անխօս լութեան մէջ ամէնքը կը ձանչան անոր սիրած երգերուն ողբալիլ շէշտը :

Այս յիմարը Սեդրաքն է :

Տարուան մը չափ ամէն բժշկական խը-

նաւթ անօգուտ դառնալով, ընտանիքը պարտաւորեցաւ ազգային խնամոց յանձնել զայն :

Տիգրան ուրբաթ և կիրակի օրերն յատկացուցած է իր բարեկամին՝ որ զինքը չը ճանչնար :

Ի զուր նոր կայծով մը բորբոքել կ'ուզէ այս մարած հրաբուխն, ու արձագանք մը արթնցնել անոր խորայտակ սըրտին մէջ . ամէն յոյս շատոնց վերջացած է ամէնուն համար եւ Տիգրան միայն կը յամառի բաղդին ու գիտութեան դէմ . իր այցելութիւններն անպակաս են : Լիւանդանոցի մարդիկներն յիմարին եղբայրը կը կարծեն այս նորատի երիտասարդն՝ որ իր հանգստութեան ու զբօսանաց ժամերը նըուիրական պարտականութեամբ կը լեցնէ ու ամէն անգամ արտասուելով կը վերադառնայ :

Սեդրաքի այս մահացումը երկար չի տեսցեց : Երկինք գթաց կարծես այս թշուառին . օգոստոսի սկիզբները ծանր ժանտատենդէ մը բռնուեցաւ ու տասնևութ օրուան մէջ հալեցաւ այս առիւծի պէս տըղան . ուրբաթ երեկոյ մէր, օրհասական ճգնաժամն սկսաւ, վերջին պայքարը կենաց ու մահուան մէջ : Գոգցես բաղդին անուղոր հեզնութեամբ հիւանդը պահ մը սթա .

փեցաւ իր մահատիպ թմրութենէն . տըրտում նայուածքը չորս կողմը սեւեռեց, Տիգրանը միայն տեսաւ քովը, նշան ըրաւ անոր մօտենալու եւ իր սառ կտրած չըրթունքով համբուրեց երիտասարդին դալըկ ճակատը . ու քիչ մ'ատեն կամաց, խիստ կամաց ձայնով մը խօսեցաւ անոր հետ . . . կէս ժամ վերջը Սեդրաքի աստղը շիջեւ էր :

Սեդրաքի կրօնական համոզումները կարի սահմանափակ էին . քրիստոնէութիւնն յարգելով հանդերձ գերագոյն էակի մը գոյութեան հաւատալէն անդին անցած չէր երբէք : Մահուան ճգնաժամին մէջ անոր յուշաբերած վայրկենին ուզեր էին իր մոռցած պարտականութիւններն յիշեցնել ու բարեսիրտ պանդուխտ քահանայ մը յանձն առեր էր այս դժուարին պաշտօնը . Սեդրաք բացարձակ կերպով մերժեց ամէն աղերս ու խրատ : « Ես խղճի և սկզբունքի տէր մարդ եմ, ըսաւ քրիստոնէութեան այս համեստ ներկայացուցչին, ու կեղծիք չ'եմ ընդունիր մահուան անկողնոյս մէջ : »

Քահանայն շի պնդեց, Սեդրաքի անկեղծութիւնը զինքն համոզեց ու չ'ուզեց բռնանալ անոր խղճմտանքին վրայ . ասի այն բարի անձերէն մին էր որոնց մօտ պարզամտութիւնն ուղղութեան եւ առաքինու-

թեան լաւագոյն առաջնորդն եղած է : Իրմէ աւելի գիտուն կրօնաւոր մը ինքզինքը թե-
րացած պիտի նկատէր Սեդրաքի վրայ բռն-
նութիւն ու ճնշում չի գործածելուն . այս
պահուիտ երէցն այնպէս չի նկատեց եւ
չատ կը վախնամ որ քիչ մ' աւելի խօսքով
երէցն ինքն ալ չի համոզուէր Սեդրաքի գա-
ղափարներուն :

Որչուեցաւ ուրեմն որ գաղտնի պիտի
մնար հիւանդին հաղորդութիւն չ'առնելն :
Քահանայն մոլեռանդ ժողովրդեան գայ-
թակղութենէն նախամեծար համարեց այս
անհրաժեշտ ստախօսութիւնը :

Իայց չը գիտցուիր թէ ի՞նչ կերպով այս
ճգնաժամի գաղտնիքն Հիւանդանոցին մէջ
տարածուեցաւ . քահանային թուրքերանու-
թիւնն էր թէ ուրիշ պատճառ մը կար որով
իմացուեցաւ Սեդրաքի լուսաւորչական ե-
կեղեցւոյ պարտականութիւնները մերժելն :

Հարագատ Լուսաւորչակիւններու աչքին՝
այս երիտասարդ ազատակիւր Պաօզ մը, Բո-
ղոքական մ' էր եւ Բողոքականէ մ' աւելի
քամահրելի արարած մը չի կայ : Կրօնական
խտրութիւններն՝ ազգութեան ոգիէն աւելի
ուժով կ'ազդեն մեր վրայ : Ամէնքը կը յի-
շեն այն ահաւոր պատմութիւնն որ բողո-
քական հոչակաւոր ննջեցեալի մը թաղման
հանդէսին հետ կապուած է : Հայոց պատ-

մութեան սեւ ու տխուր մէկ երեսն է այդ
մոլեռանդ անողորմութիւնն որ անկենդան
դիակի մը դէմ կը մաքառէր : Իր ազգային
պարտականութեանց մէջ եղջերուի մը չափ
սիրտ չ'ունեցող խուժան մը իր քաջութեան
փորձը գերեզմանատանց ապացուցանել կը
ճգնէր :

Նրեսուն տարուան միջոցէ վերջը մի եւ
նոյն աններող գաղափարները կը տիրէին ,
եւ Սեդրաքի թաղումը Սամաթիայէն , Եէ-
տի - Գուլէէն ու չրջակայներէն ժողոված ու
հաւաքած էր ստորին անկիրթ ամբոխ մը ,
որ հաստատ կերպով դիմադրել որոշած էր
անոր Հայոց գերեզմանատան մէջ ամբոխի-
ուելուն :

Հայրենաւանդ մոլեռանդութիւն մ'էր որ
անեղձ պահուած էր ու առաջին առթիւ
երեւան կ'ելնէր : Տիրքան միայնակ էր այդ
մրրկիտ բազմութեան դէմ : Յուզարկաւո-
րութեան հանդէսն սկսաւ աւշուք ու ան-
ձայն . լքեալ ու ազբատին յուղարկաւորու-
թիւն մ'էր . քահանայ մը , ժամկոչ մը , հին-
ցած ու պատառուն ծածկոց մը , ասոնք
մ'այն կրնային առ առաւելն ձրի տրուիլ :
Ուրիշ բան էր , եթէ թաւիչէ ծածկոյթի ,
սնտուկի մը (այսպէս կ'անուանի եկեղեցւոյ
լեզուով նոր դագաղը) եւ բազմութիւն քա-
հանաներու ծախքը վճարելու դիրութիւնն

ըլլար • Տիգրան ասոնց եւ ոչ մին ուզած էր • այդ ստորին խտրութիւնները զայն չէին վշտացներ եւ աւելի բարձր էր անոր ակնարկը : Հիւանդանոցի մատրան մէջ նընջեցելոյն արարողութիւնն երկար չի տեւեց ու դագաղը ճամբայ հանեցին դէս ի գերեզմանատուն . . . :

Գայթակղեալ ամբոյսը կը հետեւէր դագաղին աւելի թշնամեայ քան թէ յուզարկաւորի մը զիրքով, ու խռովեալ տրտունջ մը՝ որ քահանային աղօթքին կ'իշխէր, որոշ կերպով կ'ըսէր •

— Չ'ենք ընդունիր, չ'ենք ընդունիր, չ'ենք ընդունիր :

Դագաղը կը տանէին չորս հուժկու երիտասարդներ, Սեդրաքի այն թշուառ վիճակակիցներէն զորս ոյժի կարօտ աշխատութեանց մէջ, Հիւանդանոցի վարչութիւնն երբեմն կը գործածէ զանոնք բարձրօրովին անգրաղ չի թողլու համար : Անշուշտ լաւագոյն է այս անգգայ էակներուն յանձնել ննջեցեալ մը ի գերեզման առաջնորդելու տխուր պաշտօնը :

Նեղ ու դալարուն ճամբէ մը կը յառաջանային յամրաքայլ : Բնութեան ամէնէն աւելի զմայլելի, պայծառ օրերէն մէկն էր, արեւը կ'արձկէր իր ջերմ ու ոգեւորիչ ճառագայթներն, երկինքը խաղաղ էր ու ա-

նամպ, ծառերը տեւեւներով կը ծածկըռուէին, նոր կեանք, նոր հոգի մը կը ծաւալէր ամէն կողմ իրբեւ դառն հեգնութիւն մ'այս մահուան տեսարանին դէմ :

Այս թաղման ընդդիմացողներու ուրիշ խումբ մը կէս ճամբան կ'սպասէր որ առաջնոյն հետ միանալով կը ջանար անլուի ընել թաղման արարողութիւնը : Ժամկոչն իր ձայնը քահանային աղօթից կը միացնէր արագ ու հապճէպ արտասանութեամբ, ինչպէս որ վայելուչ է աղքատին գերեզմանին, մինչդեռ խուժանը գանգատող ու բողբող ձայնիւ կը կրկնէր շարունակ •

— Չ'ենք ընդունիր, չ'ենք ընդունիր, չ'ենք ընդունիր :

Տիգրան գլխիկոր կը հետեւէր դագաղին • այս մրրկայոյզ յուզարկաւորներուն աղաղակը չէր զոր կը լսէր, քահանային սըրտայոյզ աղօթքն էր՝ որու առջեւ կը խոնարհէր : Ի՛նչ, այս է եղեր իւր մտերմին վախճանն, այդ գիտութիւնն ու այդ սիրտն այս տխուր վերջաւորութեան վիճակեալ են եղեր • ո՞վ պիտի հաւատար մի քանի տարի առաջ երբ անմոյթ ու զուարթ ապագային վրայ յանդուգն ապահովութեամբ կը խորհէին :

Իայց ամբոյսին աղաղակն հետզհետէ կը բարձրանար սպառնալից շեշտով մը • գե-

բեզմանատունն հասեր էին . պահ մը լուս-
թիւն տիրեց . գիտցողները չը գիտցողնե-
րուն կը պատմէին այն անլուր սրբապղծու-
թիւնը . բողբոջական մը ուղղափառ Հայոց
գերեզմանին մէջ ընդունուի . . . Լուսա-
ւորչականներուն գերեզմանատունը մըտ-
նելն արքայութիւն մտնելէն աւելի դժուա-
րին էր :

Մայրայեղ միջոցներու դիմելէ առաջ ամ-
բօխը կը խորհրդակցէր , խնովութեան հողմը
կը տարուբերէր զայն , մինչդեռ իր խուլ և
մոլեգին բողբոջ շրջակայ արծազանքներէն
կրկնուելով ընդարձակ հովտին մէջ կը տա-
րածուէր .

— Չ'ենք ընդունիր , չ'ենք ընդունիր ,
չ'ենք ընդունիր :

Ս'վ էր եւ ի՞նչ կ'ուզէր այս յիմար ու
կատաղի բազմութիւնը : Տիգրան անոնց
դարձաւ : Իր պատանութենէն կը ճանչնար
զայրացեալ խուժանի մը բոլոր ոյժն ու տը-
կարութիւնը . ժամ էր վերջ տալու այս ա-
մօթալից տեսարանին . դազաղը քարի մը
վրայ կ'սպասէր , եւ քահանայն անօգուտ
կերպով կը բանակցէր այս անզգամներուն
հետ ու խօսք հասկցնել^ն անոնց : — Ի զուր
ըսաւ անոնց թէ Քրիստոսի եւ ոչ մէկ վար-
դապետութեան մէջ կը տեսնուէր այս ան-
ներող մոլեռանդութիւնը , թէ երիտասարդ

ննջեցեալը բողբոջական մը չ'էր , ի գուր գե-
րեզմանին սրբութիւնն ու մահուան նուի-
րականութիւնն յիշեցուց այս չափազանց
կրօնասիրութենէ մտրեալ հոգիներուն :

Երկու հարիւր հոգւոյ չափ բազմութիւն
մը կը շրջապատէր մթին փոսն ուր Սեդրաքի
մարմինը պիտի ամփոփուէր , եւ քահանային
տկար ձայնը չուտով կը կորսուէր ահաւոր
ու վայրենի մռնչման տակ որ երկու հարիւր
բերնէ արձակուելով , փոթորկաչունչ հողմի
մը պէս կը սաւառնէր .

— Չ'ենք ընդունիր , չ'ենք ընդունիր ,
չ'ենք ընդունիր :

Երբէք անկրթութիւնն այս աստիճան
վայրենի երեւոյթ մը չ'էր ստացած . ափ-
սոս , մի եւ նոյն անսաստ ու կամակոր խու-
ժանն էր զոր ինքն այնքան անգամ բորբո-
քած ու արձակած էր աղգային իշխանու-
թեանց դէմ , ինչպէս թնդանօթածիբ ըս-
պայն կ'արձակէ իւր հրատապ եւ աւերիչ
ոռւմը : Այժմ այդ մարդիկն իրեն դէմ
էլեւնէին այնքան կոշտ ու անգութ որքան
այլոց դէմ հանած էր :

Տիգրան ցասկոտ էր բնութեամբ . ո՛չ
թուոյն անհաւասարութիւնն , ո՛չ բարկալից
բազմութեան զայրոյթն ու անոր անհաշ-
ուելի հետեւանքը զինքը չի կասեցուցին :
Իր բարեկամին դիակին դէմ կուռուղ այս

մարդոց տեղի չի պիտի տար, թէ որ մեռնիլ անգամ հարկ ըլլար. արիւնը եռաց. թերեւս իր սերձախօս լեզուն յաջողէր մեղմել այն մորիկը՝ զոր այնքան վարժ էր յարուցանել. բայց բարկութիւնն ամէն խոհեմութիւն անոր մտքէն վանեց :

— Ետ քաշուեցէք, ստահա՛յններ, գոչեց անոնց, ես եմ այս ննջեցելոյն տէրը, չ'ըլլայ որ մօտենաք անոր, ազգինն է այս գերեզմանատունն ու Հայոց ազգին մէկ զաւակն է այս մեռեալն որ հօս պիտի թաղուի :

Կռուոյ հրաւէր մ'էր :

— Այդ ալ բռնութեան մ'է, աղաղակեցին ուսանք, տփեցէք այդ անհաւատը :

Խուժանը՝ կատղած՝ ամեհի ու բարբառոս մոնջմամբ կը պատէր երիտասարդն, որպէս փոթորկայոյզ կոհակներ կը շրջապատեն ընկղկելու մտ նաւն. ամէնէն քաջերն յառաջ նետուեցան. սրահ մը վտանգն անխուսափելի եւ անաւոր դարձաւ, մինչդեռ հեռու մնացողները զայրագին արձագանքի մը պէս կը կրկնէին. — Բռնութեան մ'է, բռնութեան մ'է, զարկէք :

Անզգամ մը աչերն արիւնով լեցուած ձեռքը վերցուց . . . :

Սարսափելի հայհոյութիւններով խառն որոտման պէս ձայն մը լսուեցաւ յանկարծ. երկու մարդ, ոչ նուազ չարաշուք ու ստո,

րին երեւոյթով քան միւսներն, անհաւատալի ուժով մը այդ մարդկային պատենէն ճեղքելով երիտասարդին քով սրացան ու պռուցին .

— Մի՛ դպիք մեր էֆէնտիին :

Պահ մը վարանում տիրեց :

Կ'երեւէր թէ այս երկու մարդիկն անծանօթ չ'էին. բաց գլուխնին՝ թեթեւ եղջճայով մը պատած, կուրծքերնին մերկ՝ զոր չի կոճկուած պզտի բաճկոնակ մը բաց կը թողուր շարունակ, ոտքերնին բուպիկ այն ծանօթ կօշիկներու մէջէն որք իրենց յատուկ անուամբ եկեղծ է կոչուին, այս մարդիկը կը վերաբերէին այն ստորին դասուն որ պարագային համեմատ ձկնորս, նաւավար ու ջրհանակիր կ'ըլլայ եւ որ սովորաբար քիչ կամ շատ ոճրագործ է :

Պարտէին այս երկու անձրնքը մեծ համբաւի մը եւ իշխանութեան տէր լինիլ, (համբաւ՝ որ գովելի տեղ մը չ'էր կրնար ունենալ.) ըստ որում ամբօխն իր յարձակման մէջ կանգ առաւ. Յետոյ այս մարդիկն հետըզհետէ հեռացուցին երիտասարդը մօտէն շրջապատողներն ու կամաց ձայնով, տարօրինակ հեզութեամբ մը՝ որոյ ներքեւ դաշայնի հարուածի մ'սպառնալիքը դիւրութեամբ կը նշմարուէր, մի առ մի վանեցին այս սպառնալից բաղմութիւնն :

Ի դէպ էր անշուշտ այս անյուսալի օգնութիւնն՝ որ յամառ երիտասարդը կը փրկէր :

Տիգրան զէջ երազէ մը սթափիլ կարծեց երբ իւր շուրջն այս երկու ազատիչները միայն տեսաւ՝ զորս չէր ճանչեր եւ որոց իր շնորհակալութիւնն յայտնեց :

— Դուք կրկին բարեգործութիւն մ'ըրիք, ըսաւ անոնց, նախ արգիլեցիք որ նընջեցեալ մը անգերեզման թողուն եւ զիս սպաննեն, երկրորդ՝ թող չի տուիք որ այդքան մարդիկ սրբապիղծ ու ոճրագործ լինին :

— Ես ձկնորս կարապետին եղբայրն եմ, ըսաւ անոնցմէ մին, դուն իմ եղբայրս մահուանէ ու բանտարկութենէ փրկեցիր առանց ստակ եւ վարձք պահանջելու : Դուն զիս չէս ճանչնար, բայց մենք բեզ լաւ կը յիշենք, երբ դատաստանին մէջ իմ եղբայրս կը պաշտպանէիր ու փրկեցիր : մենք աղբատ մարդիկ ենք, ապերախտ չենք, ըսաւ խոնարհութեամբ ու հեռացաւ իր ընկերոջ հետ մինակ թողլով սգաւոր երիտասարդն իր մտերմին գերեզմանին քով :

Պալքելլի գերեզմանատունը Պոլոյ Հայոց գերեզմանատանց երէցն ու հինաւուրցն է : չի կայ մէկն որ ազգական մը յանձնած չը լինի այդ սեւ հողին : այս գերեզմանա-

տունը սովորական բան մը չ'է, այլ չարագուշակ քաղաք մը՝ որ իրեն տնակները, պալատներն, արուարձաններն, իր յարգի ու անյարգ թաղերն, իր սովորութիւններն, աւանդութիւններն ու նախապաշարուներն ունի : երեւակայեցէք ընդարձակ դաշտ մը երբեմն կոտրած, սեւցած ու տձեւ քարերով, երբեմն հոյակապ շիրիմներով ծածկուած, ոչ իսկ մատ մը տեղ ուր ոսկերտիք գրաւած չը լինին : նսեմաստուեր ու անխնամ վայրենի ծառեր որք աստ անդ կը տարածեն ոչ թէ շուք, այլ կարծես անթափանց մառախուղ մը : ո՛չ ճամբայ եւ ո՛չ ուղի առաջնորդուելու այս մեռելոց լաբերին թոսին մէջ ուր գերեզման մը գտնել շատ անգամ դժուարին ու երբեմն անհնարին է : ու հարկ է, եթէ պէտք ունիս համարյր մը տալու սիրեցեալ հողակոյտի մը, հարկ է դիմել գերեզմանաց պահապանին, միակ իշխանն ու միակ հպատակն այս ոսկերտեաց աշխարհին մէջ :

Միւս թաղերու գերեզմանատուններն ո՛չ այնքան սգատխուր երեւոյթ մ'ունին : այդ նոր շիրմատանները հեռզհեռէ փոխուելու ու շտկուելու վրայ են : անհարազատ դաւակներ, ուր լուսաւորութեան անուան տակ առէն ինչ կը նորոգի մինչդեռ անոնց ծերունի հաւը, Պալքելլի գերեզ-

մաննոցն, անսասան կը կենայ ու աւանդապա՛հ անգղի մը պէս անշարժ կը հսկէ իր մեռելոց վրայ :

Սեգրաքի մարմինն այս գերեզմաննոցին մէջ թաղեցին . այնպէս փափաքեր էր օրհասական երիտասարդը . բայր մը ունի եղեր իրմէ առաջ մեռած, անոր քով ամփօփեցին զինքը : Տիգրան քար մը դնել տուեր էր անոր վրայ ու փորրիկ երկաթէ վանդակ մը այս կրկին գերեզմաններուն շուրջն :

Սեգրաքը ծածկող քարին վրայ ո՛չ անուն կայ եւ ո՛չ թուական, այլ երեք բառ միայն կը կարդացուի որ մինչեւ այսօր բոլոր այցելուներուն հետաքրքրութիւնը կը շարժէ : « Հանգիստ թողուցէք զինքը » գրուած է այս մարմարին վրայ . որո՞ւ կուզուի այս տարօրինակ պատուէրն, ով ննջեցելոյն հանգիստը յիշուց խռովել արդեօք :

Անոնք որ փափաքած են խմանալ այս անանուն ննջեցելոյն գազտնիքն, ի զուր պահապանին դիմած են տեղեկութիւն ու գելու համար . պահապանն իր հսկողութեան յանձնուած մեռելոց նման լուռ էր այս մասին : Միայն դիտար էին ումանք որ սեւեր հագած մանկավարդ կին մը ամէն տարի Մայիսի առաջին կիրակի օրը պսակ մը կը բերէր այս լքեալ գերեզմանին : Պսակ մը Պալքեալի մէջ հազուադիւտ դէպք մ'է .

հետաքրքիրները յուսոյ նշուլ մ'առին . կինը մշտ ճշգապահ կը գտնուէր . հետեւեցան անոր ու երբ օր մը սեւերով կինը գերեզմանէն կը վերադառնար, ետեւէն գային անոր ո՛վ ըլլալն հասկնալու համար . բայց տեսան որ տան երկիճի կառք մը իր վարագոյրներն իջեցուցած սրարչաւ կը տանէր սըգաւոր այցելուհին . այն ատեն դարձան գերեզմանին քով գօնէ պսակին ձեւէն, ծաղիկներուն կապուելուն ճաշակէն ո՛ւրիշ գալը գուշակելու համար : Պսակը ճերմակ քամելաներով շինուած էր, որուն վրայ կապոյտ մանիշակներով կազմուած « ԶՂՁՈՒՄ » բառը կը կարդացուէր :

ՄԱՍՆ Բ .

ՍՈՌԱՅՈՒՄ

Յունիս ամսոյ մէջ պայծառ ու անդորր գիշեր մը, Քանըճայի ծովեզերեայ ապարանքներէն մին շքեղ կերպիւ լուսաւորուած էր . Պետական խորհրդոյ հայազգի անդամներէն և Մատրիտի Օսմանեան դեսպանատան նախկին առաջին քարտուղար Վսեմ Գէորգ էֆէնտի երեկոյթ մը կ'ընծայէր իր

ընտրեալ հրաւիրելոց . դեսպանական մարմինը գրեթէ ամբողջովին , Պետական Խորհրդոյ նախագահը , բարձրադիր իսլամ ու հայազգի պաշտօնատարք եւ սեղանաւորք իրենց ընտանեաց հետ պատասխանած են հայ քաղաքագէտին ընդունելութեան :

Սրահներէն մին՝ միայն լուրջ ու քաղաքական խօսակցութեանց յատկացած է : Ռուսո - թուրք պատերազմին նախընթաց եղող Պալքանեան ազգաց խոսվութիւնք մրտատանջութիւն կը տարածեն դիւանագիտաց մէջ , խլրտում մը կայ , հով մի՞ որ կռահկածուփ կը յուզէ սլաւեան ազգութիւններն ու սրատես անձինք զիւրաւ կը ճանչնան հիւսիսի քամին որ փոթորիկ միայն կը ծնանի :

Ուրիշ ակումբ մը երիտասարդաց , որոց մէջ կը նշմարուին դեսպանական փայլուն քարտուղարք , զինուորական կցորդներ , դատական պաշտօնատարներ , տիկնանց չորջն հաւաքուած է : Անդին խաղի սրահը թափուր չէ ու պաշտան իր անխուսափելի տագնապովը կը վարակէ իր բոլոր սիրահարները . մէճիւններով սկսեր էին , շուտով գրաւներն ոսկւոյ կը վերածին ու մեծ գումարներ կը շահուին ու կը կորսուին :

Տիկնանց քով ընդհանուր խօսակցութեան նիւթը՝ մեծ ընտանիքի վերաբերող յոյն

տիկնոջ մը իր ամուսինը թունաւորելու ոճրով ամբաստանութիւնն էր , որ նոյն օրն իսկ անմեղութեան վճռով մը վերջացեր էր :

Ամէնքն ընդհանրապէս կը բննագատէին երիտասարդ փաստաբան մը որ ներկայ էր հոն ու բառ մը չէր արտասաներ այս յարձակմանց դէմ . իր տաղանդո չարաչար գործածելուն մասին եղած դիտողութեանց դէմ ժւրիտով մը կը բաւականանար , ու լուռ , ժպտուն ու տխուր կը կանգնէր անչարժ վառարանին մարմարին կրթնած :

Այս երիտասարդ լակեացն , որոյ պերճակխօսութիւնը կ'ամբաստանէին , Տիգրանէր : Չորս տարի անցեր էր յորմէ հետէ սիրով , գրեթէ մոլութեամբ ընդգրկելով փաստաբանական ասպարէզն , հոն գտեր էր միայն այն մշտատեւ պայքարն որ իր դիւրայոյց ու մշտագրգիւ հոգւոյն անհրաժեշտ էր : Իր խորին ու լուրջ հիմնութիւնը , խիստ ու անաչառ դատողութիւնն , հզօր ու հըպարտ շեշտը , պերճ ու զարդարուն լեզուն շուտով մեծ անուն ու մեծ համբաւ տուեր էին անոր : Բազդատաբար քիչ միջոցի մէջ յաջողեր էր ձեռք բերել բարձր դիրք մը որ այս դժնդակ ասպարիզին մէջ հազուադիւր է :

Շատեր յուսահատ ետ քաշուած են եւ այս մշտատեւ կռուոյ կեանքն ամէն արա-

բաժնի ուժին չի համապատասխաներ : Տիգրան ընդհակառակն իր մթնոլորտը գտեր էր հոն , այս էր այն ասպարէզն զոր երեւակայեր էր միայն յարմար իր անհանդարտ ու դժգոհ ոգւոյն ու հոն իշխող ու հզօր ձայն մը վաստկեր էր մինչեւ իսկ այն բազմաթիւ թշնամեաց քով զորս ընկճելով ու յաղթելով ստացեր էր :

Հարկ էր գոհանալ այս յաջողութենէն որ կոյր բազդի մօ շնորհը չէր եւ որ դատական յաղթանակներով ձեռք բերուած էր :

Տիգրան՝ մասնաւորապէս պատժական գատերու մէջ անվիճելի իշխանութիւն մը ստացած էր . իւր հրաշքները մէկէ աւելի էին . կեդրոնական բանտին հիւրերէն որ մէկն իրենց կեանքն , որ մէկն իրենց ազատութիւնը կը պարտէին անոր : Իր անունը վերջին ապաւէնն էր որում ամբաստանեալն անհաւատալի վստահութեամբ կ'ապաստանէր եւ այդ անուն բանտին մէջ նուիրական էր , անոր մասին ամենափոքրիկ չարախօսութիւն ամենամեծ ոճիր մ'էր . երախտագիտութիւնն այն միակ ձեւացորդն էր զոր չարւոյ ու բարւոյ զգացում կորսրնցնող այս մեծ ոճրագործները դեռ կը պահէին իրենց սրտին մէջ :

Օր մը նորատի կին մը բերին հոն որ իր էրիկը թունաւորած լինելու ամբաստանութեան ներքեւ կը գտնուէր :

Կանանց յատուկ բանտը փոխադրուելէ առաջ առժամեայ կերպիւ առաջնորդեցին զինքն ընդարձակ , խոնաւ ու մթին սրահի մը մէջ , տխուր ու մահազգեցիկ օթեւան , ուր տարարողք կինը մազ մնաց վախէն պիտի մեռնէր : Իրեն բանտարկութեան ընկերուէր ամբաստանեալներ ու դատապարտեալներ . ահաւոր տեսարան մ'էր այս երկաթներով ծանրաբեռնեալ աւաղակներու խումբն որոց ամէն մէկ շարժումը շղթայից շառաչմամբ կը կրկնուէր , որ մէկն անփոյթ , զուարթ ու կայտաւ , որ մէկը տժգոյն , նիւհար ու դողդոջուն այս մահուան կապանքներուն տակ : Հոս պատանի ու գեղանի մարգասպան մը որ ութսունամեայ ծերունի մը սպաննած էր ու անոր ցոյց տըռած տարօրինակ դիմադրութիւնը զարմանօք կը յիշէր . հոն՝ երկար մօրուքով , վարդապետի դէմքով դրամանենգ մը , որ իրեն տրուած պատժոյն ծանրութեանը դէմ կը բողոքէր . անդին՝ աներկիւղ հրձիգ մը որ ազահովազութեան ընկերութենէն երկու հարիւր ոսկի կոյզելու համար ամբողջ թաղ մը կրալի տալու չէր վարանած . քիչ մը անդին երեք չորս անձինք՝ ծանօթներ ու մտերիմներ , որք միատեղ ապրելով բարեկամացած են եւ որք ապագայի պատրաստութիւններով ու արդարութեան ձեռքը

չի մատնուելու համար նորանոր միջոցներ մտածելով կ'ըզաղին . ասոնց մօտ ծերունի մը՝ որ պատժական դատարաններէ ստացած բազմաթիւ դատապարտութեանց շը-նորհիւ անփորձ իրաւագէտէ մ'աւելի պատ-ժական օրէնսդրութիւնը կը ճանչնայ . զորօրինակ նա կը բացատրէ նորեկներուն թէ դատարանին կողմէ ձրի փաստաբան մը պիտի ունենան , թէ ուրանալէ լաւագոյն պաշտպանութեան միջոց չ'ունին , թէ քննիչ դատաւորին բռնութենէն զանգատիլ հարկ է դատարանին առջեւ :

Նորեկ կիներ սոսկմամբ զատուիլ ուզեց այս մեղապարտ ընկերութենէն , բայց ամէնուն ծաղրն եւ յարձակումն իր վրայ հրաւիրեց . ամէնքը նախ եւ առաջ տեղեկանալ ուզեցին անոր ոճրին ի՛նչ ըլլալը :

— Թունաւորո՞ւմ մը , այդ բան մ'ըսել չ'է , կ'ըսէր անդիէն հռչակաւոր ստահակ մը , ցկեանս շղթայակապ աշխատութեամբ մը կ'ազատիս :

— 174^{րդ} յօդուածին վերջին պարբերութիւնը գիտե՞ս , գոչեց անդիէն ծերունի խորհրդատուն , կարծես քու վրայիդ ձեւուած է :

— Մեղք այդչափ գեղեցկութեանը , աւելցուց պատանի մարդասպանը , — մինչդեռ կինն ահաբեկ ու շուարած յիմարի

մը պէս իր շուրջը կը նայէր շարունակ , առանց բառ մը հասկնալու եղած խօսա-կցութենէն :

Նոյն միջոցին իմացուեցաւ այն անհաւա-տալի արագութեամբ որ բանտերուն միայն յատուկ է և որով ամէն հաղորդակցութեան միջոցէ զուրկ ամբոխի մը մէջ արտաքին բոլոր լուրերն անմիջապէս կը տարածուին , թէ նորեկ ամբաստանեալը Տիգրանի պաշտպանութեան յանձնուած էր դատարանին կողմէ :

Տիգրանի պաշտպանեալ լինիլը կիտով մը փրկուիլ եւ բանտարկելոց երաշխաւորու-թեան ներքեւ գտնուիլ կը նշանակէր :

Այն վայրկեանէն ամէնքը բարեկամ դար-ձան նորատի կնոջ ու զինքն յուսադրեցին :

Ամէնքը կը յիշեն այն տարօրինակ թու-նաւորման դէպքն որով նոր ամուսնացած յոյն վաճառական մը զոհ եղաւ Արնաուտ գիւղի մէջ : Կասկածները կը ծանրանային ա՛ր որ երիտասարդ ինոջ վրայ , որոյ թեթեւ վարքն ու առանց մի քանի ամիս սպասելու կրկին ամուսնութեան փորձը նոր ապացոյց բերել կը թուէին այս ոճրոյն : Կալաւաւոր-ման հրամանագիրը չ'ուշացաւ զգացնելու այս անպատշաճ փութաջանութեան բոլոր անխոհեմութիւնը :

Պիլսոյ ամէն ազգի ու կարգի մարդիկ ,

նամանաւանդ կանայք հետաքրքրեցան . օր-
ուան սովորական խօսակցութեան նիւթ
դարձաւ այս ձերբակալումն : Ամբաստանե-
լոյն սեռը , տարիքը , գեղեցկութիւնը , բար-
ձր դիրքը բացառիկ հանգամանք մը կուտա-
յին այս եղերական արկածին : Լրագիրներն ,
որ այս տեսակ ոճրագործութեանց երկ-
տողէ մ'աւելի չէին զոհեր , հարկ դատեցին
բոլոր դատաստանական քննութեանց վրայ
օր աւուր տեղեկութիւն հաղորդել իրենց
ընթերցողներուն :

Տիգրան , հետամուտ ամէն հռչակ հա-
նող դատաստաններու մէջ պաշտպանու-
թեան դերն ստանձնելու , ամբաստանելոյն
փոխանորդութիւնը խնդրեր ու ստացեր
էր . եւ ի՛նչ չ'եղաւ իր զարմանքին աստի-
ճանն երբ ձերբակալեալ կիներ ճանչցաւ .
այն մանկամարդ յոյն աղջիկն էր զոր 4-Յ
տարի առաջ այնքան յիմարութեամբ սիրած
էր : Ամուսնանալով իր հրապոյրը կորսնցու-
ցած չ'էր . միշտ մի եւ նոյն հրդեհող նայ-
ուածքը , մի եւ նոյն քնքոյշ , նուրբ ու մա-
տաղ հասակը , մի եւ նոյն ոսկեգոյն խոպո-
պիքն ու վարդաշուրթն բերանն էր զոր ու-
սանողն սյրքան , ո՛չ , այնքան եռանդեամբ
պաշտեր էր : Տիգրան զղջաց այս փոխա-
նորդութիւնն ստանձնելուն . ոճրին ապա-
ցոյցները բաղմաթիւ եւ հաղուագիւտ խը-

նամօք իրարու կապուած էին : Ընդհանուր
դատախազն արտասովոր խստութեամբ մը
յառաջ կը վարէր այս դատը . մի գուցէ
անլսելի ըլլար իր ձայնն և իր ձեռօք , բուն
իր ձեռօք կախաղանի մատնէր այդ պոչ-
տեցեալ գլուխը : Նախկին սիրոյ մը մնա-
ցորդ մոխիրը կ'արթննար ու կը բռնկէր .
թերեւս լաւագոյն էր ուրիշ պաշտօնակցի
մը յանձնել այս դժուարին պաշտպանու-
թիւնը . բայց որի՞ հաւատալ եւ որի՞ վըս-
տանիլ :

Հուսկ ուրեմն որոշեց խոյս չի տալ վը-
տանգի պահուն . այս դասալքութիւնն ի-
րեն չ'էր վոյլեր . պահ մը մոռցուած սէրն
արթննալ կարծեր էր . բայց ո՛չ , անձնա-
սիրութեան ու ետութեան զգացում մ'էր
որ զինքը դղրդեր էր միայն :

Անշուշտ ամէն մարդկային ու գերմարդ-
կային ջանք ի գործ պիտի դնէր փրկելու
համար նորատի կինը , բայց ո՛չ զայն պաշ-
տելուն համար , այլ միայն , ո՛վ մարդկային
ունայնութիւն , ճանչցնելու համար այդ
կնօջ որ իբր արհամարհած երիտասարդին կը
պարտէր իր կեանքը :

Տիգրան քաջութեամբ գործի ձեռք զար-
կաւ :

Դատաստանի օրը մօտ էր . Ոճրագատ Ա.
տենի սրահն հոն էր ուր կը գտնուէր այժմ :

— Դատավարութեան օրն հասաւ . խուռն բազմութիւն մը անոր ամէն մուտքն ու ելքը գրաւած էր, երբ Ոճրագատ Ատեանն իր հրապարակային նիստն սկսաւ :

Այն ատենուան լրագիրները գրեցին բոլոր այս դատին մանրամասնութիւններն : Ամբաստանելոյն հարցաքննութենէն ու վճարակայից տեղեկութիւններէն վերջն ոճրոյն ապացուցման եղանակը կը քննուէր : Տարօրինակ զուգադիպութեամբ Ընդհ. Դատախազի օգնականի պաշտօնը կը վարէր Խոսրով :

Պարզ դիպուածի մը բերմունքն էր թէ կանխորոշ վրէժխնդրութեան մը փափագն որ Տիգրանի դասընկերն այդ ավտուրին վրայ կը բազմեցնէր . ոչ ոք կրնար ստոյգը գտնել :

Միայն թէ դատավարութիւնն երկար ու մանրախոյզ եւ ամբաստանութեան ու պաշտպանութեան կողմէ հաւասար յամառութեամբ նշանաւոր եղաւ :

Խաւարային ու անծանօթ պալատ մ'էր որ տեղի կ'ունենար այս երկու մարդոց մէջ . ուսանողութեան կեանքի սիրային շնչին դիպուած մ'էր որ այս երկու բարեկամներն անհաշտ թշնամի դարձուցեր էին իրարու :

Մէկն իր սէրը պիտի պաշտպանէր, միւսն իր լքման ու մերժման հատուցումը պիտի պահանջէր :

Ընդհանուր Դատախազի օգնականն համառօտիւ թուելով ոճրին ապացոյցներն ու սպանելոյն երիտասարդ ու բարի ամուսին մը լինելն յիշեցնելով, մեծադոյն խստութեան մը հարկը կ'զգացնէր . ամէնքն անհամբեր կ'սպասէին զիտնալ թէ ի՛նչ էր պահանջած պատիժն . եւ այս անհամբերութիւն երկար չի տեւեց . Խոսրով իր խօսքը շուտով ամփոփեց . մէկ բառով մահուան պատիժ կը պահանջէր մեղապարտ կնոջ դէմ : Ամբաստանելոյն ո՛չ գեղն, ո՛չ երիտասարդութիւնը չ'էին ազդեր այս մարմարէ սրտին :

Արհաւիրակի լուծեամբ մը ընդունուեցաւ այս անլուր խստութիւն :

Խօսքը պաշտպանութեանն էր :

Իրիկուան ժամը 11 ն էր, սրահը մթընցեր ու գերեզմանի լուծիւն ու ամփոփում կը տիրէր չորս կողմը :

Տիգրան իր շուրջը նայեցաւ անգամ մը . թշնամի բազմութիւն մ'էր որ գինքը կը շըրջապտէր . ամբաստանելոյն յանցաւորութեան կանխապէս համոզեալ ատեան մ'էր որ իրեն պիտի ունկնդրէր : Չ'ըլլայ թէ անկարող լինէր փրկելու այս թշուառուհին . այս վախն անոր միտքը խանգարեց : Մահու ու կենաց վայրկեանն էր . ոտք ելաւ դրդողուն ու ամբաստանեալէն աւելի տոգունած :

Ամէն ոք իր շնչառութիւնը պահ մը կը րտ-
րեց աւելի աղէկ լսելու համար . ճանճի
բզկիւնը պիտի լսուէր հինգ հարիւր հոգիէ
աւելի խոնուած սրահի մը մէջ , երբ ծանր
ու հաստատ ձայնով փաստաբանն իր պաշտ-
պանութեան ճառն սկսաւ :

Անոնք որ լսեցին , յաւիտեան չը պիտի
մոռնան այդ ձայնն . ի՞նչ ըսաւ , ո՞ւսկից
սկսաւ եւ ի՞նչպէս վերջացուց , ի՞նչ կեր-
պով յաջողեցաւ պատուել , թօթափել այն
ծանր կասկածներու մթնոլորտն որու ներ-
քեւ ամբաստանեալը կ'ընկճուէր , ի՞նչ ձե-
ւով փանեց այն ատելութեան ամպն որ բո-
լոր ունկնդիրները կը գրաւէր . ոչ ոք պիտի
կարենար ճշդիւ զրուցել :

Նախ իրողութիւններն ու յետոյ օրի-
նական ապացոյցները քննելով , աննման յա-
ջողութեամբ եւ ջախջախիչ կերպով հերքեց
այն փաստերն , որոնք ճարտար կապակցու-
թեամբ մը՝ Ընդհ. Գատախտողին ատենաբա-
նութեան մէջ՝ ոճրագործութիւնն ապացու-
ցանելու կը յանգէին :

Բառերը , դաշոյնի հարուածի պէս սուր
ու կտրուկ , մի առ մի՝ կը զարնէին այն
կասկածներուն որոց կշիռէն կախումն ու-
նէր դատին ելլն :

Ու երբ իր հետախոյզ ակնարկը կրցաւ
համոզումը որոշել պահ մ'առաջ խոփուած

դէմքերուն վրայ , երբ ամէն ստուեր փա-
րատած տեսաւ դատաւորներուն ճակա-
տէն , այն ատեն յիշելով այն անհանդուր-
ժելի տառապանքն ու մահացումն որոնց
փափուկ ու սրտաբեկ արարած մը յուսա-
հատ քաջութեամբ մը դիմացեր էր , ար-
թընցնելով բանտի ու կապանաց այն ան-
ջընջելի օրերու յիշատակը , փաստաբանին
հպարտ շեշտը պաշտպանութենէ ամբաս-
տանութեան դարձաւ : Երբէք սրտայոյզ
ոճն այդքան խորին ու ուժգին չ'էր դժբը-
դած մարդկային սրտերն : Ամէնքը , քիչ մը
առաջ ամբաստանելոյն յանցաւորութեան
համոզուած , հիմա պատրաստ էին անոր
անմեղութիւնը վկայելու :

Կէս ժամ միայն տեսեց այս զարմանալի
պաշտպանութիւնն եւ կէս ժամ , դատաւոր
ու ունկնդիր , փաստաբանին ձայնին անբա-
ցատրելի հմայութեան տակ մնացին :

Գատախտողութիւնը վերջացաւ , երկբա-
յելի չ'էր տրուելիք վճիռն , եւ քառորդ մը
վերջն ամէնքն ակներեւ ուրախութեամբ
ստացան անմեղութեան վճիռ մը որ միա-
ձայնութեամբ տրուեր էր եւ որ ամբաս-
տանելոյն արձակումը կը հրամայէր , մինչ-
դեռ տարաբաղդ կինը վախէն ու յուզումէն
դողդոջուն սրահին մէջ կը նուաղէր :

Տիգրան չ'սպասեց չնորհակալութեան

ցոյցերու . ամէնէն մարուր ու ամէնէն բարձրը համբաւն ունեցաւ այս անլուր յաջողութեամբն . ուրիշ բան մը չ'էր պահանջեր . ինչպէս չորս տարի առաջ, հիմա ալ նոյնչափ հաստատ էր այս գեղանի կինը չի տեսնելու որոշման վրայ . իր մտացման վերջէն լուծեր էր . ուստի մեկնեցաւ առանց ետին դառնալու : Եւ ահա այս կերպով վերջացեր էր այն եղերական արկածն որ ողջոյն Պոլիսն յուզած էր եւ որ Գէորգ Էֆէնտիի սրահներուն մէջ, ինչպէս այլուր, տիրող խօսակցութեան նիւթն էր :

Սրահներն հետզհետէ կ'ողեւորէին, երեկոյթն իր ամէնէն մեծ փայլն ու զուարթութիւնն ստացեր էր . պարերն իրարու կը յաջորդէին, ու չի պարողները քարափին վրայ կամ ծովահայեաց սրահներուն մէջ կը շրջէին :

Տիգրան շուտով խոյս տուեր էր զինքն հալածող հետաքրքիրներէն . ամէնքն անոր բերնէն լսել կ'ուզէին այս սրտայոյզ տուածին մանրամասնութիւնները . Տիգրան սիրտ չ'ունէր անոնց հազարու մէկ հարցմանց պատասխանելու . առանձին ու կիսաստուեր սենեկի մը բաց պատուհանին մօտ երբերուն թիկնաթուռի մը մէջ տարածուեր էր ու ծովը կը դիտէր :

Յիրաւի զմայլիչ տեսարան մ'էր որ իր տրտում ակնարկին առջեւ կը պարզուէր :

Կէս գիշերը, ժամ մը կ'անցնէր, ու լուսինն իր լրման մէջ պայծառ ու կապոյտ երկնից կամօրին վրայ կը շողար . ծովն հանդարտ էր, ուր կ'անդրադառնար երկինքն իր կապոյտովն ու անհամար աստղերով . ամառուան այն անբացատրելի գիշերներէն մին էր որով Վոսփորն այնչափ դիւթիչ է : Բընութեան այս անդ որրութիւնն ու պարզութիւնը զինքն յափշտակեց, մտացաւ երեկոյթը, սրահը, բազմութիւնն ու երաժշտութեան վրդովեալ ձայներն . առանձնութիւն ու լուսութիւն կը տիրէր իր շուրջն . ամէնքն աշխարհիս մէջ կ'գրօսնուին ու զըուարթ էին . ինքը միայն մենիկ ու ապերջանիկ մնացեր էր :

Իր մանկութիւնն ու պատանեկութիւնն որրութեան, աղքատութեան ու աշխատութեան մէջ անցուցեր էր . հազիւ երիտասարդ, ամէնէն կանոնս թեւակոխած հրապարակային կեանքին մէջ ուր վաղաժամ այլ արդարացի համբաւ մ'իրեն կը հետեւէր, ափսոս, մէկը չ'էր ունեցած հազորդելու ու բաժնելու անոր հետ իր մշտայոյզ հոգւոյն վրդովմունքն : Իր հայրն ու մայրը գերեզմանէն միայն կրնային նայիլ իրենց միակ որդւոյն փառալից կենացն և չի

կար իր քով սիրեցեալ մէկն որու բանար իր հազար զգացումներով, յոյսերով, խանդաղատանօք լեցուած սիրտը : Սեղրաքի մահուընէ ի վեր մենակեաց, ծեր, դաժան ու վայրենի մէկը դարձեր էր . Սեղրաք շատոնց սեւ հողը կը ծածկէր զայն ու ինքը մինակ, բոլորովին մինակ մնացեր էր աշխարհիս վրայ :

Այս տխուր մտածումներուն մէջ էր երբ մերձակայ սրահէն դաշնակի մը վրայ քաղցր ու տրտում եղանակ մը կը բարձրանար, իբրեւ թէ ծովուն ալեաց վրայէն ու գիշերուան խորին լուսթեան մէջ, յամբ ու դանդաղ շեշտերով :

Չարմանք, այս եղանակն անծանօթ չէր Տիգրանին . անոր արտմահնչուն նուագէն ճանչցաւ թէ Սեղրաքի սիրած մէկ կտորն էր : Յուշեալ և անձկանօք ոտք ելաւ, հասկընալու համար թէ ո՞վ էր այն անձն՝ որ պարհանդէսին թնդիւնէն ու աղմուկէն խուսափած, առանձին սրահի մը մէջ կը դաշնակէր այս տխուր եղանակն՝ որ այնքան մօտէն իր գաղափարաց տրտմութեանը կը պատշաճէր :

Երիտասարդ ու վայելչագեղ կին մ'էր որ, առանց նոթայի, միայն իր յիշողութեան զօրութեամբ, այս դժուարին կտորը դաշնակին վրայ այնչափ կատարելութեամբ ու

հոգւով կը զարնէր : Ամուսինը, Տիգրանի ծանօթ պաշտօնատար մը, անոր մօտն էր, որ զինքը տեսնելով ըսաւ . « Սօտեցէք, սիրելի փաստարանս, կ'երեւի թէ դուք ալ ինձ պէս ժխորէ չ'էք ասորժիր, բայց իրաւունք չ'ունիք դուք, որովհետեւ դէռ երիտասարդ էք և զբօսնելու պէտք ունիք : Տիկին, աւելցուց, իր մանկամարդ կնօջ դառնալով, ահաւասիկ ձեզ կը ներկայացնեմ իմ ամէնէն աւելի յարգած բարեկամներէս մին, այն երիտասարդ փաստաբանն՝ որու անունը ամէնուն բերանն է . Տիկին Արամ էֆէնտի, աւելցուց երիտասարդին դառնալով : » Տիգրան դեղնեցաւ, դէմքը խիստ խոժոռ երեւոյթ մը առաւ ու կատարեալ բարեկրթութեամբ խոնարհութիւն մը ըրաւ իր բարեկամին կնօջ, բայց չի պատասխանեց : Աննախատեսելի դիպուածով դէմ առ դէմ կը գտնուէր այն միակ կնօջ՝ զոր յաւիտեան չի տեսնել ուխտած էր եւ Սուրբիկ կարդաց անոր խոժոռած գէմբին վրայ իր դժկամակութիւնը :

Երիտասարդ փաստաբանին համակիր մը տերմաց մէջ շատոնց ի վեր առաջին տեղը կը բռնէր Սուրբիկի ամուսինն : Անգէտ այն աղետաւոր պատմութեան որոյ իր կինն անողք դիւցազնուհին ու Տիգրանի բարեկամն անմեղ զոհն եղեր էին, եւ որ անշուք

ու մոռացեալ հողակոյտին մէջ ծածկուած էր, Արամ էֆէնտի առաջին տեսութենէն ի վեր անսահման համակրութիւն ունեցեր էր Տիգրանի համար: Գիտուն, ծանրաբարոյ, ինքնօգնութեամբ ձեռք բերած իր բարձր պաշտօնն, որու համար պահանջուած արժանիքէն աւելին ունէր, ծերունի պաշտօնատարը մեծապէս կը յարգէր անոնք որ իրեն պէս միայնակ ու անօգնական յառաջացած էին ընկերութեան դժուարամատչելի դասերուն մէջ:

Անկողմնակալ ու ձեռնհաս դատաւոր գործով ամէն արժանեաց ու կարողութեանց, մէկ նայուածքով գուշակեր, ճանչցեր ու գնահատեր էր երիտասարդին մեծ տաղանդն ու մեծագոյն ապագայն: Անոր ազատ ու հմտալից խօսուածքը սիրեր, կը զատ ու հմտալից խօսուածքը սիրեր, կը զատ ու հեգնող բառախաղութիւններէն ախորժեք ու վճռական ու ծայրայեղ դիտողութիւններն համաձայն գտեր էր իրեններուն:

Այսպէսով կազմուեր էր այն հաստատ բարեկամութիւնը զոր ամէն առթիւ ցոյց տուած էր երիտասարդին եւ որ քիչ քիչ հայրական գորովանաց փոխակերպեր էր: Արդարեւ Սուրբիկի ամուսինն հիմա յիսուելի մօտ պէտք էր լինիլ:

Միայն կարծես երիտասարդը չէր ճանչ-

ցած լիովին անոր մտերմութիւնը. միշտ յարգալից այլ միշտ քաշուած՝ չէր պատասխանած անոր համարձակ անկեղծութեամբը: Զորօրինակ իր անթիւ թախանձանաց վրայ բնաւ չէր գացած անոր տունը. եւ չէր ճանչցեր անոր բնտանիքը:

Տիգրան այն գիշերն առաջին անգամ լինելով կը պատահէր այս կնոջ: Ինքնիրեն երեւակայեր էր երբեմն զայն գեղեցիկ, շատ գեղեցիկ ու նոյնքան վատ ու անմիտ: Այս տեսութեան մէջ Տիգրան իր դատողութիւնը մասամբ միայն կրցաւ հաստատել. յիշաւ գեղանի կին մ'էր երիտասարդութեան ու վայելչութեան բոլոր հրապոյրներովը, բայց չի կրցաւ անոր խօսակցութիւնը սեթեւեթ ու սնտի վճռել. ընդհակառակն պարտաւորեցաւ ինքնիրեն խօստովանիլ թէ լաւագոյն ընկերական դասուն մէջ հազիւ անոր մի քանի նմանեաց հանդիպեր էր: Սակայն Տիգրան անձնատուր չ'եղաւ այս նպատակով դատողութեան՝ զոր առանց կամենալու կազմեր էր. նրբբամիտ, հրապուրիչ եւ խելացի կին մ'էր թերեւս, բայց երբէք Տիգրան չէր կրնար մոռնալ այն տարաբողբ վերջաորութիւնն՝ որ իր թշուառ բարեկամին վիճակեր էր: Ուստի կծու ու խրոխտ կերպով պատասխանեց անոր, եւ իր խօսքերով զա-

չոյնի հարուածէ աւելի խոր արիւնեց անոր սիրտն, առանց սակայն բառ մ'արտասանելու անցելոյն վրայ:

Մանկամարդ կլինը խռովեցաւ, այլ չ'ընկձեցաւ. Տիգրան արցունքի կաթիլ մը նըշմարեւ կարծեց անոր գեղեցիկ աչքերուն մէջ երբ անհաստատ ու ուխտադրութ աղջըկանց ակնարկութիւն մ'ըրաւ:

— Որչափ ալ խիստ ըլլայ ձեր վճիռն, ըսաւ Սուրբիկ տրտութեամբ, ես զայն անիրաւ համարողներէն չ'եմ: Որչափ ալ անփորձառու աղջիկ մը լինի ուխտադրութ անձն, անոր յանցանքն ո՛չ ոք ինձմէ աւելի անքաւելի կը դատէ. ուրիշ մը իմ տեղս կրնար ձեզ պատասխանելով ըսել թէ դէպքերը կամեցողութեանէ զօրաւոր են, թէ նորատի աղջիկ մը, ենթակայ ամէն տեսակ ճնշմանց, գուցէ ամէնէն տկար էակն է պատահմանց զիմագրաւելու համար ու պէտք չ'է մէկ յանցանքով մ'ուրանալ անոր ազնիւ զգացումներն. ո՛չ, ես ասոնց եւ ոչ մին կ'ըսեմ. ամէն յանցանք իր պատուհասն իր ծոցին մէջ կը կրէ. ի՞նչ հարկ անգութ ու անողորմ լինել յանցաւորին դէմ երբ ձակատագիրն ամէնէն աւելի անողորմ է անոր: Պէտք է մոռնալ, այո՛, յաւիտեան պէտք է մոռնալ զայն, քան թէ խոր քննել անոր ողորմելի կացութիւնը: Թերեւս ան-

գութ մնալու սիրտը չ'ունենաք եւ կարեկցութեան արժանի դատէք թշուառուհին:

Տիգրան այս լեզուին չ'էր սպասեր. կարծեր էր թէ Սուրբիկ ինքզինքը պիտի պաշտպանէր իր յարձակմանց դէմ. սխալէր էր. նա այնպիսի բարձր ու վսեմ մտածութիւններով պատասխանեց որ Տիգրան բառ մը չի գտաւ աւելցնելու:

Յիրաւի նշանաւոր մէկն էր այս կլինը, նորա զգացմանց բարձրութիւնը չի ճանչնալ կարելի չ'էր: Խօսք մը չի գտաւ պատասխանելու. թերեւս ունէր շատ ըսելիքներ, բայց ամուսնոյն ներկայութիւնը կ'արգիլէր աւելի յառաջ երթալ. ուստի խօսակցութեան նիւթը փոխեց:

Տիգրան իր պաշտօնին ու ասպարէզին բերմամբ մարդուս հոգեբանական զգացումը, զօրութիւնը, տկարութիւնն եւ բարեւը մը ճանչցող և ուսումնասիրող մէկն էր:

Չորմանօք դիտեց այս դեռատի ու գեղանի կինն՝ որոյ արտաքին վայելչութեանը վրայ կ'աւելնար բարձր գաստիարակութիւն մը: Տարօրինակ գազտնիք մ'էր անշուշտ, որ այսքան կատարելութեամբ օժտեալ կին մը թերանար ամենանուիրական խոստամունքի մը մէջ ու սովորական խաբերայ մը լինէր: Իգական սեռին յատուկ տկարութիւն մ'էր

այս թէ հրեշտակի կերպարանքին ու ձեւերուն ներքեւ ծածկուած վատթարագոյն էակ մ'էր իր դէմինը :

Երեկոյթը վերջանալուն Տիգրան աճապարեց ամէնէն առաջ խոյ տալու , բայց այցելութեան խոստում մը չի տուած՝ իր ծերունի բարեկամին ձեռքէն չ'ազատեցաւ :

Յուզեալ ու խռովեալ զատուեցաւ . իր համուզումը ծանր հարուած մը կրեր էր այն գիշեր : Մինչեւ այն օր անարժան արարած մը նկատած անձը լաւագոյն եւ ազնուագոյն զգացումներու տէր մէկն երեւցաւ իր աչքին . ի զուր ջանաց մաքառիլ այս տգաւորութեան դէմ , ի զուր ջախջախիչ ապացոյցներ որոնեց ու գտնել կարծեց անոր դէմ , ի զուր իր տարաբաղդ բարեկամին սրտակտուր վախճանը յիշեց . սիրտն ու համոզումն ապստամբ մնացին մինչեւ վերջը :

Թերեւս Սուրբիկ բռնութեան մը զոհն էր , թերեւս հնազանդութիւնը բարձրագոյն ու գերագոյն հարկ մ'էր անոր ամուսնութեան միջոցին : Ո՞ր դիտէ , ամէն ենթադրութիւն ներքի էր . խոստովանեցաւ ինքնիրեն թէ առանց անգամ մը խօսեցուցած լինելու այս կիսն , արդարացի չ'էր վերջնական կերպիւ զատապարտել զայն : Այցելութիւն մը խոստացած էր . կրկին

տեսութեան պէտքն ու յոյսն զգաց . սակայն չի կրցաւ բնանալ այն գիշեր , խառն ի խառն երազներ իր նիրհը վրդովեցին . իր ցնորքներուն մէջ պահ մը կը տեսնէր Սեդրաբ ցուրտ ու խոնաւ վարձու սենեկի մէջ առկայծ կանթեղի մը լուսով աշխատող , պահ մը կը յիշէր զայն երբ իր պաշտօնատեղիէն կը վերադառնար առանց կարենալ հաւատալու զեռ իր դժբաղդութեան մեծութեանը , կը տեսնէր զայն տոճոյն ու դողդոջուն երբ անոր սիրուհին իր նորապսակ ամուսնոյն թեւին յենած խրոխտ ու հպարտ անոր առջեւէն կ'անցնէր :

Շարաթ մը տեսեց իր այս անհանգիստ կացութիւնն . ի վերջոյ որոշեց այլ եւս չի մտածել այս մասին . ի՞նչ փոյթ իրեն թէ այս կիսը բարի կամ չար արարած մ'էր . իր բարեկամը մեռած եւ այս կիսն ամուսնացած էր . լաւագոյն էր մտնալ այս աղէկը . տուր պատմութիւնն որ իր երիտասարդութեան տարիներուն հետ այնքան սերտ կապակցութիւն մ'ունեցեր էր : Իրեն չ'էր իյնար դատաստան ընել ու վճիռ տալ :

Բայց այս առաջադրութիւնը չի կրցաւ գործադրուիլ . հա՞րկ էր արդեօք իր բարեկամին կենացը մէջ խաղացած տխուր դերին վերագրել այս կնոջ յիշատակը մտնալու անկարելիութիւնը , չ'էր գիտեր . բայց

սա ճշմարիտ էր որ անոր հետ ունեցած տեսակցութիւնն անջնջելի կերպով արմատացած մնաց իր մտքին մէջ . անոր շարժմունքը, ձեւը, խօսուածքը, ձայնն աչքին անջեւն էին շարունակ . «Թերեւս դուք ալ անգուծ լինելու սիրտը չ'ունենաք ու կարեկցութեան արժանի դատէք թշուառուհին» ըսած էր Սուրբիկ իր անձին ակնարկութիւն մ'ընելով :

Յիրաւի թշուա՞ն էր արդեօք . եւ ինչո՞ւ համար : Բայց ինք ի՞նչ կը հետազօտէր անոր ընտանեկան կեանքն , ի՞նչ կը վերաբերէր իրեն . թշուառ կամ երջանիկ , անոր գլխոնալիք բանն էր . ո՛չ սակայն , պէտք էր իմանալ թէ այդ յանցաւոր կինը գոնէ խղճի խայթ մը չ'ունէր . այս հարցումները բուրն ինքնիրենն ըրաւ եւ իր անհանգիստ հետաքրքրութիւնը մեղադրեց , բայց չի կըրցաւ մէկդի ընել : Կրկին տեսակցութեան մը ակնկալութիւնը դամ զգամ զորացաւ իր սրտին մէջ . ամէն օր կ'որոշէր այցելութիւն մ'ընել եւ ամէն օր կը յապաղէր . օր մը մինչեւ Սուրբիկին տան մօտերը գնաց ու չի համարձակեցաւ դուռը զարնել , եւ ետ դարձաւ :

Այն ատեն երկշտ անձկութեամբ մը իր սիրտը քննեց ու մէկէն խորին և յայտնի կարեկցութիւն մը , համակրութիւն մը նըշ-

մարեց այս կնոջ մասին . կարեկցութիւն . . . անշո՛ւշտ , ուրիշ ի՞նչ կրնար ըլլալ . . . ու վախցաւ , ամչցաւ թերեւս ինքնիրեն իր յիմար սէրը խոստովանելու : . . . :

Ի՞նչ , սիրե՛լ այն կինն՝ որ իր միակ մըտերմին ատեն մը սիրուհին էր ու հիմա իր ամէնէն աւելի յարգած անձին ամուսինն էր : Տիգրան իր յանցանքին մեծութենէն սարսափեցաւ . խղճմտանքն ու պարտականութիւնն իրենց խիստ եւ որոշ ձայնը լսեցուցին : Տիգրան ինքզինքէն խոյս տալ ուզեց իբրեւ մեծագոյն շարագործէ մը , ինքզինքը յանդիմանեց , պարսաւեց . ո՛չ , ինքն այնչափ վատ մը չ'էր եւ չ'էր կրնար լինիլ , անտարակոյս խաբուած էր իր ճանաչողութեան մէջ . սիրե՛լ , ո՞ւսկից գտեր էր այս յոռի գաղափարը :

Ահաւոր ու երկարատեւ պայքար մը տըրուեցաւ իր հոգւոյն մէջ , քարսիրտ և օտարական բժիշկի մը պէս ինք անձամբ քննել ուզեց իր վէրքին ծանրութիւնն եւ պարզապէս մահացու և անբժշկելի գտաւ զայն : Աւ երբ համոզուեցաւ որ այս կինն իր ճակատագրին կ'իշխէր , երբ ճանչցաւ թէ իր սէրն ուրանալն անօգուտ էր այլ եւս , այն ատեն իր ցնորած մտքին մէջ իր պարտականութիւնը փնտռեց ու չի գտաւ :

Անշուշտ յանցաւոր մ'էր , ո՛ր եւ է գը-

թուժեան անարժան յանցաւոր մը այս կինը սիրելուն՝ որ պէտք էր իրեն համար կըրկնակի նուիրական ըլլալ :

Այս անակնկալ ու դժբաղդ սիրոյ հետեւանքը բոլոր իր արհաւիրակց ու կսկծակց պարագայներովն երեւցաւ իր աչքին :

Ինքն՝ որ այնքան յաջողակ էր ուրիշները պաշտպանելու արուեստին մէջ, զարմացաւ որ ինքզինքն արդարացնելու բան մը չէր գտներ . յանկարծ սպառնակից ստուեր մը տեսնել կարծեց . . . Սեղբաքն էր որ իր բարեկամութեան համարը կը պահանջէր իր մէ : Ո՛չ, փրկութեան ճամբայ մը չի կար, եւ անգութ դատաւորի մը պէս ինքն ամէնէն ծանր պատիժը տնօրինեց իր անձին :

Անձնասպանութեան գաղափարը պահ մը անխուսափելի յամառութեամբ մը իր միտքը պաշարեր էր : Տիգրան Ժան - Ժաք Ռուսոյի աշակերտ մ'էր եւ պարելու քաջութիւնն ունեցաւ . մեռնիլը վաղ կամ անագան դրած էր, հարկ չէր դայն փութացընել, որոշեց միայն այլ եւս չի հանդիպիլ այս կնոջ ու թէ որ անկարելի անոր պատկերն իր յիշատակէն ջնջել, թէ որ անհնար էր մոռնալ անոր ներդաշնակ ձայնը, լաւ ուրեմն, ինքնիրեն միայն պիտի քաշէր ան ծանօթ ու մէկ սրտի մը մէջ միայն ամփոփուած սիրոյ մը բոլոր դառնութիւնն եւ

այլ եւս չը պիտի տեսնար Սուրբիլը :

Անտարակոյս տխուր ու գովելի քաջութիւն մ'էր այս հաստատ որոշումն որ միայն կրնար համաձայնիլ խստասպահանջ պարտականութեան մը ձայնին :

Տիգրան Սուրբիլի բնակած գիւղին մէջ բայց հեռաւոր արուարձանի մը մէջ կը բնակէր : Այս հեռաւորութիւնը բաւական չը համարեց . փողոցին մէջ, շրջագայութեան մէջ, այցելութեանց մէջ կրնային իրարու հանդպիլ ու Տիգրան փախստական ոճրագործի մը շտապաւ հեռացաւ այդ տեղերէն ու Պէոյիւք - Տէրէ գնաց բնակելու :

Բայց տարաբաղդը չէր հաշուած այն դժբերակ փորձին բոլոր ծանրութիւնն՝ որու դատասպարտած էր իր կեանքը : Սուրբիլը տեսնելու բոլոր յոյս ու ակնկալութիւն վերջանալուն հետ ճանչցաւ իր սիրոյն ու տառապանքին մեծութիւնը :

Ամէն ինչ ի գործ գրաւ մոռնալու համար եթէ ոչ իր սէրը, գոնէ իր անձը . նոր եռանդով մ'ընդգրկեց իր մրկակից ասպարէզը, բայց զգուանք ու տաղտկութիւն գըտաւ հոն՝ ուր ատեն մը ամէնէն մաքուր գոհունակութիւնը կը գտնէր . աննպատակ երեւցաւ կեանքն ու մաքառելէ ձանձրաբացաւ : Մի քանի տարուան մէջ բաւական հարստութիւն մը ձեռք բերեր էր, որոշեց

գործէ քաջուիլ եւ ալ զայն խիտ քիչ ան-
գամ տեսան դատավարութեանց մէջ :

Ատեն մը ամէն մտային աշխատութիւն
դադրեցուց , իր աշխատութեան սենեակը
ոտք չի կոխեց , գրական ամէն պարագում
վերջացուց . եւ ուղեց ձեռքի աշխատու-
թիւններով իր անձը յողնեցնել ու դբաղե-
ցընել . իր ծովեզերեայ տան պարտէզին մէջ
օրն ի բուն կը տեսնէին զի՞քը՝ որ տոկուն
գործաւորի մը պէս կ'աշխատէր . ի՞նչ կը
մտածէր արդեօք երբ խոնջած ու քրտնա-
թոր հանգիստ կ'առնուր ծառի մը տակ ,
ակնարկը սեւեռած ծովուն երեւածուփ կո-
հակաց վերայ : Իրիկուն դէմ շրջագայու-
թիւն կ'ընէր հետիոտն կամ ձիով , կ'երթար
որչափ որ կարելի էր հեռուն երթալ , բայց
նախամեծար կը համարէր ամայի ու խոպան
վայրերը . բազմութիւնը զինքը կը զայրա-
ցընէր ու ամէն մարդկային ձայնէ իբր փլա-
սակար ու շարագուշակ հնչիւնէ մը կը խու-
սափէր :

Անցան քսան ամիսներ այս տրտում եւ
անսփոփ կեանքով . դարունը կը յաջորդէր
ձմեռուան ցուրտ ու խոնաւ օրերուն , օ-
դերը պայծառացան , Վոսիորի ափունքը
դալարեցան ու դեղեցկացան , եւ ամառ-
ուան սոփորական հիւրերը Պէօյիւք - Տէրէ

վերադառնալով նոր ոգեւորութիւն մը բե-
րին այս պահ մը ամայացած եղերքնե-
րուն :

Տիգրանի Պէօյիւք - Տէրէյի մէջ բնակած
տան կունակը , քիչ մը աւելի վեր , ամառ-
ուան համար ուրիշ կոկիկ ու փոքրիկ բէօջ
մը կար պարտէզներու մէջ առանձնացած :
Այս բէօջը բաւական ժամանակէ ի վեր
պարսպ՝ հինցած ու տխուր երեւոյթ մը
ստացեր էր . անոր տէրերը կենդանութեան
նշան ցոյց տուած չէին եւ ոչ իսկ անգամ
մ'այցելելու եկած այս սիրուն բնակութիւնն
որ ճաշակի տէր մարդու մը ստացուածքն
էր անշուշտ : Տիգրանի տան ետին , աւելի
բարձր ու բոլորովին ծովահայեաց դիրքով ,
ընդարձակ ու զառիվեր պարտէզի մը մէջ ,
վայրի շագանակի ծառերէ կազմուած նեղ
ու խորհրդաստուեր ուղիներով , առջեւն
հարթ ու ուղիղ , ուր 6 - 7 հատի չափ տե-
րեւախիտ ու հովասուն ծառեր շուք կու-
տային եւ որ կարծես ծովուն մէջն էր , այս
մենակեաց բնակութիւնը մարդատեսաց՝ բայց
բնութեան գեղեցկութիւն ճանչցող մար-
դու կը վայլէր : Անոր զմայլելի տեսարանը
նոյն իսկ Վոսիորի մէջ չէր գտնուեր . մէկ
կողմէն մինչեւ Սեւ ծովու փոթորկեալ ա-
լիքն , միւս կողմէն Սսիական եզերքն իր
դալարեալ բուրաստաններով , Պէյքօզէն

մինչեւ Քանտիլի, ահա անոր հազուադիւտ
ու աննման տեսարանը :

Ամառուան սկիզբները շարժում մը տես-
նուեցաւ այս լռին ու լքեալ բնակութեան
մէջ : Նորոգութիւն մը կը կատարուէր հապ-
ճեպ ու փութաջան գործաւորներով : Մէկ
երկու շաբթուան մէջ, պարտէզը խնամով
չտկուեցաւ, քէօջը նորոգուեցաւ, ներկը-
ուեցաւ ու կահաւորուեցաւ : Տիգրան՝ զը-
րացի մը ունենալու հաւանականութիւնը
գրեթէ ուրախութեամբ տեսաւ : Երկու
տարուան առանձնութիւնը զայն կերպա-
րանափոխ ըրեր էր : Մշտտեւ տխրութիւնն
ու անոքութիւնը կրնային ծանր հետեւու-
թիւններ ունենալ եւ Տիգրան առանց աղ-
մըկալից ընկերութեան մը մէջ նետուելու,
իրեն պէս առանձնասէր ծանօթի մը հետ
տեսութեան պէտքը կ'գգար :

Քանի մ'որ վերջը քէօչիին նոր տէրերը
փոխադրուեցան : Տիգրան դեռ չ'էր տեսած
զանոնք եւ գիշեր մը ճաչն վերջը՝ ծովուն
վրայ նայող սրահին մէջ բուսաբանութեան
գիրք մը կը թղթատէր որ Հարաւային-Ամե-
րիկայի ճոխ ու հարուստ բուսոց ու ծա-
ռոց վրայ կը խօսէր, երբ իր ծեր սպա-
սաւորը նոր դրացիներուն այցելութեան ե-
կած լինիլն իմացուց : Տիգրան դիմաւորեց
զանոնք :

Արամ էֆէնտին, իր տիկինը, երկու
փոքրիկ հրեշտակներ, ասոնք եղան Տիգրա-
նի դիմաւորած անձինքն :

Ո՛ւսկից, ի՛նչ կերպով եւ ի՛նչ դիպուա-
ծով Պէօյիւքտէրէ ու իրեն այնքան մօտ ե-
կեր էին : Ամենամեծ յուզմանց մէջ անգամ
երիտասարդն ինքիրեն տէրն էր . իր վեր-
դովումն երկար չի տեւեց ու կատարեալ
ազնուութեամբ իր հիւրերը մեծարեց :

Արամ էֆէնտի միշտ միեւնոյն գորովա-
լից ու մտերմասէր անձն էր . հօր մը խան-
դաղատանօք Տիգրանը տեսնելուն ու այն-
քան մօտ դրացի ունենալուն ուրախութիւնն
յայտնեց : Բայց ի՛նչ փոփոխութիւն իրեն
վրայ . երկու տարուան մէջ բոլորովին ծե-
րացեր ու ինկեր էին . մաղերը ձերմկցեր,
ձակատը խորչուեր ու տեսութիւնն եւ լսո-
ղութիւնը տկարացեր էին . միայն անոր հը-
զօր միտքը մնացեր՝ թերեւս առաջուընէ ա-
ւելի զօրաւոր : Պաշտօնէ հաներ էին զին-
քը . նախանձաբեկ հայ սրաշտօնեայնէր՝ ի-
րեն մեծ գիրքին հետամուտ՝ չ'էին վարա-
ներ մուր բռելու անոր մաքուր ու անբիծ
պաշտօնավարութեան վրայ ու անխորհուրդ
որոշում մը՝ առանց ըննութեան՝ վտարեր էր
զայն բաղաբական ասպարէզէն :

Արամ էֆէնտի պաշտօնի համար հոգի
տուող մարդ չ'էր բնաւ . առանց բողբեջու ,

առանց գանգատելու, սակայն իր անմեղութիւնն անվիճելի կերպիւ հաստատելէ վերջը, գրեթէ գոհութեամբ ձգեր էր իր պաշտօնն որոյ համար իր ակարութիւնն ու հիւանդոտ վիճակն արգելք էին: Նախարարաց խորհուրդը շուտով համոզուեր էր անոր անմեղութեանն եւ յարմար հանգըստեան թոշակով մը վարձատրեր էր այս խելացի պաշտօնէին քսան տարուան ծառայութիւնը, մինչդեռ Փարիզի մէջ գտնուող մեծանուն հայազգի հարուստ մը, վաղեմի բարեկամ մը՝ որուն կը վերաբերէր այս քէօջըն, անոր արամադրութեան ներքեւ գրած էր զայն:

Սրամ էֆէնտի անկեղծ հոգածութեամբ Տիգրանի վիճակն հարցուց ու իր երկու փոքրիկ զաւակները ներկայացուց որոնց մեծը գրեթէ եօթը տարեկան կայտառ ու զուարթ մանչ մը եւ միւսը չորս տարեկան փափուկ ու զեղանի մանկուհի մ'էր: Սուրբիկ միայն անփոփոխ քնացած էր. ոչ սակայն. ծանրութեան հով մը կար անոր վրայ. բայց իր հրաշալի գեղեցկութիւնն աւրուած չէր. այն երեւակայական կիներն էր միշտ զոր երկտասարդն իր ցնորքներուն եւ երազներուն մէջ կը տեսնէր ու կը պաշտէր. բուրում մը կար անոր վրայ կարծես հրապոյրի, հեշտութեան ու եր-

ջանկութեան որ իր շուրջը կը ծաւալուէր. Սուրբիկի գտնուած տեղն հմայիչ ու անբացատրելի մթնոլորտ մ'էր եւ անոր մօտն, այնքան մօտն ապրելու ստուգութիւնը Տիգրանն յիմարեցնելու շափ անհաւատալի երջանկութիւն մ'էր:

Սակայն Տիգրանի այս տպաւորութիւնն՝ այն վրդովեալ յուզումը չ'էր որ զինքն ալեկոծեր էր այս կիներն առաջին անգամ տեսնելուն: Այս անգամ գոհունակութեան, անդորրութեան ոգի մ'էր որ իր մտածութեան մէջ կ'արթնար: Վտանգալից ապագայ մը չի տեսաւ որ զինքը վախցնէր, այլ հեզ ու հանդարտ տեսութեան մը վայելքն որ իրեն պիտի բաւէր: Այս գիտուն, ծերունի ու բարի ամուսինն, այս նորատի ու գեղանի կիներն, այս երկու պաշտելի հրեշտակներն, այս ամէն ինչ ընտանեկան կենաց դրախտն էր անշուշտ եւ ինքն, այո՛, ինչո՞ւ չ'ըլլար, մտերիմ, անձնուէր ու առաքինի բարեկամ մը պիտի լինէր հոն. որդւոյ մը պէս կը ս'ընէր ու կը յարգէր այս ընտանեաց տէրն ու եղբօր մը պէս, միայն եղբօր մը պէս, պիտի սիրէր անոր կիներն: Այն ատեն երեւակայեց իր կեանքը՝ ցայնժամ դառնութեամբ լցուած՝ որ յանկարծ երանութեան հորիզոններով կը վերաբացուէր:

Վստահութիւն և ապահովութիւն զգացիր անձին վրայ ու այս արամադրութեամբ իր մտերմութիւնն ու գործը կրցաւ ցոյց տալ այն ընտանեաց ուրիշ մինչեւ այն օր խոստափած էր . անոր զաւակներն անհուն համակրութեամբ ընդունեց եւ փոքրիկ մանուկներն իրենց նոր բարեկամին կապուեցան այն անսխալ համոզմամբ որով տղայք անմիջապէս կ'որոշեն զիրենք սիրողն ու չը սիրողն :

Սյուպէսով Տիգրանին կեանքը պատող մատախուղը փարատեցաւ եւ զուարթութեան արեւը նորէն փայլեցաւ անոր խընդուն երեսին վրայ : Երիտասարդն ի բնէ ուրախութիւնը սիրող էր . երջանկութեան հեռանկարն իր սիրտն անասման բերկրութեամբ լեցուց . բանի մը փափաքող չ'էր այլ եւս ու գուցէ աշխարհիս վրայ միակ գոհ ու երջանիկ անձն էր : Հաւատքն ու համոզումն՝ աշխատութեան կարօտ չ'են գոյանալու համար : Տիգրան զգաց քան թէ որոշեց այս բոլոր խորհուրդներն . ապագային տեսարանը մանրերկրորդի մը մէջ պարզեցաւ իր աչքին առջեւ իր բոլոր պայծառ գոյներովն ու իր ամբողջութեամբ եւ Տիգրան աներկմիտ ու անկասկած հաւատաց անոր :

Ի՞նչ է արդեօք մարդկային սրտին գաղտ .

նիբը . ժամերով, շաբաթներով, ամիսներով քննած ու անթափանց համարած ստուերները մէկ վայրկեանի մէջ անհետացան ու Տիգրան զարմացաւ որ այս գեղանկար երկինքը չ'էր նշմարած մինչեւ այն ժամը :

Սոջի տեսութենէն՝ մտերմութիւնը կատարեալ եղաւ ու խօսակցութիւնը՝ զոր Տիգրան այնքան քաջ գիտէր արտօժելի դարձրնել, մինչեւ գիշերուան վեց երկարեցաւ . բաժնուեցան ամէն օր տեսնուելու խոստմամբ :

Տիգրան մինակ մնաց . ի՞նչ զարմանալի ու անակնկալ դիպուած . — ո՛ւսկից ո՛ւր ճակատագիրն առաջնորդեր էր այս կինը՝ զոր չի տեսնելու համար ամէն ինչ ի գործ դրեր էր . բայց նախախնամութեան կամքն իր կամքէն վեր էր հարկաւ : Երկու տարուան մօտ ժամանակ մ'անցունելը մեծապէս օգտած էր իր տենդայոյզ տաքնապաց ամբուելուն :

Տիգրան ինքզինքը քննեց ու առանց վարանման յայտարարեց թէ բժշկուած էր անդամանելի կարծած հիւանդութենէ մը : Սուրբիկի տեսքը նոր կեանք ու կենդանութիւն տուեր էր անոր . նոր մարդ մ'էր որ աշխարհ կուգար առողջ ու ազատ, առանց նախորդին տկարութեանց :

Ուստի անվախ ու անբոյթ պիտի ապրէր

այն կնոյ մօտ եւ յիմարական տենդեր չի պիտի կրնային գալ վրդովելու իր անդորր էութիւնը :

Այս երաշխաւորութեամբ հաստատուեցաւ այն սերտ բարեկամութիւնն որ երկու զբաղիները գրեթէ միացուց :

Այս ընտանութիւնն սկսաւ բարեբաստիկ գոյներով . Արամ էֆէնտի , ըիչ մը հիււանդոտ ու տկար , մեծ բարւոքում մը գըտած էր այս օղափոխութեամբ . իր կինը միշտ ամուսնոյն մօտ , անոր բոլոր հանգըստութեան եւ իր որդւոց կրթութեան նըուիրուած , ու Տիգրան որ զուարթ ու խընդունւերես այս առանձնասէր ընտանեաց ոգեւորութիւն կուտար ու անոնց միօրինակ կենցաղավարութեան արտմութիւնն ու ձանձրոյթը կը փարատէր :

Օրական զբաղումնին գրեթէ միեւնոյնն էր . առաւօտուն կանուխ , գրեթէ արշալոյսին հետ կ'ելնէին . երբեմն Տիգրան էր որ այգուն այգուն քէօլին գուռը ձեռք կ'առնուր ու երբեմն իր զբաղիներն՝ որ երիտասարդը կուգային արթնցնել ու անոր ծուլութիւնը մեղադրել . նախաճաշի ու ճաշի տեղերն որոշուած էին անպատճառ առջի իրիկուրնէ . մերթ անտառուտ ու ստուերամած մէկ կողմն էր իրենց պարտիզին մէջ ուսկից կը դիտէին արեւուն ծագումն հան-

դարտ Վասիորի ջրերուն վրայ , մերթ Պէյբօզի մէկ եզերքն ամայի ու անխռով ծառի թփի մը տակ . ցերեկը՝ ճաշէն վերջն ընթերցանութիւն մը կ'ընէին նոր հեղինակի մը ու յետոյ ջուրերը կ'երթային , մասնաւորապէս Քէթանէ-Սուլին որ խորհրդաւոր ու նսեմաստուեր անտառի մը մէջ պայծառ ու անոյշ ջրի աղբիւր մ'է ու Եէնի-Մահալէցի բնակչաց մի զբօսավայրը . գիշերն երբեմն Պէյօլիւր-Տէրէի գեղեցիկ բարափին վրայ չըջագայութիւն մը կամ ծովուն վրայ կոնտորով պզտիկ պտոյտ մը եւ երբեմն ծովեզերեայ տան սրահին մէջ խօսակցութիւն մը պատուհանին քով լուսնի լուսով . ահա այս անձանց հաճոյքն ու անցուցած կեանքն :

Այ իսկ բառ մը , խօսք մը կամ ակնարկութիւն մ'անցելոյն այս ներդաշնակ երանութեան մէջ . Տիգրան ամէն բան մոռցած էր . Սուրբիկի հետ իր գորովը՝ եղբայրական անկեղծութեամբ ու համարձակութեամբ մը կը յայտնուէր եւ նորատի կինը միեւնոյն անկեղծութեամբ ու համակրութեամբ կը տեսնուէր իրեն հետ :

Մտերմութիւնն այնչափ յառաջ գնաց որ օր մը Սուրբիկ Տիգրանի անցեալ օրերը քննել ուզեց :

— Ոչ ոք չ'է՞ սիրած մինչեւ այս տա-

րիբը, Տիգրան, հարցուց անոր: քեզի պէս
անհանդարտ մէկը չ'եմ կրնար եւթադրել
որ անտարբեր կամ անփոյթ մնացած լինի
մինչեւ հիմա, աւելցուց խնդալով. նեղա-
նայս կամ չի նեղանաս հոգս չ'է, տեսնե՞նք
պատմէ՛ մեզի քու յաջողութիւններդ ու սի-
րային արկածներդ:

— Ի՞նչ կը հասկնաս սիրային արկածը—
սելով. թէ որ այն խաբեբայ զրախօսու-
թիւնները կ'ըմբռնես զորս երիտասարդ մը
ու երիտասարդուհի մը առանց զիրար սի-
րելու անամօթ յանդգնութեամբ մը իրարու
կը կրկնեն. թէ որ այդ տեսակ պատմու-
թիւններ կ'ուզես, Տիկին, ի՛նչ մեղքս պա-
հեմ, շատ ունեցեր եմ մինչեւ ցարգ. իսկ
թէ որ ճշմարիտ, խորին ու սրտի կապ մը
ըսել կ'ուզես, ատիկա ունեցեր եմ ու չ'եմ
ունեցեր միանգամայն, պատասխանեց երի-
տասարդը ցած ձայնով՝ որուն մէջ Սուրբիկ
իր կանացի փափկութեամբ տրտմութեան
ու դառնութեան շեշտ մը նշմարել կարծեց
ու խօսակցութիւնն յառաջ չի տարաւ:

Տիգրան փոխադարձաբար կրնար հար-
ցընել թէ Սուրբիկ ալ այդ տեսակ սրտի
կապ մը ունեցած չ'էր. բայց եւ ոչ մտա-
բերեց զայս: Այս անբոյթ երջանկութեան
մէջ մոլորած երիտասարդին ակնարկն ու յի-
շողութիւնը ներկայէն անդին չ'էին անցներ:

Յիրաւի երջանիկ էր Տիգրան:

Յորմէհետէ ինքզինքը տէր կարծեր էր
իր սրտին, պատճառ մը չ'էր գտած իր ան-
ձը մշտնջենական գրկման դատապարտե-
լու. բաւ էր որ անպատիւ խորհուրդ մը
չ'անցնէր իր մտքէն եւ ուրիշ արգելք չի
կար զուրկ մնալու այս կնոջ երեսէն որ ի-
րեն համար արեգակն էր փայլուն ու կեն-
սատու: Անոր շնչած ոգը շնչել, անոր պը-
տըտած վայրերը տեսնել, անոր ձայնը լսել
հեշտալուր, կարենալ առանց ո՛ր եւ է ան-
պատուութեան ամէն ժամ տեսնել զայն,
խօսիլ անոր հետ, մէկ բառով պաշտել զայն
իրապէս երբ վերացական աշխարհի մը մէջ
անգամ այսչափ երանութեան չ'էր հաւա-
տար, Տիգրանի՛ ուրիշ պահանջելու բան մը
չ'էր մնար: Ի՞նչպէս սակայն իր խանդա-
վառ սէրն եղբայրական գորովանաց փոխա-
կերպեր էր, ի՞նչպէս կրցած էր գոհանալ
պարզ մտերմութեան մը վայելքով. այս կը-
նոջ անքննադատելի ծանրութի՛ւնն էր արդ-
եօք, անոր լուրջ ու խոհուն վարքն էր որ
զինքն յեղափոխեր էր, թէ ոչ այս տեսու-
թիւն իսկ մեծագոյն շնորհն էր զոր՝ իր սի-
րոյն չափազանցութեան մէջ՝ երիտասարդը
շատ եւ շատ իսկ դատած էր իրեն համար:
Ինչ որ ալ ըլլար չի ջանաց ծածկել իր հա-
մակրութիւնն որ արդէն իր ամէն խօսուած-

քին ու վարմունքին մէջ երեւան կ'եւնէր : Տարօրինակ ազդեցութիւն մ'էր այս կնոջ իշխանութիւնն երիտասարդին վրայ . երբ որ խօսէր իրեն , ներդաշնակ նուազ մ'էր որուն դադրելէն վերջն անգամ երիտասարդը դեռ կ'ունկնդրէր երբ որ նայէր իրեն . փայտախիչ ու գգուալից ակնարկ մ'էր որ իրեն կը հետեւէր ու զինքը կը շրջապատէր ելեկտրական հոսանքով մը :

Խոստովանեցաւ օր մը Սուրբիկին իր բոլոր տկարութիւնը . — « Չեմ գիտեր , ըսաւ անոր , ի՞նչ հմայութիւն ունիս վրադ , կ'ըզգամ որ քոյրս քեզ չափ չը պիտի սիրէի . անբացատրելի զգացում մ'է զոր ի զուր կը ջանամ հասկնալ . հօր մը չափ կ'ը սիրեմ քու ամուսինդ . հաւատա՛ որ ուրախ եմ այնպիսի բարի ու սիրեցեալ անձի մը կենակիցն լինելուդ . թերեւս իրարու չի հանդիսէինք բնաւ թէ որ Արամ էֆէնտիի բարեկամը չը լինէի ես : »

Այս անդորրութեան օրերու մէջ էր որ Արամ էֆէնտի գլխի ծանր հիւանդութենէ մը պառկեցաւ . Սուրբիկ անձնուէր հոգածութեամբ մը խնամեց իր ամուսինը , ըսան օր հարկ եղաւ անքուն անցունել անոր անկողնոյն մօտ . դեղերը տալ , զայն սփոփել ու խնամել վարձկան ձեռքի դործ չ'էր եւ Սուրբիկ անձամբ իր պարտքը կատարեց .

վտանգներն անցան բայց նախկին առողջութիւնը չի վերագարձաւ . հիւանդութիւնն յաղթուեցաւ մշտնջենական հետք մը թողլով սակայն հիւանդին վրայ զոր անկարելի եղաւ բուժել . Արամ էֆէնտի ականջի ծանրութիւն մ'ունէր , այս հիւանդութիւն անոր լսողութիւնը խանգարեց . հիւանդն ոտքի վրայ ելաւ բոլորովին խուլցած , ծանր հարուած մ'եղաւ ասի ձեռունի մարդուն , յաւիտենական գրկում մ'էր ամէն յարաբերութենէ : Անփարատելի տրտմութիւն մ'եկաւ իր վրայ եւ ի զուր ջանացին զինքն սփոփել . ամէն մարդ պարտաւորեցաւ գրող խօսիլ իրեն հետ : Ամէն ձայնէ զուրկ ու կարօտ մնացող այս մարդը՝ չի կրցաւ անտարբեր քաջութեամբ մը մը դիմադրել այս աղէտին . իւր անգրաղ օրերուն բոլոր հաճոյքը խօսակցութիւնն էր զոր հարկ էր մէկ կողմ թողուլ . իր խլութեան պատճառաւ պարտաւոր էր մեկուսի մնալ այլ եւս իբրեւ խելագար յիմար մը . այլ եւս ընկերութեան մէջ չը պիտի կարենար մտնել ծիծաղելի չ'ըլլալու համար . երաժշտութիւնն եւ իր կնոջ դաշնակին ձայնը՝ զոր այնչափ կը սիրէր , ա՛լ իրեն համար չ'էին : Նամանաւանդ իր որդւոց ձայնը չի լսել զինքը խիստ վաշտայոց :

« Զաւակներուս ձայնէն կարօտ մնացի »

պատասխանեց անոնց՝ որք զինքը մխիթարելու համար ամէն քանք կ'ընէին :

Իսկ Սուրբիկ ի նչ կր մտած էր այս անակնկալ պատահարին առջեւ : Իր ամուսնոյն դժբաղդ կացութեան վրայ կատարեալ ու խորին ցաւակցութեամբ մը հանդերձ չի կրցաւ ակնարկ մը չի դարձնել նոյն իսկ իր գոյութեան վրայ : Հազիւ ԶՏ տարեկան էր դեռ երբ իր ծերունի ամուսնոյ՝ հիւանդ վիճակը՝ նոր տկարութեամբ ծանրանալով, ընտանեկան կեանքը բոլորովին կը վերջաւանդուտ էրիկը դարմանելով անցուցած էր կենաց ու երիտասարդութեան լաւագոյն օրերն : այսուհետեւ այրի ու ծերացած կընոջ մը տխուր ու մուշկ ապագան վերապահուած էր իրեն :

Յանկարծ անցեալ օրերը պատկերացան իր աչքին առջեւ անողոք ճշդութեամբ մը : ո՛ր էր այն ցնորական երջանկութիւնը զոր Սեդրաքին սիրոյն մէջ կը վայելէր երբեմն, ո՛ր էր այն հեշտութեան դրախտը զոր երիտասարդին ակածջին կը խոստանաւ ու կը փոխար : Ուխտագրութեամբ ու խաբեայ՝ քարուքանդ կործաններ ու փշրեր էր այն երանութեան յոյսերն զորս իր ձեռքն էր իրականութեան վերածել : չարագուշակ հրեշտակի մը պէս Եմահ աւերում սփռեր էր

իր չորս դին, եւ սեւ հողերն յափշտակերտարեր էին այն մէկ հատիկ սիրեցեալն որուն միայն խոստացած էր պատկանիլ :

Սուրբիկ չար հոգի մէկը չ'էր : ոչ ոք իր յանցանքին մեծութիւնը թերեւս իրեն չափ կը ճանչնար : ոչ ոք ապաշխարելու ու ներողութեան արժանանալու հարկն իրեն չափ կը խոստովանէր : Ամուսնական կեանքին մէջ իր պարտականութեանց անթերի գործադրութեամբն սփոփանք մը գտնել որոշեր էր, յաւէտ իր սրտին մէջ պաշտելով իր միակ սիրելոյն յիշատակը :

Տարիքի ահագին տարբերութիւնն, որ ի սկզբանէ իր եւ ամուսնոյն մէջ կը գլուխուէր, զինքը զուրկ թողած էր երջանկութեան այն ամէն յոյսերէն զոր երիտասարդուհին իրաւունք ունի պահանջելու : Հայրական խնամք ու հոգածութիւն գտեր էր շատ անգամ հոն ուր հրդեհող եւ սպառող հեշտութիւն մը գտնել կը յուսար : Քրքոյշ ու հազուագիւտ ծաղկի մը պէս ջերմոցի մը մէջ միայն պահուեր էր, մինչդեռ այնքան պէտք ունէր պատ օդին ու արեւին ճառագայթներուն : չ'էր կրնար գանգատիլ սակայն իր ամուսնոյն դէմ՝ որոյ բարի, առաքինի ու ներողամտ բնութիւնն ամէն մեծարանաց արժանի կը կացուցանէր զինքը :

Անշուշտ գիտէր թէ որքան անդարմանելի սխալ մը գործած էր ամուսին ընտրելով իրեն այնպիսի մէկն՝ որ հօր մը տարիքն ունէր իրեն քով եւ իր աչքը սեւեռելով կը տեսնէր իրեն տարեկից մանկութեան ընկերուհիներն որոնց ամէն մէկը հիմա իրեն պէս երիտասարդ, առողջ ու զուարթ ամուսինով մը երջանիկ ելեր էր. անշուշտ իր ձեռքն էր օգուտ բաղել այն բոլոր թոյլ տուութենէն՝ զոր իր ամուսինը կատարեալ վտահութեամբ մը տուեր էր իրեն, շեղելու ու մուրրելու համար պատուոյ ու պարտականութեան ճամբէն. երիտասարդներ չ'էին պահած սկանջն ի վար զ'այլիչ ու ապահով նկարագրելու այն ուղին որ լի էր անյատակ անդունդ՝ երով: Սուրբիկ մերժած էր ցայն վայր եւ գոհ էր խոտորած չը լինելուն ուղղութեան ճամբէն. բայց ահա անոք ու միայնակ՝ դատապարտեալ ծերունոյ մը հետ ինքն ալ դատապարտուած էր. անզգայ մը չ'էր սակայն երբ երիտասարդական արիւնն այնչափ ուժգին կը շարժէր իր սրտին մէջ. ծաղկահասակ ու գեղեցիկ՝ ինքն ալ միթէ չ'էր գիտեր սիրել: Երիտասարդ կիներ, առանց ո'ւ է փորձառութեան տէր լինելու, խորինգիտ ակցութիւն մ'ունէր իւր տեսնուած անձանց տրամադրութեանց վրայ ու իր կնային բը-

նազդմամբ առաջին տեսութենէն ճանչցեր ու հասկցեր էր Տիգրանի համակրութիւնն, իսկ հիմա բոլորովին կը կարդար անոր սրբտին խորն ուր խռովութեան հովեր կը փռչէին:

Անփոյթ ու շաղկրատ զուարթութեամբ մը՝ սիրային լուրջ կապակցութեան մ'առաջըն առնել ջանացեր և յաջողեր էր ցայնվայր. Տիգրան անոր ընդունելութեան ձեւերուն տակ չ'էր կրցած նշմարել երկիւղալի անձկութիւն մը. եւ հիմա որ ամուսնոյն խուճալովը գրեթէ միայնակ ու առանձին կը մնար այս երիտասարդին հետ, վտանգը մեծ եւ ահաւոր էր. ո՞վ պիտի պաշտպանէր զինքը տկարութեան, անխոհեմութեան վայրկենի մը մէջ. ճակատագիրը կարծես չար սատանայի մը պէս ամէն ջանք ի գործ կը գնէր զինքը փորձելու. բայց գուցէ իրեն շափ մեղքեցուելու արժանի էր Տիգրանն ալ. Սուրբիկ երեւակայեց զայն երբ լռիկ ու անձայն խոյս կուտար իրմէ եւ երախտագէտ սրտով կը մտածէր այն անձնուէր զոհողութեան՝ որով երիտասարդն ինքը միայն տանել ուղեր էր դժբաղդ սիրոյ մը բոլոր տառապանքն. այնպէս թուեցաւ յանկարծ իրեն որ Տիգրան իրեն մօտը կը ծընրադրէր ու ձեռքերը միացուցած սիրոյ ու սառապանաց խոստովանութիւն մը կ'ընէր

իրեն , անոր հեշտալի շունչը կարծես թէ կը գգուէր իր գէմը . . . Սուրբիկ սթափեցաւ , զուրս ելաւ դողդոջուն եւ պարտիզին զով ու ցրտին հողմն ամոքեց անոր հրատապ ձակատը . . .

Այսպէս նոր նոր շփոթութիւններ կը պատրաստուէին մօտաւոր ապագայի մը մէջ , ընտանեկան հորիզոնին վրայ սեւ կէտեր կը տեսնուէին , նախակարապետ մեծ ու խռովայոյզ մորիկներու :

Արամ էֆէնտիի ապաքինութենէն վերջն ապրելու եղանակնին փոփոխութիւն կրեց : Այս բարեսիրտ մարդն՝ այնքան ծանր հարուածի մը ներքեւ ընկճուած՝ գրական պարապմանց տուաւ ինքզինքն ու առանձնացաւ . բայց անխիղճ ու եսասէր մէկը չէր որ իր ձակատագրին բոլոր դառնութիւնն իր ամուսնոյն վրայ ալ բեռնաւորէր . ազատամիտ փիլիսոփայ՝ որ իր ընկերական կենաց բոլոր անպատեհ կողմերը կը ձանձնար , գիտցեր էր գէթ իր անոյճ բնաւորութեամբ ընուլ տարիքի հեռաւորութիւնն՝ որ զինքն իր կնոջմէն կը բաժնէր եւ հիմա բնաւ չէր ուզեր երիտասարդ ու անփորձ կնոջ մը բաւել տալ անհեռատես օրոյման մը հետեւանքը զոր ինքն իր բոլոր փորձառութեամբ չէր գուշակած ատենով :

Ուստի կնոջը գրեթէ բռնութեամբ հրա-

մայեց իրեն հետ չ'առանձնանալ :

« Ինձ համար օրդի մը ու քեզ համար եղբայր մ'է Տիգրան , ըսաւ Սուրբիկին , կ'ուզեմ որ առաջուան պէս ուրախ ու ազատ ապրիք . հարկ չ'է որ ես ալ ընկերանամ ամէն ատեն ձեզի , ես այսուհետեւ չ'եմ կըրնար շարունակ դուրս ելնել եւ դուն ինձ հետ բանտարկեալ մի՛ մնար »

Յիրաւի , եղբայր մ'էր Տիգրան Սուրբիկին : Այս հեռադէտ մարդն անկեղծութեամբ կ'ըսէր այս խօսքերն ու այս անխորհուրդ առաջարկին վրայ չ'էր խորհած երբէք .

Ո՛չ . այնքան պարզփառ մէկը չ'էր որ առանց կշռելու հետեւանքն այս աստիճանի թոյլտուութիւն ու ազատութիւն չընորհէր իր երիտասարդ կնոջը :

Մերունի պաշտօնատարը շատ եւ շատ անգամ խորհած իր ընտանեկան կացութեան վրայ եւ բաւիցս զղջացած էր անտես ըրած լինելուն այն առաջին պայմանն՝ առանց որոյ ամուսնութիւնն անհամ կատակերգութիւն մը կը լինի եթէ ողբերգութեան չի դառնայ :

Զղջում մը կար այս մարդուն սրտին մէջ . ճշմարիտը խօսելով չէր կարող իրեն հետ հաւասարապէս պատասխանատու համարել իր կինն ալ այս անպատշաճ միացման մէջ և

յանցանքն անդարմանելի ու մշտատեւ կը ծանրանար իր վրայ միայն :

Մարդ կալին արդարութիւնը չ'էր կրնար դատաւարտել զ'ինքն եւ իր տազնապեալ խղճին ձայնն էր միայն զոր կը լսէր որոշ ու բացարձակ :

Այն վայրկենէն, այս տարօրինակ մարդն որոշեր էր իր կնոջ վերադարձնել անոր ազատութիւնն եւ կերպով մը թեթեւցնել եթէ ոչ դարմանել իր գործած սխալը :

Արհամարհելով ընկերութեան բոլոր չարախօսութիւններն ու նախապաշարունակներն, սիւտփանք մը պիտի ունենար, եթէ իր կ'ինն առանց խոտորելու պատուոյ ձամբէն կարենար իրեն տարեկից ու առաքիչի երիտասարդի մը բարեկամական գորովովը մոռնալ եւ իր երեսին չի զարնել զինքն յաւիտենական թշուառութեան մը մատնած լինելու յանցանքը :

Անշուշտ Սուրբիկ եւ ոչ մէկ ժամանակ առիթ տուած էր իր ամուսնոյն դժգոհութիւն կամ յանդիմանութիւն մը կարդալու իր դէմքին վրայ . բայց այս լռին համակերպութիւնը գանգատող ձայնէ մ'աւելի ծանր եկած էր միշտ անոր սրտին :

Թէ որ ամուսնաթողութիւնն ընդունելի լինէր մեր կրօնական օրէնսդրութեան մէջ, Արամ էֆէնտի բռնութեամբ պիտի բաժ-

նուէր իր կնոջմէն . ու քանի որ օրէնքը կաշկանդող ու բռնադատող էր, իրեն կ'իյնար կարելիութեան ու պատշաճութեան սահմանին մէջ անտանելի չի դարձնել ամուսնական լուծը :

— Արի՞ կ'սպասես ամուսնանալու համար, կ'ըսէր օր մը Տիգրանին . չ'ըլլայ որ երիտասարդութիւնդ անցունելէ վերջն ինձ նման հիւանդ ու կարօտ օրերուդ օգնական մը փնտռելու համար միայն ամուսնանալու ելնես : Տարիքն առնելէն վերջն երիտասարդուհւոյ մը հետ ամուսնացող մարդը կը նմանի ծովն ինկող անձի մը՝ ոտքէն կապուած ծանր գնտակին որ իր երիտասարդ կիներ միասին կը տանի թշուառութեան անդունդը :

Մինչեւ այն ատեն իր կնոջ եւ ոչ մէկ փափազին հակառակեր էր . Սուրբիկին ամէնէն չնչին հաճոյքն իրբեւ պարտականութիւն մը ի գործ դրած էր միշտ եւ ասկից վերջը մի և նոյն բարեսրտութիւնն ու թոյլտուութիւնը տալու հարկը ճանչցաւ :

Այս ձեւով Տիգրան աւելի մեծ ազատութիւն մը վայելեց Սուրբիկին ըով . իր բոլոր բարեկամութեան հակառակ, այս էր մարդկային սրտի ակարութիւնն, գրեթէ գոհութեամբ տեսաւ Արամ էֆէնտի մենաւոր մնալը . բայց զայն առանձին չի

թողուց . երբոր Արամ էֆէնտի իր աշխատութեան սենեկէն դուրս ելնէր , Տիրոջ անոր թով կը կենար միշտ ու մերթ գրաւոր խօսակցութեամբ և մերթ պէջիկի խաղով կ'անցունէին միասին քանի մը ժամեր :

Խոսքով շուտով յառաջացեր էր իր կանխորոշ ճամբուն մէջ . դատաւորական ասպարէզն , օրինական ճշդութեամբ սահմանափակ դտնուելով , առաջուց ի վեր անյարմար թուած էր իրեն . ուստի շուտով թողուց իր ընդհանուր դատախազի օգնականի պաշտօնը վարչային բարձրագոյն պաշտօնի մը փոխարէն :

Այս երիտասարդը՝ դիւրին ու արագ յառաջադիմութեան մը անհրաժեշտ եղող բոլոր պայմաններն իր անձին վրայ կը բովանդակէր :

Նա ունէր մեծերու դէմ հլու ու ըստրուկ հնազանդութիւն , ազդեցիկ անձանց մերձաւորութիւն եւ անոնց թով այն թղթիչ ու շողջորթ զուարճախօսութիւնն՝ որ երբեմն խեղկատակութիւն կը կոչուի ու շատ անգամ ճշմարիտ արժանեաց տեղ կը բռնէ : Այս միջոցով ստացեր էր նա գորաւոր պաշտպաններ :

Միանգամայն յաջող ամուսնութեամբ մը

իր դրամական կացութիւնն ապահովեր էր . առանց վարանելու ամուսնանալով հարուստ ու գեղանի աղջկան մը հետ որոյ բոլոր պակասութիւնն՝ ատենով հայրենի տունէն փախուստ տուած լինին էր երիտասարդ դասատուին հետ : Հազար ոսկի օժիտ պիտի տար անոր հայրը՝ մեծահամբաւ դրամատէր մը որ կառավարութիւնն ու հասարակութիւնը կողոպտելով ձեռք բերած էր իր հարստութիւնն և զոր քրտինքով ու պատուով ձեռք բերուած կ'անուանէր : Սակայն հակառակ իր մեծ դիրքին ոչ թէ իր աղջիկն ամուսնութեան ուզած էր եւ անոր սղակալից անցեալն ատեն անցնելով մուցուած չէր :

Խոսքովի պէս դրամի կարօտ ու պատուոյ մասին ներողամիտ անձ մը միայն անոր ամուսին կրնար լինիլ : Բարձրանալու մշտատեւ տենչէն բռնուող այս մարդուն այլքին ամէն ինչ՝ բարեկամութիւն կամ ամուսնութիւն՝ միայն իր մեծութեան գաղափարներուն նպաստելուն համար գոյութիւն ունեցող բաներ էին :

Նորա կինը պէտք էր նախ և առաջ դժբախտ տէր լինիլ , երկրորդ՝ սրահի մը մէջ խօսակցելու չափ կրթեալ մէկն ըլլալ . եւ Խոսքով այս միութեան մէջ անկէ անդին չէ նայեցաւ :

Շիտակն ըսելով իր կինը կատարելապէս

յարմարեր էր այս տարօրինակ մարդուն .
Եւզինէ վառ ու խռովեալ երեւակայութեան
տէր , յամառ ու արտակարգ աղջիկ մ'էր :

Ճարտար դաշնակահար , լաւ գծագրիչ ,
ինչպէս որ կը տեսնուէր իր ներքնասենեակի
պատերէն զորս իր մատիտին արտադրու-
թեամբը միայն զարդարեր էր , այս կինն
ամէն բանէ առաջ իր անկախութեան սի-
րահար մէկն էր : Կարունակ Փռանսական
վէպեր կարդալով՝ անոր ըմբոստ բնա-
ւորութիւնը բոլորովին անզուսպ ու յիմա-
րական բան մը դարձեր էր . թաքուն , ան-
ձայն ու անշուկ սիրահարութիւն մը՝ ա-
նոր զգուանք պիտի ազդէր . ընդհակառակն
առեւանգութեան , բռնութեան , սպանու-
թեան կամ թունաւորման վախերով լեցուն
ու գայթակղալի հոչակ ունենալիք ամէն
տրիփ անոր պիտի յաղթէր :

Անոր ազատութեան ու անկախութեան
փափազը՝ բռնաւոր տարփաւորի մը գերին
լինելու տենչանքն էր միայն եւ ոչ ուրիշ
բան : Այս կնոջ հետ հաշտ կենցաղի յոյսն
անկարելի էր . անոր կամ տէրը կամ ստրուկը
պէտք էր լինիլ :

Իր արկածալից երիտասարդութիւնը միշտ
չափազանց ներողութեան մը արժանացած
էր հօրը կողմէն որ անհաւատալի տկարու-
թեամբ կը սիրէր այս ազջիկն :

Եւզինէի ամուսին լինելիք մարդը պարտ
էր առաջուց աչքն առնել անոր լուծին տո-
կալը , գոնէ անոր բացարձակ անկախութիւ-
նը ճանչնալը . Խոսրով այս վիճակն անըն-
դունելի չի նկատեց . չէնք շնորհք Եւզինէի
երեսն անգամ նայած չէր . կապո՞յտ աշուի
էր թէ սեւ աշուի . անոր մազերը խարտ-
եա՞ջ էին թէ շագանակագոյն . բերանը փո-
բը՞ր էր թէ մեծ , շիտալը շատ աղէկ չէ՞ր
գիտեր . խիստ լաւ գիտէր սակայն որ իրեն
տրուելիք օժիտը նշանառութեան օրէն իր
տրամադրութեան ներքեւ պիտի գտնուէր
ու այս բաւ էր . անոր :

Ամուսնութեան առաջին ամիսները փո-
խադարձ ու գերազանց անտարբերութեամբ
հետեւապէս եւ անդորրութեամբ անցաւ ,
մինչեւ որ Խոսրով անգամ մը իր ամուսնա-
կան իշխանութիւնն ի փորձ գնել ուզեց :

Տիկնոջ երիտասարդ մէկ ազգանկանը՝ Խոս-
րովի տան սովորական եւ ամենօրեայ այ-
ցելուներէն մէկը դարձեր էր . այս տղան՝
վաճառականի մը օով գրագիր , որ իր
չարաթականն իր զգեստներուն միայն կը
յատկացնէր , բաւական վայելչազէմ ու
խարտիչահեր մէկն էր զոր չար լեզուները
կը պնդէին թէ Անտոկի վաղեմի ու արդի
մէկ մտերիսը լինէր : Այս լուրը շուտ հա-
սեր էր Խոսրովի ականջը , բայց չէր ուզած

Եւզինէ

որո
հասկ
Եւզինէ

անորոշ ու տարտամ կասկածի մը վրայ իր
 դուռը փակել անոր դէմ, նամանաւանդ
 ամուսնութեան առջի օրերը: Տանը մէջ բը-
 նաւ կարեւորութիւն տուած չ'էր անոր .
 առջի տեսութենէն մէկ երկու բառով հաս-
 կըցեր էր որ, զգեստներու գլխէն ի զատ,
 այս անձն ոչխարի մը պէս անմիտ ու վայ-
 րենիի մը չափ տղէտ արարած մ'էր: Այս
 տխմար էակն Աննիի մը պէս կնոջ տար-
 փաւորը չ'էր կրնար ըլլալ:

Սակայն ի սկզբան անվնաս նկատուած
 այս արարածը՝ քիչ քիչ Խոսրովի անտանելի
 թուեցաւ . իր հակակրօնութիւնն այնչափ ա-
 ւելցաւ որչափ իր կիներն այս սատիճանի ա-
 պուշի մը վրայ տարօրինակ գորով ու սքան-
 չացում կը յայտնէր:

Խոսրի պզտի մնամարտով մը սխաւ այր
 ու կնոջ մէջ այս երիտասարդին վէճը:

Աննի կ'անոր ճաշակն ու վայելչութիւնը
 կը գովէր:

— Կը զարմանամ, ըսաւ անոր ամուսի-
 նըն, այդ անհամ պարոնէն արտօթելուդ:

— Ինչո՞ւ ըլլայ անհամ, միթէ համով ըլ-
 լալու համար պէտք է անպատճառ քաղա-
 քական կամ ուսումնական նիւթերու վրայ
 ճառել ձեզի պէս մեռք՝ կանայքս՝ այդ տե-
 սակ բաներէ չ'ենք հասկնար, ամէն մարդ
 իր ճաշակն ունի:

Կնոջը

Կնոջը

— Այդ խօսքը քու հմտութեանդ յար-
 մար չ'է . դու ուսեալ կին մ'ես եւ շարու-
 նակ քուրջի վրայ խօսիլը դատարկ գլուխ
 կանանց յատուկ է:

Քանի մ'որ վերջը խօսքը նորէն բացուե-
 ցաւ բայց այս անգամ աւելի կծու կերպով:

— Չեմ կարծեր որ յատկապէս ինձ հա-
 կառակելու համար այդ անպիտան անձն
 հոս յաճախել կուտաս . անցեալ օրուան դի-
 տողութենէս ի վեր այդ պարոնն օրը երեք
 անգամ գալ սկսաւ:

— Ամենեւին . միայն կը խնդրեմ որ
 այդքան ջնջին բանի մը համար խնդիր չի
 հանէք . որովհետեւ շատ կանուխ է դեռ,
 աւելցուց հեղձութեամբ . վեց ամիս չ'եղաւ
 ամուսնանալիս և նախանձոտ Օթէլլայի դերը
 ծիծաղելի կ'ըլլայ:

Խոսրով բարկացաւ բայց ինքզինքը զըս-
 պեց:

— Համբերութեամբ մտիկ ընել պար-
 տաւոր եմ որովհետեւ քեզմէ մեծ եմ . քեզ
 նկատմամբ մինչեւ հիմա ունեցած անտար-
 բերութիւնս աննախանձ ըլլալս կը հաստա-
 տէ, կը պահանջեմ միայն որ պատշաճու-
 թիւնը ճանչնաս, ըսաւ ցուրտ կերպով ու
 դուրս ելաւ սենեակէն:

Ինչ տեսակ էին Եւզինէի յարաբերու-
 թիւններն այս երիտասարդին հետ որ Ար-

մենակ կը կոչուէր . արդարութիւնն յարգելու համար պարտաւոր ենք յայտնել որ անպատշաճ կապակցութեան ամէն զրոյց բողբոջիւն անհիմն էր :

Եւգինէ չէր սիրեր ու չէր կրնար սիրել այս տխմարը բայց տխմարութիւնն ալ իր հաճելի կողմն ունէր :

Սրմենակ Եւգինէն կարենալ սիրելու մեծամտութիւնը չ'ունէր բայց անոր հետ տեսնուիլն , հասարակաց տեղ մը անոր հետ միասին ժուռ դալն իրեն շատ էր ու քիչ չէր :

Մինչեւ իր էրկանը գիտողութեան պահուն , Եւգինէ այս տղուն հետ կ'զբօսնուր , անոր վրայ կը ծիծաղէր , կը խնդար , բայց գէշ աչքով մը նայած չէր անոր . սակայն իր էրկանը ընդդիմութիւնն անոր ի բնէ պատերազմատէր ոգին արթնցուց . նա մանաւանդ անոր խօսքին վերջին պարբերութիւնը խիստ վիրաւորիչ դատեց . « Քեզ նկատմամբ ունեցած անտարբերութիւնս աննախանձ ըլլալէ կը հաստատէ » ըսեր էր . անտարբերութիւն . . . Եւգինէ իր ամուսնոյն համար ուրիշ զգացում ունեցած չէր . բայց ամուսինն իր մասին անտարբեր ըլլալու իրաւունք չ'ունէր եւ որոշեց այդ անտարբերութիւնը խորտակել :

Ի շնորհս Եւգինէի բերած օժիտին եւ իր

ամսականին Խոսրով Պոլոյ առաջնակարգ էֆէնտիներէն մէկն էր հիմա . իր կնոջ բերած գումարը քօնսօլիտէի խաղով ստացուած մէկ երկու յաջողութեամբ կրկնապատուած ու եռապատուած էր եւ Խոսրով՝ շահադիտութեան մէջ յանդուգն ու անվախ՝ վերջին բաղդով մը մեծ հարստութիւն մը շինել ու այնպէս քաշուիլ կ'ուզէր այդ վտանգաւոր խաղէն :

Մէկ օրուան մէջ հարիւր ոսկի շահիլ կամ կորսնցնելու վարժուող մարդ մը խնայողութեան տէր չէր կրնար լինիլ ու Խոսրովի քօնսօլիտէի ելեւէջին պատճառած շահերուն մէջ իր տանը համար ըրած մեծ ծախքը չնչին բան մ'էր :

Կարօտութեան մէջ նուստ ու ստրուկ եղողն հարստութեան մէջ ամբարտաւան կ'ըլլայ . Խոսրով հազարաւոր ոսկիներուն հաշուոց հետ շուտով հինաւուրց ազնուականի մը բոլոր ձեւերը սորված էր :

Սյս էֆէնտին մոռցած էր անշուշտ հայրենիքէն հետիոտն Պոլիս գալը կամ տնտեսախապօր աւելցուկ հացի կտորներն , երբ իր հիւրերուն գանգատող ձայնով մը չեռալին եւ Պիււկիին կօշիկներէն կամ Լըպօսին կերակուրներէն կը գժգոհար :

Իր ազգային գաղափարաց գալով , իրբեւ նորահաս հարուստ մը՝ վարջութեան , ժո-

ղովոց եւ երեսփոխանաց վրայ ծիծաղելու իրաւունք ունէր . բայց Խոսրով խորամանկ փառասէր մ'էր որ այդ ժողովոց մէջ ձայն ու իշխանութիւն ունենալը չ'արհամարհեց :

Առաջին պաշտօնատարը չ'էր նա (և անտարակոյս վերջինն ալ չի պիտի ըլլար) որ ազգին մէջ ազդեցութիւն ունենալն՝ իր դիրքին օգտակար կերպով ծառայեցնելու գաղափարն յղացեր էր : Այս օրինաւոր ալընկալութիւնն՝ ի վաղուց անտի շատ քիչ անգամ ի դերեւ ելած է որպէս զի նորեկներ ադոր ճշմարտութիւնը չ'ըմբռնեն :

Մէկ նամակով Խոսրով իր հայրենիքէն երեսփոխան ընտրել առաւ ինքզինքն Ազգային ժողովին , իսկ հոն խոհեմութիւնը ձեռքէ չի թողուց ու խորագէտ ճարտարութեամբ ձեռք բերաւ ազատամիտ ու ժողովրդական երեսփոխանի անունը զոր պաշտօնատար երեսփոխանները խիստ քիչ անգամ ստացած են :

Ժողովին ամէն նիստերուն ներկայ , ներկայ նախապատրաստական գումարումներու , ամէն վիճաբանութեանց մասնակից , իր գիւանին մէջ տեղեկաբեր , հանգանակութեանց մէջ կարգադիր մասնախմբի անդամ , Խոսրով էֆէնտին Ազգային ժողովոյ ամէնէն գործունեայ ու ազդեցիկ անդամներէն մէկը դարձաւ :

Ամէնքը միաբերան կը գովէին այս մարդըն որ ազգին փաստելու կարողութեամբն հանդերձ այնքան անձնուէր կը ծառայէր անոր :

Այս համբաւը՝ զոր անաղարտ կը կարծէր , ստանալէ յետոյ սկսաւ իւր շահատակութիւններն : Իր ձայնն հետզհետէ խրոխտ եւ հպարտ՝ հակառակ կարծեաց տէր երեսփոխաններն արհամարհանօք ու սպառնալեօք կը սաստէր : Ո՞վ էին այն անպիտան մարդիկն որ կը համարձակէին իրեն դէմ խօսիլ . գիտէի՞ն որ կարող էր գիրենը մինչեւ յաքսոր մատնել :

Խոսրովի ծրագիրներն ի գործ դրուելու մօտ էին . միայն իր ընտանեկան կենաց խռովութիւններն աճեր ու բազմապատկեր էին երթալով :

Ինչպէս ըսինք Եւզինէ իր էրկանն անտարբերութեանը յաղթելու համար անոր նախանձը շարժել որչէր էր : Աչինչ այնքան անխախտելի է որքան կանացի որոշումն : Այն վայրկենէն սկսելով Եւզինէ չ'էր թերացեր , իր ամուսինը կատղեցնելու համար , ի գործ դնելու այն ամէն փոքրիկ կամ մեծ , անփնաս կամ փնասակար միջոցներն որ կանոց պատերազմի համբարը կը կազմեն :

Այն երիտասարդն ամէն օր հրաւիրել , իր ոտքին քով նստեցնել , գլխի վայր փըս-

փրսալ անոր ականջն ի վայր , թեւը մտնել չըջագայութեան համար ու կռթնիլ անոր թեւին ամէնուն ուշադրութիւնը հրաւիրելու չափ . ու երբ ասոնք անբաւական դատուեցան , նամակագրութիւն մ'սկսիլ անվերջանալի , օրն իրիկուն տոմասկներու տարուբերին զբողեցնել ծառայները , ծաղկանց փունջեր պատրաստել տալ , զրկել եւ ընդունիլ ու վերջապէս կղզին կամ Պէոյիւքտէրէ կամ ուրիշ հեռու տեղեր ժամադրութիւններ կարգադրել , ահա Եւզինէի ռազմադիտական միջոցներն :

Խոսրովի՝ քիչ քիչ անհանդուրժելի երեւցաւ իր կնոջ ընթացքը : Կռիւներն անպակաս դառնալ սկսեց էին . բայց Եւզինէ պատերազմէ փախուստ տուող չ'էր , ընդհակառակն . արդէն քօնսօլիտէի մէջ մի քանի մեծ կորուստներ Խոսրովի բնաւորութիւնը բողբոջին դառնացուցեր ու համբուրութեան չափը լեցուցեր էին : Տանն անկարգութիւնն ու անխնամութիւնն որ շոյալութեան ծայրագոյն աստիճանի հասեր էր , իր կնոջ մասին ամէն մանրամասնութիւններով յեղյեղութեամբ ամօթալի պատմութիւններ , ընտանեկան յարկին կործանման ապահով նշաններն էին : Խոսրով թէեւ երբէք չ'էր սիրած , չ'էր խորթած իր կնոջմէն , բայց քիչ մ'ալ սպասել որոշեց :

Գրամական կորուստներն ու ձախորդութիւնն որ քանի մ' ամսէ ի վեր զինքը կը հալածէին , պաշտօնի յառաջադիմութեամբ փոխարինել որոշեց . իր ամականը ներկայ վիճակին մէջ անբաւական դարձեր էր նոյն իսկ իր կնոջ զարդարանացն ու պարաքը դիզուեր էր չորս դին . ամականի ու սաշտօնի բարձրացումը փրկութեան միակ ճամբան էր . դեռ ոչ որ գիտէր անոր նեղութեան մէջ գտնուիլն . ամէնքը զինքը հարուստ ու ազդեցիկ զիտէին . ժամ էր աղէկ ու արտաքոյ կարգի վարպետութեամբ մը վերստին հաստատել իր կորսուելու մետեղոզ գիրքը . Խոսրով ազգային գործոց դարձուց իր հետաքննին ակնարկն :

Որ մէկին խոստմամբ , որ մէկին սպանալեօք , որ մէկին համոզմամբ Խոսրով յաջողած էր արդէն կուսակցութիւն մը կազմել ժողովոյն մէջ , որ իր գաղափարներն ի գլուխ պիտի հանէր :

Սահմանադրութեան վերաքննութեան վիճաբանութիւնը տեղի կ'ունենար : Խոսրով՝ սարգապէս զայն ջնջելու համոզումը յայտնեց . իր կարծեօք , ֆաղաքական ժողովը կը բաւէր ամէն ինչ անօրինելու . ինչ պէտք այս վայրախօս երեսփոխանաց որոցմէ օգուտ չի կար . տասն եւ վեց տարուան փորձը մէջ տեղն էր իր համոզումն հաստա-

տելու : Միւս կողմէ ազգային վարժարաններու պէտք չի կար որք աւելորդ ծախք մը ու հոգ մ'էին ազգին գլխուն :

Այն ատենուան մարդիկն հիմակուաններուն չափ անսիրտ ու անհոգի չ'էին :

Նախ ապշութեամբ մտիկ ըրին այս նոր վարդապետութեան ու յետոյ որոտալից ընդմիջում մը ատենաբանին խօսքը կտրեց .

— Մի' մեզանչէք Սահմանադրութեան դէմ, կը պողային ունկնդիրներն հազիւ զսպելով իրենց զայրայթը :

— Ի կարգ, ի կարգ, կը գոչէին երեսփոխաններն յոտին կանգնած :

— Շարունակեցէ՛ք, էֆէ՛նտի, կը պատասխանէին միւս կողմէ Խոսրովի կուսակիցները :

Խոսրով այս ընդհանուր խռովութեան մէջ չի տկարացաւ . այլ թեւերը խաջածեւ միացնելով իր կուրծքին վրայ .

— Պիտի սպասեմ հոս որ Ղիւանը գոնէ խօսքի ազատութիւնն յարգել տայ, ըսաւ նա . չեմ կարծեր, աւելցուց սպառնալից ակնարկութեամբ ունկնդիր ամբոխին, որ խուժանին յարձակմանց դէմ մեր անձերը պաշտպանելու համար կառավարութեան միջամտութեան դիմելու հարկադրէք զմեզ, Ատենապետ էֆէնտի :

Ատենապետին զանգակին ձայնն աղմու-

կին հետ կը շարունակուէր ու անլսելի կը դառնար :

Ամէնէն կոշտ ածականներն, ամէնէն ծանր խօսքերն իրարու դէմ կը փոխանակուէին . Ղիւանը շուարած ի զուր լուրթիւն կը պահանջէր :

Երեսփոխանները կ'զգային որ պատրաստուած դաւ մը կար, ամէն մարդ կացութեան ծանրութիւնը կ'ըմբռնէր, բայց ոչ ոք բացորոշ կերպով Խոսրովը ամբաստանելու կը համարձակէր, այնքան ծանօթ էր անոր վտանգաւոր անձ մը լինելը :

Սահմանադրութեան հիմնադիրներէն ծերունի երեսփոխան մը խօսք պահանջեց ու պահ մը յաջողեցաւ ստանալ . ալեհեր բայց դեռ առոյգ ու կայտառ բժիշկ մ'էր Տօթթէօն Բ . պէյ, որոյ այսքան յուզեալ ձայնը լսուած չ'էր դեռ . նա այն անձերէն էր որոնց միշտ պատկառանքով ունկնդրութիւն կը լինէր : Իր երիտասարդութեան ատեն Սահմանադրութիւնը տուեր էր ազգին իրեն պէս մի քանի երիտասարդաց հետ խորհելու ազգին ապագային . բեղմնաւոր ու ազատական խորհուրդ մ'էր զոր յղացեր ու գործադրեր էին . իր երկն էր ազգային օրէնքն եւ զաւկի մը չափ կը սիրէր զայն : Այդ օրէնքը ջնջելու պահանջումն իր աչքին ոճիբ մ'էր :

Ամէնքը պահ մը լռեցին այդ մեծարելի ծերունւոյն ձայնին առջեւ :

— Կը յիշեցնեմ Դիւանին, աշաղակեց նա, որ Աահմանադրութեան դէմ խօսելու ազատութիւն չի կայ այս ժողովին մէջ. խօսելու ազատութիւնն հոգ կանգ կ'առնու. Դիւանին պարտքն է ժողովին կամքն հարցընել իմանալու համար թէ կը հաճի՞ ատենաբանին մտիկ ընել: Ներեցէք որ ըսեմ նաեւ թէ Դիւանին վեհերոտ ընթացքը ժողովին անարդանք մ'է :

Որոտընդոտ ծափահարութիւն մը մէկ կողմէն, քօռ ու գոչումը միւսէն, վերսկսան մեծագոյն սաստկութեամբ :

Նախատինք չի բաւեցին. Խոսրովի հակաակորդք քաջալերուեր էին ու ամէնէն ծանր ամբաստանութիւններն ապտակի պէս անոր երեսին կը զարնէին :

Վերջապէս Դիւանին եւ քանի մ'ազդեցիկ երեսփոխանաց օգնութեամբ վայրկեան մը կարգը վերահաստատուեցաւ ու քուէարկութեան արդիւնքն, ատենաբանն ունկընդրելու մասին, բացարձակ առաւելութեամբ « ոչ » մը երեւան հանելով, Խոսրովի բոլոր յատակագիծներն հիմնայատակ կործանեց :

Վար իջաւ բեմէն, կաս կապուտ կտրած ամօթէն ու բարկութենէն, բայց դեռ լսը-

բոխտ ու սպառնալից մեկնեցաւ ժողովէն, մէկտեղ տանելով իր կործանեալ յոյսերուն հետ վրէժխնդրական սպառաստութիւններ :

Խոսրովի մեկնելովը բեռ մը կարծես վերցաւ ժողովին սրտին վրայէն. այն մարդուն վախէն ոչ ոք իր համոզումը կրնար ազատութեամբ յայտնել, այդ մարդն օտարական մ'էր. անոր հեռանալէն վերջն ամէնքն իրենց լեզուին տուին. մին պարսաւանաց քուէ մը առաջարկելու չափ յառաջ գնաց. ժողովն ազգասիրական եռանդով մը յուզուած էր. երեսփոխանները զիրար կը շնորհաւորէին. ու այսպէս վերջացաւ այդ նշանաւոր ու պատմական նիստը :

Խոսրով տուն դարձաւ : Եւզինէ դուրս ելած ու վերադարձած չէր դեռ, թէ եւ ժամը 12 ի մօտ էր. Խոսրով՝ արդէն ցասմամբ լեցուած, իր կնոջ ընթացքն աններելի դատեց. ընտանեկան հորիզոնին վրայ մեծ փոթորիկ մը պատրաստուած էր ու տիկնոջ վերադարձին կ'ապասէր պայթելու համար. ժամը կէսն էր ու ոչ ոք երեւան ելած էր. ո՞ր դացեր, ո՞ր մնացեր էր. Խոսրով իր կատաղութիւնն սպառնալուն դէմ դարձուցեր էր, չը գիտնալով որի դէմ յագուրդ տալ իր բարկութեանը :

Մէկին քառորդ մնալով, Եւզինէ տուն

դարձաւ բաց կառքով մը . յայտնի էր թէ զուարճութենէ մը կը վերադառնար, կերելէ էր թէ քիչ մը ոգելից ըմպելիք ալ խըմած էր, որովհետեւ այտերը վարդագոյն, աչերը կարմրած, զտարթ ու բարձրաձայն խօսելով խնդալով վար ցատկեց կառքէն :

Սեւ կռնատինէ ճոխ ու գեղեցիկ չըջազգեստ մը հագած էր որ անոր գիրուկ ու բարեձեւ հասակն ու ուռուցիկ կուրծքը կը սեղմէր . մազերը սեւ, փայլուն ու երկայն, անգլխական ձեւով ու վայելչութեամբ յարդարուած, հազիւ հազ կ'ամփոփուէին ակաթի մը տակ՝ որոյ ձեւն իտալացի աւազակներէն առնուելուն համար, պէտք կը կոչուի :

Յրեսը ներկած, դէմքը ճերմակ ու կարմիր, արտեւանունքն ու յօնքերը սեւ, չրթունքը ջայն ու հեշտաւէտ, ուննգերը դողող ոջուն, աչերը փայլուն, կուրծքն՝ աննման ու խոստմնալից՝ թափանցիկ տանթ ելներով ծածկուած, որ իր դահալէժ ելեւէջովը կը մատնուէր, ձեռնոցները մինչեւ ուսն երկարած ու ձեռքն հովանոցի տեղ մեծագին խարազան մը, ահա այս ձեւով Եւգլինէ իր ամուսնոյն դէմն ելաւ :

Խոսքով՝ առաջին անգամ ըլլալով՝ զար-

մացաւ ու սքանչացաւ այսքան վայելչութեան ու լրբութեան վրայ :

Ի՞ր կինն էր այս գեղանի էակն որ զաշխարհ մոլորեցնելու կարող կը թուէր . Խոսքով ապշեցաւ ու միանգամայն ներքին հպարտութիւն մը զգաց :

Ի՞նչպէս մինչեւ հիմա աչքին չ'էր զարկած այդ հրապուրիչ մարմինն, այդ պաշտելի կինն որ վեհերոտութեան օրէնքներն անգիտանալուն համար թերեւս այնքան գեղապանծ կ'երեւէր :

Խոսքով յանկարծ վայրենի իղձ մը զգաց իր սրտին մէջ, հրաշքի երկաթի մը այրուածքին նման . մոռցաւ իր կացութիւնը, քայքայումն, այն օրուան պարտութիւնը, բարկութիւնը, վրէժն ու ամէն ինչ : Չարմանալի երեւոյթ մ'էր ասի մարդկային տկարութեան, երբ մինչեւ այն վայրկեանը միայն մեծութեան, փառաց ու հարստութեան խորհուրդներով համակուած այս մարդն՝ ո՛չ թէ օտարուհոյ մը հանդէպ, ո՛չ, այլ իր կնոջ համար, իր երկու տարուան կնոջ դէմը վաւաչտ ու յիմարական սէրով մը կը տագնապէր :

Սպառնական շեշտ մը պատրաստեր էր, սակայն փայփայող ու ողորջ ձայն մը միայն ելաւ բերնէն .

— Ո՛ւր մնացիր մինչեւ հիմա :

— Ես ալ աղէկ մը չը գիտեմ. ո՞ւր չը մնացի որ . ցորեկուան ճաշէն վերջը ժամ մը միայն կորսնցուցի յարդարանացս համար . յետոյ Տիկին Ա* ին հետ Մասլաք դացիւնք . անցեալ օրուընէ որոշէր էինք . ո՞վ գտնանք հոն կը հաւնիս . նախ եւ առաջ մեծ մարդերէն , էֆէնտիններէն սկսինք , քանի որ այնպէս հաճելի է ձեզի : Արապետ եւ Երուանդ էֆէնտիններն իրենց տիկիներով միասին , անկից վերջն , այն երիտասարդ պատկերահանն որ մեզի մէկ երկու անգամ եկաւ . գիտես որ շատ պաշտելի տղայ մ'է այդ տղան . յետոյ մեր Արմենակն իր եղբորորդւոյն հետ որ Բարիզէն նոր եկած է հոս արձակուրդի ամիսներն անցունելու համար . շատ զուարճախօս անձ մը . երգեցիւնք , պարեցիւնք ու զբօսնեցանք , նամանաւանդ բաւական դարեջուր խմեցիւնք եւ շիտակն ըսելով ինձմէ զատ ամէնքը գինովցան :

Եւզինէ ինքզինքը դուրս ձգելու իրաւունք չ'ունէր . գլուխը քան թէ պատմեց այս ամէնը մէկ շունչով :

Խոսքով պարզապէս հմայուեր մնացեր էր :

Կարելի՞ բան էր որ մինչեւ հիմա մեկուսացման մէջ թողած լինէր իր կիներն ու ուրիշներ միայն ձանձրած ու պաշտած լինէին զայն . Խոսքով զգաց նախանձու որդն որ իր սիրտը կը կրծէր :

Այսչափ ատեն անփոյթ ու անտարբեր , գրեթէ թշնամացած մնալէ յետոյ , հաշտութեան ու համակրութեան ճամբան խիստ դժուարին երեւցաւ . ի՞նչ ձեւով պիտի ըսկըսէր յայտնել անոր իր յանկարծական փոփոխութիւնը :

Ճաշի ատեն էր . Եւզինէ զարմացաւ որ այն իրիկունը նախատեսեալ կոխը տեղի չ'ունեցաւ Խոսքովի կողմէ , ընդհակառակն գրեթէ համակրական ձեւ մը նշմարեց անոր վարմունքին մէջ . Խոսքով ճաշին վրայ սովորականէն աւելի զինի խմեց ու իր կնոջ կատակներ ըրաւ : Եւզինէ ասոր չէր սպասեր . հասկեցաւ որ զաղտնիք մը կար ու իր կանացի բնազդմամբ չ'ուշացաւ իր ամուսնոյն հաշտութեան փափազը գուշակելու :

Ինչպէս ամէն անձնապաշտ կին , Եւզինէ խիստ մեծ զաղափար ունէր իր անձին վրայ . վաղ կամ անազան կ'ուպասէր իր ամուսինն իր ոտից տակ տեսնել , ուստի Խոսքովի ընթացքը մեծ հաճութիւն պատճառեց , բայց անոր փաղարուչ խօսքերը գերազանց կերպով անհամ թուեցան իրեն : Խոսքովի ո՛չ գգուանքին եւ ո՛չ անուշ լեզուին կարեւորութիւն ընծայած էր երբէք , հետեւապէս անոր անձնատուր լինելը տեսնելով իր ցուրտ ու հակառակորդ բնաւորութիւնը մէկդի չի ձգեց :

Խորով, գինւոյ շոգիներէն մուրած, իր կինն համբուրել ուզեց. Եւգինէ խորին ու անդիմադրելի զգուանք մը զգաց այս մարդուն փայփայանքէն :

— Թող զիս կը խնդրեմ, ըսաւ սառն կերպով, այդչափ մօտուածենէն չ'եմ ախորժիր :

Ու իր սենեակն առանձնացաւ ու դուռը փակեց :

Յնորքներով, իղձերով ու խրատներով լեցուն գիշեր մ'եղաւ այն առաջին գիշերն յորում Խոսրով իր կնոջմէն հեռու մնալուն բոլոր կարօտն ու բոլոր դառնութիւնն զգաց :

Մտածեց որ ամուսնական կեանքը կարի ծանրակշիռ հանգամանք մը կ'զգեսուր իր յիմարական տենչանքին պատճառաւ :

Ինչպէս ըսինք, առանց Եւգինէի համակրող կամ համակրելի լինելն ստուգելու ամուսնացած էր հետն անոր ազատութիւնն յարգելու պայմանաւ. առեւտրական գործ մ'էր զոր կատարեր էր թիւերու ու շահու վրայ հիմնելով իր ամուսնութիւնն առանց սէրն ի հաշիւ առնլու, ու հիմա որ անզուսպ ու անբացատրելի կիրք մը զինքն իր կնոջ ոտքը կը ձգէր, կը խորհէր, մեծ մըտատանջութեամբ, թէ ի'նչ տեսակ ընդունելութիւն մը պիտի գտնէր հոն :

Եւգինէի բնաւորութեան նայելով, այդ ընդունելութիւն քաջալերիչ լինելէ խիստ հեռի կը թուէր :

Անցան մի քանի օրեր, յաղթական կինն իր զբօսալից ընթացքը փոխելու կողմը չ'էր բնաւ. Խոսրովի բոլոր ներողամտութիւնն ու բոլոր մտերմութեան փորձերն ի դերեւ ելան :

Եւգինէ կարծես զինքը ծայրայեղ միջոցներու դիմել տալու առիթ կ'որոնէր :

Խոսրովի քաղցրութեան ու համակրութեան վերջին ջանքերը կատարելէն կէս ժամ վերջն էր որ նորա կինը տիկնոջ մը հետ ժամագրութիւն մը պատճառ բռնելով դարձեալ մեկնելու կը պատրաստուէր :

Ամուսինն զգաց բարկութեան կրակն որ իր գլուխն ու միտքը կը յեղաշրջէր :

— Դուրս չը պիտի ելնես, գոչեց նա կիրքէն ու զայրութէն կուրցած, երբ որ տեսաւ որ Եւգինէ դուրս ելնելու վրայ էր :

— Ձեր կալանաւորը չ'եմ կարծեմ ու դուք բանտապահ մը չ'էք :

— Ամուսինդ եմ ու ի'նձ պիտի հնազանդիս :

Յրիտասարդ կինն այս ձեւերուն վարժուած չ'էր. ինքն ալ զայրանալ սկսաւ :

— Հնազանդութիւն, ըսաւ նա, հա՛, հա՛, շիտակը զիս խնդացնել սկսար, ես ո՛չ

քու աղախինք եւ ո՛չ ալ սպասաւորդ եմ,
քու ծառաներուդ հետ վարուէ այդպէս :

— Չո՛ւ պիտի ելնես դուրս , կը հասկնա՞ս ,
գոչեց էրիկն ինքնիրմէն բոլորովին դուրս
ելած ու բռնութեամբ քաշելով կնոջը թե-
ւէն :

Եւ գինէ դեղնեցաւ :

— Դո՛ւն ալ չափն անցուցիր , այստեղ
Խարբերդի լեռը չէ , ինծի նայէ՛ , ըսաւ
անոր , քու հայրենակիցներէդ շատերը մեր
տունն իբրեւ սպասաւոր պահած ենք , դուն
ալ կրթութեամբ անոնցմէ տարբերութիւն
չ'ունիս եղեր . վրաս ձե՛ռք վերցնել , ալ
ամէն ինչ վերջացաւ , հիմա հօրս տունը
պիտի երթամ . շո՛ւտ , շուտ կառք մը բեր ,
Յակո՛բ , պոռաց սպասաւորին՝ որ էրիկ կնոջ
մէջ տեղի ունեցած կռիւն հասկնալու հա-
մար գրան մօտ եկեր էր :

Կռիւը ծանր կերպարանք մ'ստացաւ .
Խոսրով իր կիրքէն չփոթած իր կնոջ վրայ
իշխանութիւն ունենալ կարծեր էր . անոր
պատասխանն իր դիրքին ինչ լինելն հասկը-
ցուց . Եւ գինէի պատասխանը պաղ ջուրի
փոշի մը պէս անոր խելքը գլուխը բե-
րաւ . արդարեւ անկէ հնազանդութիւն չ'էր
կրնար պահանջել . իրենց ամուսնութեան
առաջին պայմանն էր այդ . հօրը տունը վե-
րադառնալու սպառնալիքը մանաւանդ զին-

քըն ահաբեկեց ♦ անկից զստուիլն ուրիշնե-
րու , բացարձակապէս ուրիշներու յանձնել
էր զայն :

Խոսրով կացութիւնն ըմբռնեց . ինքն ա-
մուսնական իրաւունք ու իշխանութիւն չ'էր
ունեցած բնաւ ու հիմա որ իր կնոջ օժիտն
սպառեր լմնցուցեր էր , հիմա որ նեղու-
թիւնն հասնելու մօտ էր , կնոջմէն բաժա-
նումն աշխարհ իր վրայ ծիծաղեցնելու մի-
այն պիտի ծառայէր :

Այս գործնական ու դրական մարդն ա-
մէնէն մեծ վրդովմանց մէջ անգամ իր հա-
շիւը չ'էր մոռնար :

Հետեւապէս սպառնալեաց ձամբան թո-
ղուց աղաչանաց թելը ձեռք առնլու համար .
ո՛չ որ Խոսրովին չափ յաջողակ էր նուաստա-
նալու արուեստին մէջ : Պահ մ'առաջ խրոխտ
ու բիրտ լեզու գործածող այս մարդը չի
վարանեցաւ իր դէմքը փոխելու , աղաչելու ,
ու հեծկլտեալ ձայնով , աչերն արտասուա-
լից , իր կնոջ ոտքն ինկած , ներումն ուզելու
անկից :

— Գիտեմ , կը մրմնջէր նա հեկեկանօք ,
խառնուելու իրաւունք չ'ունիմ քեզի , Եւ-
գինէ , դուն ըս . տէրդ ես . մի՛ մեղադրեր
զիս . միշտ կը լքանես էրիկդ ու ուրիշներու
հետ կը զուարճանաս , անսպառիւ բան մը
չ'ես ըներ բնաւ , ադոր տարակոյս չ'ու-

նիմ, բայց ես ալ ամուսինդ եմ ու քեզ կը սիրեմ . . . :

Եւ արդարեւ կը սիրէր հիմա կատաղի ու մոլեգին սիրով . . . : Ու այս աղբսարկու եղանակին վրայ շարունակեց : Իր հեշտամուղ ու վայրենի իղձերը՝ կնոջը մօտ ըրած թախանձանօք աւելցան ու զայրացան, եւ այս յուզմունքով իր պերճախօսութիւնը կարծես թէ համոզիչ դարձաւ . Եւզինէի քով ծնրաղբեր, անոր ձեռքերը կը բռնէր ու կը համբուրէր, կը հոտոտէր, կը գգուէր . մանկամարդ կինը չէր պատասխաներ . այս աստիճանի անզուսպ կիրք մ'ազդած լինելն անոր անձնասիրութիւնը կը գգուէր :

Եւզինէ գոռոզացաւ ու սարսափեցաւ միանգամայն : Այս բուռն սիրոյ արտայայտութիւնն այն մարդու կողմէ որ իր էրիկն էր, վերջապէս զինք վախով լեցուց :

— Տղայ մի՛ ըլլար, ըսաւ վերջապէս իր էրիկն ոտքի վրայ հանելով, անդին նստէ, ծառայներն ի՞նչ կ'ըսեն հիմա :

Եւզինէի ձայնն հանդարտ, գրեթէ քաղցր էր . Խոսքով ուրախութենէ արբշիւ եղաւ :

— Ես քու գերիդ, քու շունդ եմ, Եւզինէ, ըսաւ այս յիմար մարդը բոլորովին խեղացնոր : Ինչպէս կ'ուզես այնպէս վարուէ հետս, բայց մի՛ սրդողիր ինձի հետ . զնա՛ զուարճացիր, դուն զուարճութիւնը կը սի-

րես, ես ալ քիչ մ'աշխատութիւն ունիմ . քէն մի՛ պահէր ինձի դէմ . սիրոյս չափազանցութիւնը զիս յուզեց . զիտես որ միշտ քու հաճոյիցդ համակերպած եմ :

Ու այն օրէն Խոսքով իր կնոջ ճշմարիտ գերին ու շունը դարձաւ . մեծ պահանջումներ չ'ունէր . իր կնոջ մէկ ժպտը կամ հողմահարով երեսին զարկած մի փոքրիկ ապտակն իրբեւ գգուանք կը բաւէր . այն օրուան կուրէն վերջն, ալ Խոսքով բնաւ չը համարձակեցաւ կնոջն ո՞ւր երթալն, որի՞ երթալն հարցնել կամ փնտռել . կնոջը բարի կամեցողութեանը ձգուած էր այս կէտն որ քիչ կարեւոր չէր, բանի որ Խոսքովի ձեռքն հասած անստորագիր նամակներ իր կնոջ այցելութեանց վրայ տարօրինակ մանրամասնութիւններ կը հաղորդէին :

Յանկարծ իր կինը տունէն ունեցած բացակայութիւնը վերջացուց . Խոսքովի անհաւատալի թուեցաւ առջի բերան ասիկայ . իրեն հաճելի՞ ըլլալու համար արդեօք Եւզինէ տունը կը կենար :

Ամուսնոյն այս քաղցր տարակոյսը շուտով փարատեցաւ . Պիւրութեամբ նշմարեց որ իր պրիչի ընկերներէն հարուստ վաճառական մը, որու հետ գիշերներն, ուրբաթ ու կիրակի օրերը կը միանային թուզթ սաղալու համար, իր կնոջ համակրութիւնը

չահած կ'երեւէր . հասկցուեցաւ որ Եւզինէ յատկապէս անոր թուղթի համար իրենց տունը գալիք օրերն այցելութեան չ'էր երթար :

Խօսքովի այս խաղի ընկերը՝ պարոն Մարեմեան՝ ամէնէն զիւրաւ յաղթուող ու ամէնէն առատածեօն թուղթ խաղացողներէն մին էր . նամանաւանդ Խօսքով քանիցս փոխառութիւններ ըրեր էր անկից եւ չ'էր կրցած դեռ վճարել . Մարեմեան առանց նախկին հաշիւները պահանջելու ի հարկին անոր ծառայութիւն ընելու պատրաստ մէկն էր . այսպիսի մարդ է մը անկարելի էր յարաբերութիւնը կտրել : Այր ու կնոջ սիրալիր ընդունելութեանը վրայ հետըզհետէ այս վաճառականը տանը մէջ անպակաս հիւր մը կամ լաւ եւս է ըսել տաւ նուտէր մը եղաւ : Խօսքով ցորեկուան ու իրիկուան ճաշի թող չ'էր տար զայն , վասն զի երկու հարիւր ոսկեոյ նոր փոխառութիւն մ'ընելու վրայ էր . նեղութիւնը շտապեր ու պահանջատէրները տան դուռը ձեռք առեր էին :

Բայց Եւզինէ ինչպէս զատուեր էր իր բազմաթիւ մտերիմներէն :

Եւզինէ քծնող ու հեզնող բնատրութիւն մ' ունէր . հարուստ վաճառականը մինչեւ ցայն վայր ծանօթ էր իրեն այս կամ

այն գերասանուհւոյն համար ըրած շօքալ ու խելառ ծախքերովը :

Եւզինէ իր ամուսնոյն բերնէն անգամ քանիցս լաւ էր անոր արտակարգ նուէրները :

Կանանց համար ամէն զոհողութիւն ընելու պատրաստ երեւցող այս մարդն իր հետաքրքրութիւնը շարժեց . մօտէն ճանչնալ կ'ուզէր թէ ի'նչ տեսակ անձ մ'էր այս Մարեմեանը . ուստի իր սովորութեան հակառակ ուրբաթ օր մը դուռս չ'ելաւ ու էրկանը պրիչի խաղին ներկայ գտնուեցաւ . անխելք մէկը կարծեր էր զայն , բայց տեսաւ որ խօսակցութեան մէջ բաւական հանճարեղ էր . իր համբաւաւոր ու մեծածախ արկածներուն վրայօք եղած կատակներու մասին՝ իշխանի մը վայելուչ համեստութեամբ ու փորձառու սիրահարի մը պատիւ բերելիք գաղտնապահութեամբ պատասխանեց նա :

Այս համեստութիւնն ու գաղտնապահութիւնը խիստ հաճելի երեւցան Եւզինէի . անոր վայելուչ շարժումներն ու ձեւերը , հազուստն ու խօսակցութիւնը լաւագոյն տպաւորութիւն յառաջ բերին :

Մարեմեան ամուրի հետեւապէս ազատ էր . երեսուն եւ հինգ տարեկան կար ու հետեւապէս պատանի սիրահարի մը նման

փոփոխամիտ չէր . իր էրկանը մտերիմն էր եւ հետեւապէս անոր հետ տեսնուելու մէջ դժուարութիւն չը կար . հարուստ էր եւ հետեւապէս քիչ մը բան կրնար վրայ առնուլ անկից : Հարկ է խոստովանիլ որ Եւգինէի այս տրամաբանութիւնը կատարելապէս ուղիղ էր :

Միւս կողմէ Մարեմեան այն վարպետորդիներէն էր որը խառնագնաց ու անառակութեամբ բեղմնաւոր անցեալի մը պաշտօնաւորութեամբ բեղմնաւոր անցեալի մը պաշտօնաւորութեան շնորհիւ , մէկ նայուածքով պաշտելի կին մը՝ պարկեշտ կնոջմէ մը կը զանազանեն : Եւգինէ՛ անտարակոյս՝ նետուելու որս մը չ'էր :

Երկու կողմն՝ այսպէս պատրաստուած՝ շուտով զիրար հասկցեր էին : Մարեմեան չ'էր ուշացեր Եւգինէի միւս տարփաւորներն ի բաց վանելու , ու ինչպէս ամէն յողթականի իրաւունքն է՝ պատերազմի դաշտն իրեն մնացեր էր միայն :

Ահա այս եղանակաւ Եւգինէ իր բացակայութիւնները վերջացուցած էր . սակայն կամաց կամաց յիմար ու անբացատրելի տըկարութեամբ մը կապուած էր իր նոր տարփաւորին . այս խրոխտ ու ամբարտաւան կինն՝ որ իր հոմանեաց հետ իր էրիկէն լաւագոյն կերպով չ'էր վարուեր մինչեւ այն ատեն՝ Մարեմեանի քովը կատուի մը պէս

զգուարից ու համբերող դարձած էր :

Սյս նոր կապակցութիւնն երկար չը տեսեց ամէն կողմ իմացուելու համար . Խոսրով լռելեայն ընդունած էր այս ծանր կացութիւնը . Մարեմեանի , Եւգինէի ու իր մէջ որոշուած ու ճանչցուած տեսակ մը ամօթալի դաշնադրութիւն մ'էր որ երեք կողմերն հաւասարապէս գոհ պիտի ընէր :

Քիչ մ'ատեն վերջն էր որ ի լրումն դըժբաղդութեան Խոսրովի պաշտօնը խնայողութեան համար կը ջնջուէր , եւ նոր պաշտօնի մը կոչուելու յոյսէ՛ ի զատ բան մը չ'էր մնար նմա :

Սակայն իր տան դրութիւնը փոփոխութիւն չի կրեց . հասարակութիւնը գարմացաւ ու ցաւեցաւ որ այս պաշտօնանկ մարդն իր առջի ճոխ ու բազմածախ ընթացքը կը պահէր : Փայլուն գիրքի հասնող մարդը միշտ ամէնուն նախանձը կը շարժէ իր շուրջն , ու ամէն անկում գոհացում մ'է զոր բազըն այդ շար հողիներուն կը նետէ :

Իր տան մէջ միայն Խոսրովի կացութիւնն ստորնացեր էր . նա՛ ծախուց տնօրէն մ'էր աւելի քան թէ այն աման մեծը :

Չի կայ վիճակ մը որոյ մարդ չի կարենայ սովորիլ ու հանգուրժել . Մարեմեանի շնորհիւ ու ստակով պահուող այդ տան մէջ Խոսրովի վիճակն անտանելի էր անտարա-

կոյս արժանապատուութեան զգացումն ունեցող մարդու մը համար :

Շաբաթին այն գիշերներն յորում Մարեմեան սովոր էր Խոսրովի տունն անցունել, այս տանտէր-այցելուին ամէն հաճոյքներէն եւ ոչ մին կրնար մոռցուիլ. ըստ սաստորներն ամէնէն լաւ կը ճաշնային այս աղնուական հիւրին մեծ նշանակութիւնը :

Մարեմեան՝ իր քաղաքավար ձեւերուն տակ՝ բիրտ ու լիրբ բնաւորութիւն մը կը ծածկէր. Սեգինէն ամէն գոհացում ստանալէ յետոյ երեւան ելաւ անոր անհանդուրժելի վարմունքն որում չէր սպասուեր բնաւ : Բարկութեան մը միջոցին, Մարեմեան՝ « կորսուէ, անպիտան » պտռացեր էր անոր երեսին :

Խեղճ կինը գիշերը մինչեւ ըյս արտասուեց. առաւօտուն Մարեմեան տեսաւ անոր կարմրած աչքերը, բայց բառ մ'անգամ չը գիջաւ արտասանել իր առջի իրիկուան կոպտութիւնն արդարացնելու համար եւ հետեւեալ իրիկունն ալ իր սովորութեան հակառակ տուն չ'եկաւ :

Խոսրով այս անհամաձայնութեան վրայօք պզտիկ հով մը առեր էր քովի սենեակէն լսելով անոնց բարձրաձայն վէճն ու կռիւը :

Մարեմեանի չի գալն իր կասկածը հաստատեց. այս մարդուն հետ աւրուելու ատենը չէր բնաւ ու անուղղակի կերպով եւ գինէն ստիպեց նամակ գրելու ու հաշտուելու անոր հետ :

Նրիտասարդ կնոջ խրոխտ բնաւորութիւնը ըիչ մ'ատեն ղիմադրեց այս նուատութեան փորձին. ո՛չ որ մինչև ցայն վայր, ամուսին կամ տարփաւոր, անտես ըրած էր իրեն զէմ այդ աստիճան կրթութեան պայմանները. բայց վախցաւ որ Մարեմեան անձնասիրութիւնը վիրաւորած նկատէ եթէ հաշտութեան առաջին խօսքն ինք չի բանայ. ինքնիրեն ըսաւ թէ իբրեւ կին՝ իրեն կ'իյնար ինչ որ ալ ըլլար իրաւունքն, առաջին դիմումը կատարելու և ինքնիրեն արդարացում մ'ալ գտնել աշխատեցաւ անոր կոպիտ վարմունքին համար. թերեւս անոր բարկացած, խիստ բարկացած մէկ վայրկենին հանդիպած էր. ինչո՞ւ մինչեւ այն օրն այս կերպ ընթացք մը չ'էր ունեցած. էրիկ մարդիկ շատ անգամ իրենց գործի մէջ ունեցած զայրոյթը տան մէջ երեւան կը հանեն. ու ասոնց պէս հազար ու մէկ պատճառ որոնեց կամ գտաւ Մարեմեանի նամակ գրելու համար : Մարեմեան հաշտուեցաւ. բայց նոր կռիւներ չ'ուշացան ու այս անգամ աւելի հեռու գացին. Սեգինէ նըշ-

մարեր էր որ Մարեմեան՝ իր յոյն սպասուհւ-
ւոյն պէտք եղածէն աւելի ուշադրութիւն
դարձուցած էր . ճամբայ տալ ուզեր էր ու
Մարեմեան բաց ի բաց դէմ էր կեցեր :

Օր մը կռիւն՝ այն աստիճան հասաւ որ
Մարեմեան ձեռք վերցուց Եւզինէին վրայ
եւ այս յիմար կինը չի կրցաւ ինքզինքը
պաշտպանել : Աւրիչներու դէմ խրոխտ ու
յանդուգն եղող այս կինն իր նոր տարիա-
ւորին դէմ արտասուելէ ու աղաչելէ ուրիշ
բան չ'ունէր եւ իր սէրը՝ տեսած կողուե-
թիւններէն նուազելու փոխարէն կ'աւելնար :
Մարեմեանն իր ձեռքէն յափշտակել կ'ու-
զէին ուրիշ կիններ : Ա՛չ , թոյլ չը սիտի տար :
Իր տարփաւորն՝ յագեցած՝ ու ձանձրացած՝
ցրտութիւն կը ցուցնէր , ուստի չ'էր կարող
իր սիրոյն յենլով բան մը պահանջել անկից
և անոր գթութեանը միայն կրնար ապաս-
տանիլ : Ինչո՞ւ չ'էր կրնար Եւզինէ՛ զատ-
ուիլ այս մարդէն : Դրամի խնդիրն իր աչ-
քին կարեւոր չ'էր բնաւ , բայց իրեն ամօթ
պիտի համարէր թէ որ իր տարփաւորն՝ ո-
րով այնքան պարծենցեր էր , զինքը լքանե-
լով ուրիշներու հետ ապրէր բացէ ի բաց :
Հետեւաբար ստիպուած էր անոր կամքին
համակերպիլ սպասելով որ յարմար առթիւ
ձեռք բերէ վերստին իր կորուսեալ աղքե-
ցութիւնը :

Իր յոյն սպասուհին սակայն տեսած քա-
ջալերութեամբը տանը մէջ ոտխաւէի մը
դարձեր էր . Եւզինէ չ'էր կարող բան մը
հրամայել անոր . քանիցս նա բացարձակ
կերպիւ դէմ դրեր ու պօռացեր էր իր տի-
րուհւոյն երեսին սպառնալով անմիջապէս
մեկնիլ . Եւզինէի ուզածն էր այս բայց կը
վախնար որ հետեւեալ օրը Մարեմեան զինք
պատասխանատու պիտի բռնէր այդ աղախ-
նոյն հեռացմանը համար . հետեւնապէս հարկ
էր լռել ու չի լսելու զարնել անոր յոխոր-
տանքը : Նա քիչ քիչ ամէն ծառայութիւն
վերջացուցած էր ու միայն Մարեմեան եկած
ատեն կ'երեւար ու անոր կ'սպասուարէր .
իսկ անոր հոն չ'եղած ատենը իր զարդա-
բանքը միայն կուտար տան տիրուհւոյ պէս :
Եւզինէ դեռ բացորոշ կերպիւ անոր յարա-
բերութիւնը չ'էր տեսած իր տարփաւորին
հետ բայց մեծապէս կը կասկածէր որ համ-
բոյրի ու գրկապնդման գլուխները շատոնց
ի վեր կը կարգային նոքա առտուները Մա-
րեմեանի սենկակին մէջ՝ ուր սպասուհին հա-
զուստները մաքրելու ու նախաձաշ տանե-
լու համար կ'երթար , մինչդեռ ինքը՝ շնչհատ,
գունաթափ ու դողդոջուն , ոտքին ծայ-
րերուն վրայ կոխելով , փակ դռան ետե-
ւէն անոնց խօսակցութիւնն ըմբռնել կը
ջանար :

Այո՛, պարտաւոր էր դեռ քիչ մ'ալ համբերել . թէ որ նոր կոխ մ'ըլլար Եւզինէ՞ իր սպասուհւոյն քով պզտիկ պիտի մնար . ուստի օգուտ չի կար անտարբեր դարձող տարփաւորի մը գլխու ցաւ տալէ . իր արցունքն՝ որ անպակաս դարձեր էր, մէկու մը չը պիտի ցոյց տար . դաղտնի, ամէնէն գաղտնի պիտի պահէր իր ցաւն ու վիրաւորեալ անձնասիրութիւնն եւ գոհ ու զըւարթ դէմը մը պիտի զգեսնուր առաջուան պէս ամէնուն դէմը :

Փարունն եկեր էր եւ Մարեմեան՝ Խոսրովի նոր պաշտօնի մը համար տշխատելով հանդերձ ծախուց մոտին դժուարութիւն յարուցած չ'էր : Վերին Վոսիորի մէջ տուն բռնել որոշեր էին այն տարի և Եւզինէ՛ որ Եէնի-Մահալլէն կը սիրէր՝ առաջարկեց հոն անցունել ամառն :

Եէնի - Մահալլէ՛ ամառը մեծ մասամբ հայաբնակ՝ հայաբնակ վայրերու ամէն թերութիւններն կամ առաւելութիւններն ունէր . հեռաւորագոյն գիւղերու մէջ ամէն ընտանեաց մէջ անցած դարձածը հոն կը պատմուէր ու կը բննուէր : Հոն՝ Մարեմեան՝ քիչ ատենէն վերջը տեղեկացաւ ի մէջ այլոց, թէ Տիգրան՝ որոյ մի բանի անգամ ջուրերը հանդիպեր էր նորատի կնոջ մ'ընկերացած, հարուստ փաստաբան մ'էր որ

Պէոյիւք - Տէրէ կը բնակէր եւ ըստ երեւութին այդ ընկերացած կնոջ տարփաւորը :

Մարեմեան՝ մէկ տեսնելով Սուրբիկի հաւներ էր . անոր վրայ գտեր էր միայն այն պարզութեան շնորհն որ պարկեշտութեան յատուկ է, եւ որ անառակ մարդոց աչքին ամենէն մեծ հրապոյրն է : Իր մեծ ճանաչողութեամբ, հասարակաց տեղեկութեան հակառակ, անմիջապէս հասկցեր էր որ անոր երիտասարդ ընկերը տարփաւորի մը ձեւը չ'ունէր բնաւ :

Աւելին գիտնալու հարկ չի կար այս մարդուն՝ Տիգրանին բարեկամուհւոյն ետեւէն իյնալու համար անմիջապէս անոր հետ տեսնուելու միջոցները փնտռեց բայց չի յաջողեցաւ . իր ծանօթ ընտանիքներէն հազիւ մի բանիին հետ Սուրբիկ գլխի բարեւ մը կը փոխանակէր . իսկ անոր այցելութիւնները չի կայի պէս բան մ'էին : Մարեմեան այս կողմէն յուսակտուր՝ Սուրբիկի ամէն տեղ հետեւելու ճամբան ձեռք առած էր, այնչափ որ իր պահանջող ու ամբարտաւան նայուածքը նորատի կնոջ ուշադրութիւնը գըրաւել ու գինքն անհանդիստ ընել սկսաւ :

Մարեմեան սխալած չ'էր Տիգրանի վրայ . յօք ունեցած կարծեացը մէջ : Տիգրան՝ անշուշտ կը սիրէր, խանդակաթ համակրու-

Թեամբ կը պաշտէր Սուրբիկը, բայց դեռ սիրոյ բառ մը արտասանած չ'էր անոր երեսին :

Անցեալ օրերը, անոր ամուսնոյն վիճակը Սուրբիկի անպաշտպան կացութիւնն եւ այս տեսակ հազար նկատումներ՝ որք Մարեմեանի պէս մարդոց համար կին մը նուաճելու նոյնչափ պատճառներ են, Տիգրանի աչքին այնքան բացարձակ արգելքներ էին. իր սրտին խորը պատկեր մը կար զոր կը պաշտէր, ու այդ պատկերը թերեւս Սուրբիկինն էր. բայց իր վարմունքն եղբայրական դորովոյ սահմանը չը պիտի անցնէր :

Սուրբիկ իր պաշտպանութեան յանձնը ուած էր եւ Տիգրան որ բաջ գիտէր թէ որքան մեծ է կանացի տկարութիւնը, նա խանձոտ եղբոր մը պէս կը հսկէր անոր վրայ :

Գիւղ տեղուանքը իրարու ծանօթ եղողները չուտով կը տեսնուին : Խոսքով Արամ էֆէնտին ու Տիգրանը կը ճանչնար եւ կիրակէ առաւօտ մը, եկեղեցիէն վերադարձին այցելութիւն մը տուաւ քէօշկը :

Տիգրան հոն էր :

Երկու տարիէն աւելի էր որ այս երկու հին դասընկերները զիրար տեսած չ'էին : Պաշտօնի մէջ Խոսքովի հպարտութիւնը Տիգրանը բոլորովին իրմէ հեռացուցած էր .

բայց անոր անկումը, նեղութիւնը զորս երիտասարդ փաստաբանը քանիցս առիթ ունեցած էր իմանալու իր բարկութիւնը մոռցընել տուած էին : Դպրոցական այս միակ ընկերը մնացեր էր պատանութեան տարիներէն. և Տիգրան զայն տեսնելուն չի կըրցաւ իր յուզմունքն ու ուրախութիւնը զըսպել : Խոսքով ալ անտարբեր չի կըրցաւ մընալ. այո՛. միշտ այն անկեղծ բարեկամն էր այս երիտասարդն որոյ այնքան բարիքը վայելած էր :

Ձիրար հարցուցին, իբրեւ թէ ճամբորդութենէ վերադարձած լինէին .

— Եէնի - Մահալլէ եկանք ձեզի մօտ ըլլալու համար, ըսաւ Խոսքով, յուսամ որ զոնէ ասկէ վերջը չես մոռնար զիս :

— Ո՛չ, ո՛չ, պատասխանեց Տիգրան, բայց դուն ալ մեզ մինակ մի թողուր. երբեք հոգի եղանք հիմա, Արամ էֆէնտին շատ դուրս չ'ելներ, բայց դուն կրնա՞ր զգալ զոնէ պո՛ւ մը կրնանք դարձնել եւ ժամանակը կ'անցնի :

Պրիչի բառթի՞ մը. ասիկա Խոսքովի համար հաճելագոյն առաջարկ մ'էր :

Այսպէսով հաստատուեցաւ նորէն տեսութիւնն այս երկու վաղեմի ընկերաց մէջ. Խոսքով քանիցս եկաւ Տիգրանի տունն եւ մի քանի անգամ Եւզինէին հետ միասին

պատահեցան անոր Պէօյիւր - Տէրէյի մէջ • Տիգրան պարտաւորեցաւ փոխադարձ այօցելութիւն մը տալ, բարեբաղդաբար Մարեմեան հոն չ'էր ու երիտասարդը չ'էր գիտեր իր բարեկամին ընտանեկան կացութիւնը •

Տիգրան՝ Խոսրովի հետ կրկին տեսնուելովն իր առջի անձնուիրութեան փորձը տըւաւ : Բարեկամներ ունէր ազգեցիկ •

— Դատական պաշտօն մը կ'ուզե՞ս, ըսաւ օր մը Խոսրովին, թերեւս կրնամ առնուլ, բայց դուրս երթալ հարկ պիտի ըլլայ :

— Ինչ ալ ըլլայ կ'ընդունիմ, պատասխանեց նա, պաշտօնանկ մնալը զիս կը յուսահատեցնէ :

Ու շաբաթ մը անցնելէ վերջը Սեբաստիոյ մէջ երեք հազար զրուշով պաշտօնի աւետիսը ստացաւ :

Խոսրով յիրաւի յուսահատ վիճակի մը մէջ մնացեր էր • աշուրներն լեցուեցաւ երբ իր բարեկամն եղբայրութեան այս վերջին ապացոյցը տուաւ : Անոր ձեռքը համբուրել ուզեց . . . : Եւգինէ ալ իր շնորհակալութիւնը յայտնեց : Եւ այս միջոցաւ իրենց կապակցութիւնն աւելցաւ :

Մարեմեանի փափագած բանն էր այս մտերմութեան հաստատութիւնն • միայն այս

հինաւուրց անառակը կը վախնար թէ խիստ գէշ տպաւորութիւն մ'ըրած կրնար ըլլալ Տիգրանին վրայ ամէն կողմ Սուրբիկի հետեւած ըլլալովը ու երբ հասկցեր էր թէ Արամ էֆէնտիի կինն՝ անոր բացառիկ պաշտպանութեան ներքեւ էր, որոշեր էր Տիգրանի թէ ոչ բարեկամութիւնը գոնէ չեզոքութիւնն ստանալ :

Միւս կողմէ Եւգինէ խորամանկ ու բարկացող էր • ուստի իր այս նոր տարփանց վրայ ո'ւ է կասկած գտնուելու չ'էր, վասն զի Եւգինէ կարող էր ի դերեւ հանել իր բոլոր խորհուրդներն եւ գիտէր թէ նա իր սէրը պաշտպանելու համար ամէն միջոց ի գործ դնելու մասին վարանող կին մը չ'էր •

Ուստի ուշադրութիւն ըրաւ Տիգրանի այցելութեան եկած ժամանակ Եւգինէի տունը չի գտնուելու, միանգամայն դադրեցուց այն ուշագրաւ հետազոտութիւնը զոր Սուրբիկը դուրսը պատահած ժամանակ սկսեր էր : Կատարեալ, խաբուելու չափ կատարեալ անտարբերութիւն ցոյց տուաւ անկից վերջն ամէն ատեն որ հանդպեցաւ անոր :

Արարատեան Բնկերութեան դաշտային պարահանդէսն ամէնուն միտքն է դեռ •

Պոլսեցւոց այս տեսակ շքեղ երեկոյթ մը քիչ անգամ պատրաստուած է :

Շարաթ մ'առաջ ամէն ոք պատրաստութեան մէջ էր : Հայերը շրայլութեան մէջ միշտ յառաջադիմութեամբ փայլած են : Հաշիւ եղաւ որ այն շարթուն Բերայի խանութներուն տարւոյն մէջ ամենէն շատ առեւտուրն ըրած միջոցն էր :

Ամէն կողմ խօսակցութեան նիւթն այս պարահանդէսն էր :

Արամ էֆէնտի տունն ալ՝ ուր պրիշի բաւթի մը կը խաղցուէր, նոյն երեկոյթին վրայ էր խօսքը :

Սուրբիկ՝ իր բոլոր փափագին հակառակ երթալու կամք չ'էր յայտներ : Տիգրան բան մը չ'էր ըսեր ու Խոսրով միայն կը պնդէր երիտասարդ կնոջ որ ներկայ գտնուի :

— Իմ կինս ալ հոն պիտի ըլլայ, կ'ըսէր, տեսակցութեան առիթ մը կ'ունենաք :

Իսկ Արամ էֆէնտի բռնադատեց որ Սուրբիկ անպատճառ երթայ պարահանդէս : Հարկ եղաւ ուրեմն համակերպիլ : Բայց կէս գիշերէն ժամ մը վերջը պիտի դառնար :

Պարահանդէսի գիշերն է :

Արտակարգ ոգեւորութիւն կայ Պէոյիւբ - Տէրէյի ամուսնը : Պարտէզն անհամար ջահերով ու լոյսերով կը փայլի ընդարձակ ամ-

փիթատրոնի մը նման . բազմութիւնն ամէն կողմէ հետզհետէ կը հասնի ու երաժշտութիւնն իր եռանդուն ձայնը կը լսեցնէ : Մէկ նայուածքով կրնաս հոն նշմարել ամէնէն բարձրագիր Հայերն իրենց ընտանեաց հետ միասին . պարի վայրն ամէն կողմ լեցուն է :

Մառի մը տակ երիտասարդ մը ու մանկամարդ կին մը կը խօսակցին :

— Տիկին, կ'ըսէ երիտասարդը ձեռքերն աղաչաւոր դիրքով մը միացուցած, գիտէք որ շատոնց ի վեր կարօտ ու զուրկ թողուցիք զիս ձեր տեսութենէն . ափսոս, առջի օրուընէ գուշակեցի իմ բաղդս, բայց չի կրցայ մէկդի ընել զայն . տարիէ մը ի վեր հոս, հոս միայն հանդիպեցայ ձեզի :

— Թողէք զիս, կ'աղաչեմ, կը պատասխանէր կինն, այս տեղ առանձին մնալնիս վայելուչ չ'է, ամուսինս կրնայ գալ . . . :

— Ատեն մը այդպէս չ'էիր խօսեր ինձ հետ, Եւգինէ, կը կրկնէր երիտասարդն, ամուսինդ չ'է թէ ուրիշ մը :

— Արմենակ, գոչեց կինը բարկութեամբ :

— Թող չ'եմ տար զքեզ այս գիշեր, կ'ուզէ վառեմեան գայ կ'ուզէ Մարեմեան : Իմ իրաւունքս աւելի հին է :

— Ամուսնոյս ըովը տար զիս, ապա թէ ոչ բաշուէ :

— Ես այդ տեսակ բան չ'եմ գիտեր . ու այս ըսելով երիտասարդը նորափ կինը գրռկելու ու համբուրելու կ'աշխատէր :

Եւ գինէի համբերութիւնն սպառեցաւ :

— Անդին գնա , հիմա պիտի պոռամ :

— Համբոյրով մը բերանդ կը գոցեմ :

Կինը ճիչ մ'արձակեց :

Երիտասարդ մը , որ այն կողմէն կ'անցնէր , մտեցաւ . Արմենակ մէկդի քաշուեցաւ , մինչդեռ կինը շուարած ու զայրացած գոչեց .

— Ազատեցէ՛ք զիս սա անպիտանին ձեռքէն :

Տիգրանն էր մտեցողը . տեսաւ ու ըմբռնեց տեղի ունեցած տեսարանն :

— Ուրիշ տեղ մը տարբեր կերպով պիտի վարուէի ձեզ հետ , հոս զձեզ վռնտել տալով պիտի բաւականանամ :

Եւ այն միջոցին անցնող հիւրամեծարի մը միջոցաւ դուրս ընել տուաւ և Եւգինէն թեւն առնելով պարի դաշտը դարձաւ :

Մազուրբա մը կը զարնուէր . աչքով Սուրբիկը փնտռեց , տեսաւ որ Խոսրովի հետ էր : Ինքն ալ Եւգինէի հետ քիչ մը պարելու ուզեց :

Ոչ ոք Եւգինէի չափ քաջ պարող էր . Տիգրանի թեւին վրայ բան մը չի կար ծանրացող , այլ իր երեսին հեշտաւէտ բուրում

մը ու իր քովը զմայլիչ հիւր մը որ պարողներու յորձանքին մէջէն իրեն հետ կը սրանար :

Տիգրան բնաւ այնքան հաճոյք զգացած չ'էր . շրջան մը միայն ընել ուզեր էր ու այն ատեն միայն կեցաւ երբ երաժշտութիւնը դադրեցաւ . անկից վերջը քատրիլ ու յետոյ վալս մը պիտի լինէր ու այս վալսին համար խօսք տուին իրարու եւ պիւֆէն ուղեւորեցան :

Սուրբիկ հոն էր Խոսրովի թեւը մտած :

Տիգրան անշուշտ իրաւամբ խորհեր էր թէ չարախօս բազում թեան մը մէջ , ուր արդէն տեսակ տեսակ տարածայնութիւններ կը դառնային իր մասին , որքան ալ մաքուր ու անկեղծ լինէր իր սիրտը , պատշաճաբոյն էր որ Արամ էֆէնտիի կինը մինչեւ վերջն իրեն հետ ի միասին չի տեսնուէր ու տեղի չի տար նորանոր բամբասանաց :

Ինչե՛ր չ'էին ըսեր մինչեւ այն ժամանակ . Տիգրան Սուրբիկի սիրահարն էր . ո՞վ կը տարակուսէր ադար . եւ ահա նորափ կինն , որ իր հիւանդ ու ծերունի ամուսինը լքանելով վարձկան ձեռքերու , ինք կուգար զրօսանաց վայրերն իր տարփաւորին հետ զուարճանալու : Այս զրպարտութիւնները պիտի լինէին հետեւեալ օրն ամէն կողմ տարածուելիք արձագանքն ու Տիգրան մեծա-

պէս իրաւունք ունէր իր զգուշաւոր ընթացքին մէջ :

Սուրբիկ միայն Տիգրանի իր մօտը չի գալուն այս բացատրութիւնը չի տուաւ . լաւագոյն բացատրութիւնն անոր թեւի գեղանի ու շնորհալի կիներ էր եւ ուրիշ պատճառ փնտռելու հարկ չի տեսաւ :

Դպրոցէն փախչող տղու մը պէս այն իրիկուն Սուրբիկ անպատում բերկրութիւն ու խնդում զգացեր էր պարահանդէս գալուն : Ո՛րքան ատենէ ի վեր զուրկ էր մնացեր այս տեսակ հաճոյքներէ , ու ասպետական դղեակի մը տիրուհւոյն պէս առանձին ու մարդէ հեռու ապրեր էր իր քէօշկին մէջ :

Պահ մը մոռցաւ իր կենաց մառախլապատ հորիզոնն ու ընտանեկան յարկին հոգն ու մտամուրը պարահանդէսին շողողուն փայլին առջեւ :

Փաշուած ապրելով , իր ծանօթները գըրեթէ մոռցեր էր . բայց Տիգրանի ընկերութիւնը կը բաւէր անոր . Սուրբիկ պարելը կը սիրէր , նա մանաւանդ վախն որ տեսակ մը թաքուն ու անբացատրելի ախորժ ունէր իրեն համար :

Ո՛րչափ մեծ եղաւ իր զարմանքն , երբ պարահանդէս մտած չի մտած , Տիգրան իրմէ բաժնուեցաւ մէկ մ'ալ իր քովը չի գա-

լու համար : Ո՛վ էր այդ Եւզինէն ուսկից եւ ըրտասարդը չ'էր կրնար զատուիլ . մազուրբայի ատեն նշմարել կարծեց թէ Տիգրան խիստ մօտէն կը գրկէր իր վայելչագեղ ընկերուհին :

Սուրբիկ նեղացաւ . ինքն ալ աղէկ մը չ'էր գիտեր ինչ պատճառաւ մինչեւ այն ժամ երիտասարդն ո՛ր եւ է սիրային խոստովանութիւն մ'ըրած չ'էր իրեն . թերեւս ինքը նշմարել կարծեր էր անոր ներքին համակրութիւնն ու կ'երեւէր թէ բոլորովին սխալած էր այս ենթադրութեան մէջ :

Սուրբիկ միշտ նոյն դիւրագրգիռ կիներ էր : Այն գիշեր խմած մէկ երկու քօնեաքն անոր գլխին զարնելու մօտ էր , երբ Տիգրան մօտեցաւ եւ Եւզինէն Խոսրովին յանձեց անոր վախի խոստումն յիշեցնելով :

Սուրբիկ փոթորիկ մը զգաց իր սրտին մէջ այս խոստումը լսելով . ի՛նչ , այդքան չի կարենալ բաժնուելու չափ ախորժելի մէ՞կն էր այդ մանկամարդ կիներ եւ մէկ նայուածքով ճանչցաւ անոր վրայ երիտասարդ մը գլխէ հանելու բոլոր առաւելութիւնները :

Իր ներքին խռովութիւնն այնքան աւելի սաստիկ եւ ուժգին եղաւ որքան Տիգրանի չէր կրնար հաղորդուիլ : Կը մտածէր որ իր բարեկամին անկախութեան դպչելու իրա-

ւունք չ'ունէր . նա ազատ էր իր ուզածին հետ պարելու կամ խօսելու . զինքը պարաս հանդէս բերել խոստացեր ու բերեր էր եւ ադկէ աւելի բան մը չ'էր կրնար պահանջել անկից :

Սփսո՛ս , մինչեւ այն վայրկեանը Տիգրանը գոնէ իրեն անձնուէր մէկն համարած էր . եւ առաջին առթիւ կը տեսնէր թէ ո՞րքան խաբուած էր իր համոզման մէջ : Իր վիրաւորեալ հպարտութիւնն արգիլեց զինքն ո՛ր եւ է բան մը զգացնելէ Տիգրանի . ի՛նչ օգուտ եթէ իր ստիպման վրայ երիտասարդն այդ կնոջ հետ չը պիտի պարէր :

Սուրբիկ՝ այս երկրորդ անգամն ըլլալով՝ կը սխալէր իր դատաստանին մէջ :

Տիգրան յիմարի մը պէս կը սիրէր զինքը :

Արամ էֆէնտիի կինը պարահանդէսին մէջ գտնուող տիկնանց մէջ թերեւս ամենէն գեղանին էր : Մեծագին չ'էր անոր հագուստը . պարզ քուէմ կաղէ չըջազգեստ մը հագած էր նա վալանսիէններով շտկուած, որոյ թափանցիկ ու անգաղտնապահ հիւսուածքը՝ մարմարի պէս սպիտակ մարմնոյ մը բոլոր հեշտալի հրապոյրը կը մատնէր . իր սիրուն գլուխը , դալուկ դէմքը , դիւրբարեկ հասակն , երազի մէջ երեւցող ու խուսափող տեսիլ մը կը յիշեցնէր զոր կորսնցնեն-

լու վախով մարդս կը վախնայ ձեռք դըպցնելու :

Զմայլման ու յափշտակութեան շունջ մը կը բարձրանար երիտասարդաց ու պատանեաց մէջ անոր անցած ատեն . ամէնքն անոր ընկերացող անձին շուրջը կը դառնային անոր ներկայացուելու , հետը շրջան մը ընելու կամ բառ մը փոխանակելու յոյսով , իբրեւ նորատեսակ արքանեակներ՝ որոց այս շողողուն ու հրավառ աստղը ձեռքողութեան ընդհանուր կեդրոնն էր :

Լուռ ու անխօս , Տիգրանի հետ յառաջացաւ նա ծառուղոյ մը մէջ . երիտասարդքն իր թեւին վրայ կ'զգար անոր փափուկ ու քնքուշ թեւին ջերմութիւնն որ ելեկտրական հոսանքի մը պէս իր երակներուն կը հաղորդուէր . կանգ առին ծառի մը մը . թին ու խորհրդալի ստուերին տակ . քիչ մը հեռու ուրիշ զոյգեր կը պտըտէին կամ կը խօսակցէին :

Սուրբիկ տրտում ու խոհուն կ'երեւէր :

— Ի՞նչ ունիս այս իրիկուն , հարցուց երիտասարդը մտահոգ :

— Ոչինչ , մրմնջեց նա :

— Ձե՞ս ուղեր պարել :

Սուրբիկ դժկամակութեան ձեւ մը տեսնել կարծեց այս հարցման մէջ :

— Ո՛չ , պատասխանեց նա , այս գեղե-

ցիկ գիշերին աւելի կ'ուզեմ երկինքն ու ծովը դիտել :

— Թէ որ Խոսրով էֆէնտիէն չ'ախորժեցար , ուրիշ բարեկամի մը յանձնեմ ըզզ :

Այս վերջին խօսքը խիստ ծանր եկաւ Սուրբիկին . սիրտը դառնութեամբ լեցուեցաւ ու կսկծալից հառաչանք մը զսպեց իր սրտին մէջ : Ալ տարակոյս չի կար . երիտասարդը չ'էր սիրեր ու չ'էր սիրած զինքըն . ու հիմա պարահանդէսին մէջ իր գլխէն նետել կ'ուզէր զինքն աւելի ազատ գրօսնելու համար : Ու այս տեսակ սեւ մտածումներ անոր շիտթած միտքը գրաւեցին , ուրախ ու զուարթ եկեր էր պարահանդէս . երիտասարդական բաղձանքներն՝ իր սրտին մէկ անկեան մէջ թաղուած՝ ի գուր պահ մը արթննալ սկսեր էին . հիմա կ'ըմբռնէր թէ հարկ էր մոռնալ , վերջնապէս մոռնալ երջանկութեան վաղանցիկ յոյսերն . ինքը , խեղճ կին , ո՞վ ունէր աշխարհիս վրայ . ամէնէն լքեալ ու երեսի վրայ ձգուած տարաբաղդ էակ մ'էր :

— Ո՛չ , ըսաւ հաստատ ծայնով , Խոսրով էֆէնտի անհաճոյ մէկը չ'է . իրեն տար զիս :

Քիչ մ'ալ պտըտեցան անշունչ , առանց բառ մ'աւելցնելու . երաժշտութիւնն անդիէն վալսի նշանը տուաւ . պարողներն

հետզհետէ գացին . Սուրբիկ յուսաց վայրկեան մը որ երիտասարդն իր ըով պիտի մոռնար Եւգինէի տուած խոստումը . բայց իր պատրանքն երկար չի տեւեց . Խոսրով իր կնոջ հետ իրենց մօտ գալու վրայ էր ու Տիգրան դէպի անոնց յառաջացաւ .

— Չ'էք մոռցած խոստումնիդ անշուշտ , Տիկին , ըսաւ :

— Ես ալ եկայ ձեզ զայն յիշեցնելու , պատասխանեց Խոսրովի կինը :

Երկու բարեկամներն իրենց ընկերուհիները փոխանակեցին եւ Տիգրան շուտով վալսի յորձանքին մէջ անյայտ եղաւ :

— Ես չ'եմ պարեր , Տիկին , ըսաւ Խոսրով , եւ կը վախնամ որ զձեզ չի նեղացընեմ :

— Ես ալ պարելէ շատ չ'եմ ախորժիր . արդէն շատ կենալու դիտաւորութիւն չ'ունիմ . ամուսնոյս խօսք տուի շուտով դառնալու ու թերեւս հիմա ինձ կ'սպասէ :

— Ո՛հ , դեռ շատ կանուխ է , աւելցուց Խոսրով :

Ու այսպէս քիչ մը ատեն խօսեցան դեռ պարահանդէս եկող կանանց , անոնց յարգարանաց , Արարատեան ընկերութեան ու այն գիշերուան հասոյթին վրայ :

Խոսրով հասկցաւ որ Սուրբիկ նեղացած էր , բայց չ'էր գիտեր ի՛նչ պատճառաւ .

Թերեւս պարելը կը սիրէր, ու ինքը չ'էր կրցած անոր հաճոյանալ :

Այդ միջոցին Մարեմեանը տեսաւ որ իւրենց մօտ մի քանի հոգւոյ հետ կը տեսնուէր . Մարեմեան մօտեցաւ ու իբրեւ թէ նոր նշմարելով իր բարեկամին ըովի կիներ, խոնարհութիւն մ'ըրաւ անոր առջեւ . խոնարհութիւն՝ որ սովորական կերպիւ գլուխ ծռելէ աւելի մանկամարդ տիկնոջ համար զմայլում ու անձնուիրութիւն կը նշանակէր :

Սուրբիկ անմիջապէս ճանչցաւ մէկ բանի ամիս առաջ ստուերի պէս ամէն կողմ իրեն հետեւող անձը : Բարեկիրթ մէկը կ'երեւէր նա . լաւ կը խօսէր ու քաղաքավար ու յարգալից մէկն էր :

— Հիմա շատ չ'եմ պարեր ալ, Տիկին, կ'ըսէր նա, այնպիսի խոնարհ ձայնով մը որ տարօրինակ կերպիւ փայփայիչ չեշտ մը ունէր . եւ լիտակն ըսելու համար թերեւս չ'եմ կրնար պարել . պատանեկան աշխոյժն ու եռանդը շատոնց լքեցին զիս, աւելցուց նա արտում ու գլխիկոր :

Պատանի մը չ'էր դիմացինն անշուշտ . բայց Սուրբիկ առողջութեան բոլոր ձիրքերով օժտեալ, հասուն տարիքի տէր մէկը տեսաւ զնա : Տղայ մը չ'էր Տիգրանին պէս անխոհեմ ու սնզուսպ . փորձառու ու հաս-

տատամիտ մէկը կը թուէր : Իր բոլոր վարմունքին մէջ Սուրբիկի համար վիրաւորիչ լինելիք բառ մը կամ ակնարկ մը չ'ունեցաւ եւ բնականաբար երիտասարդ կնոջ հետ ըջազայութիւն մ'ընելու առաջարկը չի կըրցաւ մերժուիլ :

Թեւ ի թեւ, սովորական խասակցութեամբ մը զբաղեալ, պտոյտ մ'ըրին պարտեզին մէջ ու պիւֆէէն մէկ մէկ ըմպելիք առին . Սուրբիկ ամէն մը ուզեց . բայց ներկայացուած հեղուկն՝ սխալմամբ անշուշտ՝ ապսէնթ ըլլալու էր, որ անմիջապէս անոր գլխուն զարկաւ . մէկ վայրկեանի մէջ պարտեզն, երկինքն ու ծովն իր մուրեալ ակնարկին առջեւ իրարու խառնուեցան, ոտքին ներքեւէն հողը խոյս տուաւ կարծես, ու խեղճ կիներ Մարեմեանի թեւէն ի զատ յենակէտ մը չը տեսաւ իր շուրջը :

— Այս ի՞նչ տեսակ ամէն էր, թոթովեց Սուրբիկ :

— Ինձ տուէք գաւաթնիդ, ըսաւ Մարեմեան զարմանք ու վրդովում կեղծելով . բայց այս ամէն չ'է, աւելցուց նա կաթիլ մը բերանն առնելէ վերջը . ապսէնթ է . սակայն անհոգ եղիք, Տիկին, ամէն պարագայի մէջ կատարելապէս անմլաս ըմպելի մ'է, կ'պահովեմ զձեզ այս մասին . ու այս ըսելով խստիւ յանդիմանեց սպասաւորը :

Սուրբիկ բան մը չը լսեց . այն աստիճան սաստիկ էր յուզմունքն . հեղձուցիչ մթնոլորտ մը կար որ իր շնչառութիւնը կ'արգիւտէր . ծաղիկներուն բուրումը մէկ կողմէն , թաշկիւններու վրայի անուշահոտութիւնները միւս կողմէն ու այս սաստիկ ըմպելիքն առաջուց առած քօնեաքններուն վրայ աւելնալով՝ պզտիկ դիւնովութիւն մը յառաջ բերին :

Մարեմեան չփոթեցաւ ու ուրախացաւ , իր յուսացածէն աւելին յաջողեր էր . իր թեւերուն մէջ առնել ուզեց այս թանկագին բեռն ու առանձին ու ամայի տեղ մը փնտուեց մտքովը դայն յուշարեւելու համար . բայց երիտասարդ կինն անմիջապէս աւելորդ դատեց զանոնք . իր չփոթութեամբն հանդերձ զգաց որ այս մարդը խիստ վտանգաւոր ու խիստ խորամանկ մէկն էր . Տիգրանի դէմ սրդողած ու նեղացած պահուն վայրիկ մը շնորհքով մէկը երեւցեր էր նա իր աչքին , բայց չ'ուշացաւ ինքնիրեն խոստովանելու թէ զինքը շարունակ հալածող այդ մարդուն դիտաւորութիւնն անպարկեշտ եւ իրեն անոր հետ տեսութիւնն անվայել էր :

Բաւ է որ կին մ'ուզէ իր պատիւը պաշտպանել որպէս զի յաջողի անոր դէմ պատրաստուած ամէն փորձ ի դերեւ հանել :

Սուրբիկ այս մարդուն մօտ ինքզինքն առանձին գտնելով վախցաւ ու այս վախը բոլորովին իր խելքը գլուխը բերաւ :

Ս, յո՛, յանցաւոր էր , — այսպէս խորհեցաւ երիտասարդ կինը ներքնապէս — , այսպիսի կասկածելի անձնաւորութեան մը ընկերանալուն , եւ Տիգրանի առաջ ինքզինք արդարացնելու միջոց մը չի կրցաւ գտնել իր մշտքին մէջ : Ի՞նչ պիտի ըսէր , ի՞նչ բացատրութիւն պիտի տար անոր հետ ընկերանալուն :

Որքան մեծ տարբերութիւն այս երկու մարդոց մէջ . երկուքն ալ զինքը կը սիրէին . այսպէս գոնէ կը կարծէր ինքը . բայց մինչդեռ Տիգրան ամէն ազատութիւն ու դիւրութիւն վայելելովն հանդերձ երկու տարուան մէջ զինքը նուիրական էակի մը պէս յարգեւէ ու պաշտեւէ անդին անցած չ'էր , անդին նորեկ մը , գործունեայ , փութալան ու ձեռնարկող , համառօտ ձեւերով զինքն իր գրկին մէջ սեղմելու չափ յառաջացեր էր կէս ժամուան մէջ : Յանկարծ անոր մտքէն կասկած մը անցաւ ու Սուրբիկ զզուանք ու սոսկում զգաց այս մարդէն . ի՞նչպէս կրցեր էր անոր թեւն ընդունիլ . ինքն իսկ զարմացաւ ասոր :

Վտանգն ամենէն աղէկ ուղղեց նորա դատողութիւնն . եւ մարդկային սրտին բը-

նական եղող հակազդեցութեամբ մը Տիգրանի բոլոր փափկութիւնն ու անձնուիրութիւնը ճանչցաւ ու գնահատեց :

— Կը խնդրեմ որ զիս Խոսրով էֆէնտիին մօտ տանիք , ըսաւ վախով ու ցամամբ յուզեալ ձայնով մը :

Մարեմեան Սուրբիկի բոլոր մտածումները մի առ մի կարգաց անոր դէմքին վերայ , ու հակառակելու անկարելիութիւնն հասկցաւ : Ուստի շուտով առաջնակարգ դերասանի մը պէս իր առջի յարգալից ձեւն զգեցաւ :

— Յօժարութեամբ , Տիկին , պատասխանեց նա . միայն կը խնդրեմ որ ներողամիտ լինիք թէ որ ո՛ր եւ է կերպիւ առիթ եղայ ձեր անհանգստութեան . հաւատացէք որ ամօթով եմ այս մասին :

— Բնա՛ւ , էֆէնտի , յանցանքը ձերը չ'է . եւ ես շնորհակալ եմ ձեր խնամօքը . Ղլային տկարութիւն մ'էր որոյ երգեմն ենթակայ կ'ըլլամ , պատասխանեց Սուրբիկ չոր ու ցամաք կերպով :

Վալըը լմնցաւ ու պարտղներու քրտնաթոր զոյգերը՝ գիշերուան գով օդն առնլու համար պարտէզին մէջ ցրուեցան :

Տիգրան Եւզինէն իր ամուսնոյն դարձուցած միջոցին տեսաւ Սուրբիկն որ ան-

ծանօթի մը թեւը մտած դէպ իրենց կուգար :

— Որո՞ւ ես յանձներ Տիկին Արամ էֆէնտին , հարցուց երիտասարդն առանց ծածկելու իր դժգոհութիւնը :

— Ո՛հ , անհոգ եղիք , պատասխանեց Խոսրով , թեթեւ մը կարմրելով սակայն , իմ ծանօթներէս է ու խիստ ազնիւ անձ մ'է :

Տիգրան այս բացատրութիւնը չ'ընդունեց . բայց ինքնիրեն աւելի Սուրբիկի նեղացաւ քան թէ իր բարեկամին , մինչդեռ օտարականը Սուրբիկը ձգելէ ու խոնարհութիւն մ'ընելէ վերջը կը հեռանար :

— Ո՞վ էր այդ պարօնը , Սուրբիկ , հարցուց երիտասարդն երբոր մինակ մնացին :

— Ես ալ տղէկ մը չ'եմ գիտեր ո՞վ ըլլալն . իրաւ է որ բարեկիրթ անձ մը լինելով հանդերձ անհամակրելի թուեցաւ ինձի :

— Թեւը մտած ատենդ պետք է իր ատիկայ մտածել եւ ո՛չ հիմա :

Սուրբիկ՝ Տիգրանի վշտացած ըլլալն անոր խոժոռած դէմքէն ու ցամաք պատասխանէն հասկցաւ .

Անծանօթի մը թեւն ընդունիլը պակասութիւն մ'էր ու նորատի կիներ ներքնապէս իրաւունք տուաւ երիտասարդին ու անոր սիրտն առնել մտածեց :

— Այս տեղի բազմութիւնը ձանձրացուցիչ է, ըսաւ Տիգրանին մեղմ, գրեթէ աղերսարկու ձայնով մը որ կարծես ներումն կը խնդրէր եւ որ տարօրինակ կերպով երիտասարդին սրտին դպաւ, տուն դառնանք թէ որ կը հաճիս :

— Դառնանք, կրկնեց Տիգրան մեքենաբար :

Ու թեւ թեւի վար իջան պարտէզէն յամր ու դանդաղ քայլերով . Սուրբիկ յոգնած էր ու թոյլ կերպիւ իր ընկերոջ թեւին կը յենուր : Քարափէն անցան ուր յոգնախառն ամբոխ մը կը շրջէր, կ'երգէր, կ'ըզբօսնուր գիշերուան ցօղին տակ անփոյթ ու անխոնջ :

Բազմութեան մէջէն անցան անտարբեր՝ չի լսելով իրենց շուրջի աղմուկն՝ և առանց զգալու մինչեւ իրենց ծովեզերեայ տունը հասան :

Գիշերը թէ եւ խոնաւ՝ բայց իր բոլոր պայծառութեան մէջ էր . հեռուն՝ պարահանդէսին լըյսերն ու երաժշտութեան ձայները կը նուազէին ու կ'անհետանային :

— Ես անօթի եմ, Սուրբիկ, ըսաւ Տիգրան, քէօչկն ելլելէ առաջ քիչ մը բան ուտենք . դուն ալ կարծեմ թէ անօթի ես . այս ալ զբօսանք մ'է, մանաւանդ թէ պարահանդէսի հաշուոյն մէջ չ'է :

— Ուշ չ'է՞ այս ատեն :

— Բնաւ . ժամը եօթն է . կէս ժամէն վեր կը տանիմ քեզ . հոս սպասաւոր արթընցնելու պէտք չ'ունինք, ու այս գիշեր քեզի ծառայելու պատիւն իմ անձիս կը վերապահեմ, Տիկին, աւելցուց խնդալով :

— Այդպէս թող ըլլայ ուրեմն, պատասխանեց Սուրբիկ :

Այս առաջադրութիւնն անտարակոյս հաճելի էր . կէս գիշերին, ծովեզրի սենեակը, լուսնի լուսով, գլուխ գլխի ճաշ մը ընելն՝ հրապուրիչ ծրագիր մ'էր : Սակայն Սուրբիկ վայրկեան մը խորհեցաւ որ գիշեր ատեն թերեւս վայելուչ չ'էր ամուրի երիտասարդի մը տունը գտնուիլ երբ ամեն տարդի կը քնանար : Բայց Տիգրանի առաջարկը մերժելն անոր վրայ կասկածիլ ու ցարկը մերժելն անոր վրայ կասկածիլ ու զայն վիրաւորել պիտի ըլլար . Սուրբիկ դեռ ասոր նման հաղար պատճառանք մտածեց ու գտաւ այս հաճոյալի հրաւերն ընդունելու համար . մարդս որքան՝ դիւրաւ կը համոզուի թէ որ կամենայ :

Ներս մտան առանց մէկու մը ձայն տալու . ծովեզրի սենեակը Տիգրանի աշխատութեան սենեակն էր . Սուրբիկ բնաւ հոն մտած չ'էր դեռ . ակնարկ մը ձգեց իր չորս դին հետարբքութեամբ ու սիրով լեցուն . ճրագի պէտք չի կար . լուսինն իր արծա-

Սուրբիկ

Թեայ ճառագայթներովը սենեակը կ'ողողէր
ու ցերեկուան պէս կը լուսաւորէր :

Ի՛նչ զարմանալի բան է եղեր երիտա-
սարդի մը սենեակն . այս եղաւ Սուրբիկի
հետազօտութեան արդիւնքն . ամեն ինչ ան-
կարգ ու անկանոն . արեւելեան ու եւրո-
պական կարասիք միասին . հոս թրջական
փոքրիկ բազմոց մը Պուխարայի գորգերով
ծածկուած . հոն հին Փռանսական թիկնա-
թուռներ , շինական կերպասէ վարագոյր-
ներ , խել մը անօգուտ ու թանկագին նիւ-
թեր , հնութիւններ , հին եւ նոր դրամներ ,
զէնքեր փայլուն կամ ժանգոտած , գորգեր ,
պատկերներ , յախճապակէ ամաններ , պղզ-
տիկ ու մեծ լուսանկարներ նշանաւոր ան-
ձերու , դերասանուհեաց , արուեստաւոր-
ներու , հրապարակախօսներու , ասդին ան-
դին , պատերուն վրայ , գրեթէ ամէն կողմ
ցրուած խառնի խռռն բայց ոչ առանց
ճաշակի . փոքրիկ արձաններ իրենց մերկ ու
չլացուցիչ գեղով , ոսկեզօծ ու լայն շրջա-
նակներու մէջ Վրոսփորի զանազան տեսա-
րաններն ու Անուոյ աւերակներն . Հայաս-
տանի զանազան քաղաքներէ հաւաքուած
տեսակ տեսակ կերպասներ , բանուածներ ,
աթոռի մը թողուած Միռապօ մը , սեղանին
վրայ Պէշիքթաշեան մը . հոս իրաւագիտա-
կան թերթեր . վերջապէս փոքրիկ սենեակի

մէջ հաւաքուած արուեստի , գեղարուես-
տի , գիտութեան ու գրագիտութեան վե-
րաբերեալ ճոխութիւններ՝ մէկ բառով ա-
մէն ինչ կամ ոչինչ :

Սուրբիկ շատ մը հարցումներ պիտի ը-
ներ իր տեսածներուն վրայ , բայց այս սեն-
եակին մէջ անբացատրելի անհանգստու-
թիւն մ' գգաց . վրդովիչ ու հրապուրիչ
մթնոլորտ մը կար . իր շուրջը տեսած ան-
թիւ նիւթերն ու պատկերները կարծես
նոյնքան խօսուն ու համակրելի հոգիներ
էին . ադոնք էին երիտասարդին ամենօր-
եայ ընկերներն , անոր ամեն մէկ յուզման ,
տխրութեան եւ ուրախութեան մասնակից :
Եւ Սուրբիկ անմիջապէս սիրեց ու պաշտեց
այս ամենն իրենց անխնամ անկարգութեան
մէջ :

Սնդին Տիգրան հինօրեայ ու քաջավարժ
սպասաւորի մը պէս սեղանը շտկեց պա-
տուհանին մօտ . քիչ մը պող հաւ , տապ-
կած ձուկ , Պօռտօյի հին գինի ճարեւն
վայրկեանի մը դործ եղաւ . ու երբ խօսե-
լով խնդալով սկսան ճաշն , երկուքն ալ բերկ-
րացան յանպատրաստից ու առանց երկմը-
տելու այս խորհուրդն ի գործ դրած ը-
լալուն :

Իրենք անօթի , կերակուրներն համով ,
գինին ընտիր , ու բնականաբար խօսակ-

ցուծիւնը վերսկսաւ եւանդով ու աշխու-
ժիւ :

— Պարահանդէսին մէջ կարծեմ ներա-
ցար ինձի :

— Այո՛, թէ եւ այդ ազատութիւնն ու
իշխանութիւնը չ'ունիմ :

— Որքա՛ն նախանձոտ ես եղեր, մինչ-
դեռ շարունակ աղոր հակառակը կը պըն-
դես :

— Կը հաւատա՞ս, թէ որ ըսեմ որ ըեզ-
մէ ի զատ եւ ո՛չ մէկի համար այդքան դիւ-
րազգաց եղած եմ :

— Ո՞չ իսկ յոյն բարեկամուհւոյդ մասին,
հարցուց Սուրբիկ խնդալով :

Եւ մտերմութիւնն հետզհետէ աւելցաւ,
այն գիշերուան պարահանդէսէն՝ ուրիշ տա-
րիներու պարահանդէսներու ու երեկոյթ-
ներու վրայ դարձաւ խօսքն. երիտասար-
դին յիշատակներն արթնցան, անցեալ օրե-
րու պատմութիւններ, գրեթէ խոստովա-
նութիւններ ըրին իրարու, մինչդեռ զօրա-
ւոր ու անխառն գիւնույ վերջին գաւաթ-
ները կը պարպուէին ու գլուխները կ'սկը-
սէին տաքնալ ու դառնալ : Այդ ժամուն
ալ բնաւ չ'էին մտածեր իրենց տարօրինակ
ու անպատշաճ կացութեան ու գիշեր ատեն
մէկ սենեակ ի միասին ու առանձին գըտ-
նուելնուն վրայ :

Քիչ մ'առաջ նախանձու վրայ խօսեր է-
ին ու ադկից խօսակցութիւնը սիրոյ վրայ
բերելու չափ դիւրին բան չի կայ աշխար-
հիս մէջ :

Սուրբիկ յոգներ էր. նա աւելի կ'ուն-
կընդրէր քան թէ կը խօսէր, թիկնաթոռի
մը մէջ տարածուած, աչքերը կիսափակ ու
երեսը կարմրած. մինչդեռ երիտասարդն,
անոր քով ու դէպի անոր ծոած, փոքրիկ ու
քնքոյ, ձեռքն իր ձեռացը մէջ ամիսփած,
կը շողակրատէր :

Սուրբիկ ուրիշ բան չ'էր լսեր անոր խօս-
քերէն բայց եթէ հետապուր միմունը մը որ
իր ըողութիւնը կը հմայէր. կ'ոգար որ կա-
րող էր տարիներով առանց նեղանալու մը-
տիկ ընել այդ քաղցրաձայն նուագին որ ոչ
երբէք այդքան ախորժելի ու ողորջ թը-
ւած էր :

Երջանկութիւն ըսուածն ա՞յս էր արդ-
եօք երկրիս վրայ. Սուրբիկ գրեթէ այնպէս
կարծեց վայրկեան մը :

Գիշերը կը յառաջանար զուարթ ու աս-
տեղազարդ. լուսինն հետզհետէ կը խո-
նարհէր դանդաղ և վարանեալ, ծովուն վը-
րայ ձեւացնելով անթիւ ու աննմանելի լու-
սեղէն ուրուագիծեր որք շարունակ կը
կազմուէին ու կը փոփոխէին անոր անդիկի
պէս անշարժ ու փայլուն երեսին վրայ. ա-

մէն որ հանգչած էր ու ամէն կողմ տա-
րածուող խոր լուսթեան մէջ մինակ էր այս
մանկամարդ կիներն իր սիրած մտերմին ըով,
բիւր իղձերով տոգորեալ :

Տիգրան հիմա ա՛լ գրեթէ բոլորովին ի-
րեն մօտ ծնրադրած էր ու Սուրբիկ անոր
հեշտահամբոյր շունչը կ'զգար իր մազերուն
մէջէն , իր երեսին մօտ , իր գիւրազրգիւ
մորթին վրայ , եւ կը խռովէր . յանկարծ
զգաց երկու սիրատոջոր շրթունքներ որ իր
ձեռքին կը դպէին յիմարական անշանօջ
պատելով իր բոլոր զգայարանքը . Սուրբիկ
ձեռքն ետ քաշել ուզեց , բայց այս նա-
հանջուճն աւելի պարտեալ մարդու մը անօ-
գուտ մէկ ջանքն էր քան թէ լուրջ դիմա-
դրութիւն մը . Տիգրան բռնացաւ ու ման-
կամարդ կիներն անոր դէմ զօրութիւն չու-
նէր . աշուրներէն կրակ կ'եւնէր , ակնարկը
կը նուաղէր ու ամէն ձայնէ աւելի ուժով՝
բառ մը , բառ մը միայն անոր ականջին կը
զարնէր անդիմադրելի , իր պատճառած հը-
րապոյրին համար :

— Կը պաշտեմ զքեզ , կը մրմնջէր երի-
տասարդն անոր ականջն ի վար :

Սենեակին մէջ լուսնին լոյսը վարագոյր-
ներուն բացխփիկ գոյներուն հետ կը խա-
ղար . պզտիկ արձանները թուէր թէ կ'ո-
գեւորէին իրենց մարմարէ փոքրիկ կայան-

ներուն վրայ . պատկերները կը ժպտէին
ոսկեզօծ շրջանակներուն մէջ ու անդիէն
հեղաշարժ ծովուն ձայնն՝ որ մեղմիւ տանը
քարափը կը փայփայէր , կը հասնէր միօրի-
նակ այլ ներդաշնակ երգի մը պէս :

Ուրիշ տառն Սուրբիկ պիտի բողբէր այս
վարմունքին դէմ . հիմա երջանիկ էր սիրոյ
այս խոստովանութիւնը լսելով . անշուշտ
հիմա չէր որ կ'իմանար Տիգրանի զինքը սի-
րելն . ինքն ալ ինչէ՛ր չեր քաշեր իր փոխա-
դարձ սէրը ծածկելու համար ու անտար-
բեր դէմք մը ցուցնելու իր պաշտեցեալ մը-
տերմին . վայրկեան մ'եւս ու մօտ էր անձ-
նատուր լինելու . հեշտութեան երազներ
անոր շփոթած միտքը գրաւեցին ու վայրիկ
մը Տիգրանի բազուկներն անքակտելի շըշ-
թայ մը կազմեցին անոր մարմնոյն շուրջը :

Յանկարծ պատկեր մը անցաւ Սուրբիկի
աչաց առջեւէն , խոժոռ ու տրտում դէմք
մը՝ որոյ տարօրինակ նայուածքը մինչեւ իր
սրտին խորը թափանցեց , « Չիս խաբեցիր
ու հիմա ամուսինդ պիտի խաբես » , 'լըսէր
այս նայուածքը բացորոշ խոստովեամբ :

Սուրբիկ սարսափահար ուժով մը մէկդի
հրեց զինքը շրջապատող թեւերն ու ոտքի
վրայ ելաւ մէկէն :

— Տիգրան , ըսաւ խեղափոքոյս երիտա-

սարգին, այդքան շուտ մոռցար Սեդրաքի յիշատակը :

Սեդրաքի . . .

Ո՛ւսկից գտաւ այս սպառնալից անունն որ փայլակի մը ցօլացման պէս իր միտքը պատող մառախուղը փարատեց . Տիգրան կանգ առաւ իր անվայել զղերսանաց մէջ ու մաներկորդ մը բաւեց խելքը գլուխը բերելու . ինչ որ ալ ըլլար իր անսահման սէրն ու մարդուս տկարութիւնը, պարկեշտութիւնն՝ որ իր սրտին մէջ էր միշտ՝ զինքն արխացուց ու պատուոյ ճամբէն չի խոտորեցաւ : Բայց իր քաջութեան փորձը տալէ վերջն իր յուզմունքը չի կրցաւ ծածկել ու Սուրբիկէն հեռու աթոռի մը վրայ ինկաւ ու ժաթափ ու ամօթահար :

Ալ չի խօսեցան ասոր վրայ ու քիչ մը ետքը պարտէզին դռնէն անցնելով, Տիգրան, լուռ ու քար կտրած, ծաղկահասակ կինը քէօչկը տարաւ ձգեց ու տուն դարձաւ . բայց մինչեւ աստու իր խոովեալ երեւակայութիւնը թոյլ չի տուաւ քնանալ : Արշալուսուն դէմ միայն, խորտակուած ու վաստակարեկ, բազմոցի մը վրայ քունը տարաւ :

Այն գիշերէն վերջը քիչ մ'ատեն Տիգրան խիստ զգուշաւոր ընթացք մ'ունեցաւ

քէօչկը գտնուած ժամանակ . յանցանք մը գործած ատեն վարժապետէն բռնուող տղու մը կը նմանէր :

— Ալ պատանի մը չ'եմ ես, կ'ըսէր երբեմն ինքնիրեն, ու ինչպէ՛ս յիմարութիւն մը գործելու չափ յառաջ գացի . իրաւ է ուրեմն որ մարդս իր անձին չի կրնար իշխել եղեր . իմ բոլոր հաստատամտութիւնս այս կնոջ մէկ ժպտին առջեւ անհետացաւ ու առանց անոր . . .

Իրիկուն մը Սուրբիկ Տիգրանի առաջարկեց միասին չըջան մ'ընել պարտէզին մէջ . վերջալոյսն իր բոլոր շքեղութեան մէջ եւ պարտէզն ամայի ու խորհրդաւոր էր :

— Վշտացար ինձի դէմ, այպէս չէ՞, հարցուց յանկարծ Արամ էֆէնտիի կինը :

— Բնաւ, Տիկին, ընդհակառակն շնորհապարտ եմ ձեզ :

— Նախ եւ առաջ, Տիկին, ձեզ եւ ասոր պէս պաշտօնական բառերը վերցուր ու պարզապէս Սուրբիկ ըսէ ինձի առաջուան պէս, որպէս զի չի սրբողած լինիլդ հասկընամ :

Երիտասարդը քիչ մը վարանեցաւ .

— Միթէ չափազանց մտերմութեան հետեւանք չէ՞ր իմ սխալմունքս, ըսաւ նա . դուք պէտք է ուզէք որ այս ձեւակերպու-

թիւնները մնան ու պատնէշ մ'ըլլան իմ տը-
կարութեանցս դէմ :

— Ո՛չ, Տիգրան, առաքինութիւնն ար-
ժէք չ'ունի թէ որ ճնշման մը արդիւնք է .
ես քեզմէ աղէկ գաղափար ունիմ քու սըր-
տիդ աշնուութեանը վրայ ու քու մտեր-
մութեանդ կորուստովը չ'եմ ուզեր իմ հան-
գըստութիւնս փոխարինել . մոռցիր ալ այն
ժամն ինչպէս որ ես ալ չ'եմ յիշեր բնաւ :

Տիգրան չի պատասխանեց :

— Մի՛ կարծէր որ չի մաքառեցայ սի-
րոյս դէմ, Սո՛ւրբիկ, աւելցուց նա քիչ մը
վերջը . երեկուրնէ չ'է որ անբացատրելի իշ-
խանութիւն մ'ունեցար իմ վրաս դուն, որոյ
հետ յաւիտեան անհաշտ ու ոխերիմ թըշ-
նամի մնալ պարտէի . ես անոնցմէ չ'եմ որք
իրենց հաճոյքին, թերեւս երջանկութեան
համար ուրիշի երջանկութիւնը կը գողնան
ու տունը կը կործանեն . ինքզինքս չ'եմ ու-
զեր արդարացնել վայրկեան մը սխալելուս .
դուն ինձի շուտով ճանչցուցիր պարտակա-
նութիւնս որուն համար ալ աւելի կը
յարգեմ՝ զքեզ . իսկ դուն, — եւ Տիգրան
հառաչեց այս ըսելով —, բնա՛ւ, ո՛հ, բնաւ
լած մի ըլլար իմ գժբաղդ սիրոյս խոստո-
վանութիւնը :

— Հաշտուեցանք ուրեմն ու տուն դառ-
նանք :

Սյուպէս վերջացաւ Պայս խռովութեան
սկզբնաւորութիւնը . սակայն ուրիշ զըժ-
բաղդութիւն մը չ'ուշացաւ այս ընտանեաց
գլխուն :

Սրամ էֆէնտիի գլխի հիւանդութիւնը
բոլորովին անհետացած չ'էր ու յանկարծ
նոր ձեւով մը երեւան ելնելով խիստ ծանր
կերպարանք մ'առաւ քիչ օրուան մէջ :

Խնամքները չի պակսեցան . Խոսրով հի-
ւանդտես եկաւ ու Եէնի-Մահալէ դառ-
նալուն ծանօթները զինքը չըժպատեցին
իրբեւ թէ տեղեկութիւն մ'ունելու հա-
մար հիւանդին վրայօք . կեղծաւոր կարեկ-
ցութիւն որով քոլարկուած էր հիւանդին
կնոջ վրայ տարածուած հետաքրքրութիւնն .
անչուտ երեսի վրայ թողած էր իր ծերու-
նի ամուսինն, երիտասարդ տարփաւորին
հետ զբօսնելու համար :

Կիներն ու յատկասլէս պառաւները՝ նը-
շանաւոր էին իրենց հաւաքած տեղեկու-
թիւններով :

Յիսուննոց գիրուկ կին մը որոյ երեսին
խորշոմներն անհետացնելու համար կա-
տարուած ջանքերն ապարդիւն մնացած
էին, լրագրաց մէջ կարդացած խաբե-
բայ դեղերէն դանգատելէ վերջը կը սըն-
դէր որ Սրամ էֆէնտիի տունէն ելած ըս-
պասուհի մը թանկագին մանրամասնու-

թիւններ բերած էր իրեն , մանրամասնութիւնը որք պարկեշտ ականջներէ չ'էին կըրնար լսուիլ :

Բամբասող հետաքրքիրներուն սիրտն անհամբերութենէ բաբախեց :

— Հոգի՛ , կը գոչէր նա , կարգուած կիսներն աղջիկներէ աւելի կատողեր են հիմա . լսուած բան է ասիկայ որ գիշերն ի լոյս ձգես հիւանդ էրիկդ մինակը չարչարուի ու դուն պարտէգին դռնէն դրացի երիտասարդին տունն երթաս :

Ունկնդիրներն իբրեւ թէ չի հաւատալու չարժում մ'ըրին՝ չարլեզու պառաւը զայրացընելու ու ալ աւելի խօսեցնելու համար :

— Զ'է՞ք հաւատար , կրկնեց գիրուկ կիսերն աշխուժիւ , չ'է՞ք հաւատար , կ'ուզէ՞ք որ Մարիամը կոնչեմ ու ձեր դիմացը խօսեցընեմ :

— Վրայէն շնորհքով կին մը կ'երեւայ , մեղայ՛ , ալ մարդ իր տեսածին ալ խաբուելու չ'է , վրայ բերաւ անգիէն սիկառի թուղթի պէս նիհար ու թափանցիկ կին մը որ բուրդի ու բամպակի անհրաժեշտ պաշարով մը բեռնաւորած էր ամէն ատեն :

— Ատանկները շնորհքով կ'երեւան վերանուն :

— Ո՞վ կը սիրէ եղեր , հարցուց քառասունն անցուկ աղջիկ մը որ ամուսնանալէ

յուսակտուր , ալ պառաւներու կարգը բազմելու իրաւունք ունէր :

— Փաստաբան է , ի՛նչ է , գիշեր ցերեկ իրարու տունն են եղեր :

— Այս տեսակ կիները բոլոր իգական սեռին ալ պատուոյն կը դպչին , աւելցուց արդար զայրութիւ երիտասարդ ու գեղանի կին մը որոյ սիրահարական արկածներն երեսին վրայ ներկուած գոյներուն չափ բազմաթիւ էին :

Ուրիշներ կը պնդէին թէ իր կնոջ մեղապարտութիւնն հաստատուելուն վրայ Արամ էֆէնտի հիւանդացեր էր . թէ խեղճ մարդն ամեն տեսութենէ զրկուած , գրեթէ բանտարկուած էր . շատախօս երիտասարդ մը՝ ականջէ ի վար փոփոխալով խորհրդաւոր ձեւերով կը պատմէր թէ իր բարեկամներէն մէկն Արամ էֆէնտի բէօզկին մօտէն անցած ժամանակ գիշերային ժամադրութեանց հանդպեր էր :

Այս կերպ էին ահա խօսակցութիւններն հասարակութեան մէջ . այս բամբասողներէն գոնէ մին՝ բան մը գիտէ՞ր կամ թէ ինք կը հաւատար իր ըսածներուն . բնաւ : Նախանձը մէկ կողմէն , հետաքրքրութիւնը միւսէն միացեր էին զրպարտութիւնն ու քսութիւնը ծաւալելու այնպիսի անձերու

դէմ գորս թերեւս շիտկէ շիտակ չ'էին ճանչնար :

Երիտասարդ կինը մեծագոյն յանցաւորը թերեւս ոճրագործ մ'էր . ամէնքը ծերունի ամուսնոյն կը գթային ու կը կարեկցէին միայն : Գուցէ հարկ էր ջանք մ'ընել զայն իր անհաւատարիմ կնոջ ձեռքէն շրկելու համար :

Այս տեսակ են ահա այն սարսափելի տարածայնութիւններն որք փոխանցիկ ու քստմնելի հիւանդութեանց պէս բերնէ բերան տարածուելով մարդուս պատուոյն կը դպչին , կը հալածեն ու շատ անգամ կը խորտակեն թաքուն , յամառ ու անողորմ ամբաստանութիւններ սրոյ դէմ ամբաստանեալն ինքզինքը արդարացնելու միջոց չ'ունի : Մարդոց ներքին կենաց մասին հասարակաց կարծիք ըսուած բանն՝ ի բացակայութեան տրուած վճիռ մ'է որ առանց դատաւարտելոյն հաղորդուելու կը գործադրուի : Բաւ է որ զրպարտիչ բերան մը բացուի մէկուն դէմ ու դատաւարտութիւնը ժամանակի խնդիր մ'է միայն եւ որոյ դէմ զրպարտեալը բողոքերու իրաւունք չ'ունի :

Այս կերպ էին ահա հասարակաց կարծիքը Սուրբիկի մասին . Պարկեշտութեան , մաքրութեան նշոյլ չ'ունեցող անառակու-

հիւներ չ'էին կրնար անտարակոյս անոր առաքինութեան հաւատալ . սեւը ձերմակին գոյութեան չի կրնար հաւատ ընծայել . այս եղած է միշտ աշխարհիս օրէնքը :

Անդին՝ հիւանդը կը տառապէր ու կը դարմանուէր . խեղճ մարդուն հիւանդութիւնը մահատու ու սարսափելի կերպիւ փոխանցիկ ախտ մ'էր . խոհեմութիւնը կը պահանջէր զգուշութիւններ ձեռք առնուլ անոր քովը մօտեցուած ատեն . բժշկաց պատուէրը խիստ ու բացորոշ էր . Սուրբիկ միայն չի ճանչցաւ այդ արգելքն զոր իր պարտականութեան հակառակ դատեց . իր մանկութենէն ի վեր դժբաղդ ու ձակատագրէն հալածեալ ըջութեամբ , գրեթէ օրախութեամբ նետուեցաւ այն վտանգին մէջ որ այնչափ դիւրաւ կրնար գինքն ալ ի միասին գերեզման տանիլ : Ո՛չ որ գիտցաւ երբէք այս մանկամարդ կինն առաջնորդող գաղափարը . փոխանցման վտանգը տարաբաղդուհին հրապուրեց . ազգական , բարեկամ ի զուր խրատեցին կամ սպառնացան . Սուրբիկ անդդուելի մնաց . Տիգրան միայն բան մը չ'ըսաւ մինչդեռ բժիշկներն ապշած ու սքանչացած կը մեկնէին ամէն անգամ :

Միայն իր զաւակներն հեռացուց ու ինքը գիշեր ու ցօրեկ սպասուհւոյ մը օգ-

նութեամբ հիւանդին ըովէն չը բաժնուեցաւ :

Հիւանդութեան չորրորդ - հինգերորդ օրերն Արամ էֆէնտին անձանաչելի էր . անհամար ուռոյց ու պալարներ, սև ու կապոյտ , անոր դէմքն ու ճակատը պատեցին . աչերը փոսն իջած ու երեսին ուռուցիկ կոյտերուն մէջ թաղուելով երկու փայլուն կէտերու փոխուեցան . շրթունքն իրարմէ հեռու ու բոլոր գլուխն ահաւոր ու քստմնելի երեւոյթ մ'ստացաւ :

Սարսափելի ախտը մէկ քանի աւուր մէջ այս աստիճանի կերպարանափոխ ըրած էր հիւանդը . սպասուհին վախցաւ ու առաւ քալեց ու Սուրբիկ մինակ մնաց հիւանդը դարմանելու ու սփոփելու համար :

Մինակ . ոչ սակայն . քանի որ Տիգրան առտու ու իրիկուն հոն էր^ք : բժիշկները կը հրաւիրէր , գեղերը կը պատրաստէր ու տունէն դուրս հիւանդին վերաբերեալ բոլոր հոգերը կը մտածեր : Նա մանաւանդ Արամ էֆէնտիի ներութիւնը զուշակելով , առանց Սուրբիկի ճգագնելու , Արամ էֆէնտիի մէկ պահանջը գանձած լինելու պատուակաւ դրամական օգնութիւն մը կ'ընէր ու վերջապէս այդ մահու ու սարսափի օրերուն մէջ պահապան հրեշտակի մը պէս

կը հսկէր այդ անօգնական ընտանեաց վըրայ :

Բժիշկներն հետզհետէ ձեռք քաշեցին . հիւանդին վիճակը բոլորովին յուսահատական ու անոր աւերեալ դիմացի տեսիլն արհաւիրից դարձաւ :

Անտարակոյս նախախնամութեան անընենելի մէկ զաղտնիքն էր որ այս դժնդակ ու զարհուրելի ախտն այսքան բարի ու պարկեշտ մարդու մը վիճակած էր . հիւանդին խելքը գլուխն էր միշտ . վերջին օրերուն , երբոր ինքն ալ վերահասու եղաւ իր վտանգաւոր կացութեան , վարանում մը տեսնուեցաւ այս մարդուն վրայ . ըսելիք մը ունէր ու չ'էր կրնար կարծես մէկու մը յայտնել . Սուրբիկը միայն տեսնելով միշտ իր ըովն , իր արդէն անհանգիստ խղճմտանքը թոլորովին վրդովեցաւ . ամէնքն , եղբայր , քոյր , կամ ազգական , ըղերայէ փախելու պէս , առանց ետևնին դառնալու , մի առ մի խոյս տուեր էին ու միայն այս երիտասարդ կիներ մնացեր էր մինչեւ վերջն հաստատ իր սիրոյն ու հաւատարմութեան մէջ . այն ատեն մտածեց թէ որքան ծանր պարտքեր ստանձնած էր այս մատղաշ ու փափուկ արարածին դէմ զոր դեռ տղայ հասակէն աններելի անխոհեմութեամբ մը իր կենաց բոլոր ձերութեան ու տառապանացը մաս-

նակից ըրած էր . մտածեց նա եւ թէ ո՞ւր-
կից կը ճարէր բժիշկներու ամենօրեայ տըր-
ուած գումարները , վասն զի իր չնչին խնա-
յողութիւններն հիւանդութեան առջի մէկ
երկու աւուր մէջ սպառած էին անշուշտ :

— Սուրբիկ , ըսաւ մանկամարդ կնոջն որ
աթոռի մը վրայ ու անկողնոյն մօտը նստեր
էր , քնահատութենէ թալկահար ու տըժ-
դունած , ստակ մնացած չ'է քովդ . իմ սե-
զանաւորս կայ Պոլիս , պէտք է մէկ եր-
կու ամսական կտորել տալ այս օրերու հա-
մար :

— Բայց ստակի նեղութիւն չ'ունինք ,
պատասխանեց նա , ատեն չ'եղաւ բեզի ի-
մացնելու որ յոյն վաճառականին վրա-
յի առնելիքներդ Տիգրան էֆէնտին գան-
ձեց :

— Ո՞ր յոյն վաճառականն , հարցուց հի-
ւանդը մտախորհ :

— Դուն գիտես անշուշտ . որո՞նն վրայ
հարիւր քսան տակի պահանջ ունիս :

Սրամ էֆէնտի մէկու մը վրայ այս տե-
սակ պահանջ մը չ'ունէր ու անմիջապէս
գուշակեց այն չափազանց փափկութեան
զգացումն՝ որով Տիգրան դրամական օգ-
նութիւն մ'ընդունել տալու համար այս
ստախօտութեան դիմեր էր . բան մը չ'ըսաւ ,
բայց աշուրները լեցուեցան :

— Եղբորմէ մը աւելի է մեզի Տիգրա-
նը , Սուրբիկ , գիտցած ըլլաս , մրմնջեց մի-
այն :

Իրիկունը երիտասարդն եկաւ տրտում
ու տխուր . հետեւեալ օրուան համար բը-
ժիշկները նոր խորհրդակցութեան մը հրա-
ւիրեր էր . շատերը մերժեցին գալու . և
ոչ մին ծածկեր էր հիւանդին մօտալուս
վախճանն . ասով հանդերձ Տիգրան յամառեր
էր զանոնք կանչելու համար :

Հետեւեալ օր հիւանդը բողբոջի ծան-
րացաւ . իրիկունն դէմ Տիգրանը տեսնել
ուզեց . հինգ րոպէ վերջ երիտասարդն ա-
նոր անկողնոյն մօտն էր : Սեւ վարագոյրներ
կ'արգիլէին պատուհանէն եկող լոյսն որում
չ'էին կրնար այլ եւս դիմադրել հիւանդին
տկարացած աչքերը . գերեզմանի պէս մթին
ու սգաւոր սենեակ մ'էր . հիւանդը զլսով
նշան մ'ըրաւ կնոջը զինքը մինակ թողու
համար ու Տիգրանին դառնալով .

— Իմ վերջս մօտ է ալ , Տիգրան , ը-
սաւ հագիւ լսելի ձայնիւ , ու տեսնելով որ
երիտասարդն ընդմիջելու շարժում մը կ'ը-
նէ . ո՛չ , ո՛չ , աւելցուց նա , խաբուելու
պէտք ունեցողներէն չ'եմ ես . . . չորհա-
կալեմ բեզմէ , ճշմարիտ որդի մ'եղար ինձի
իմ կարօտութեան օրերուս մէջ . . . քեզի
պէսներ շատ չ'են գտնուիր . . .

Հոս հիւանդին ձայնը մարեղու մօտ երեցաւ .

— Չաւակներուս ապագան չ'ապահոված կը թողում ու կը մեկնիմ ու այս ցաւը շատ մեծ է հօր մը համար . . . կ'ուզեմ որ զաւակներուս հսկես, Տիգրան . . . կը հասկնաս, զաւակներս որբութիւն չի տեսնան . . .

Տիգրան իր արցունքը չի կրցաւ բռնել ու հեծկտալով արտասուել սկսաւ :

— Վերջին ու գերագոյն խնդիրք մ'ալ, մրմնջեց հիւանդը շնչահատ . կիսն երեսէս չի խնդաց մինչեւ այսօր, իմ մահուամբս այն ալ կարօտ ու . . . աղքատ կը մնայ . . . քսան հինգ տարեկան այրի կը թողում ահա զինքը . . . դուն պաշտպանէ անիկայ . . . այս քաղաքը մի' նստիք . . .

Ողեվարին խօսքերն անհասկանալի դարձան, բայց յանկարծ վերջին ճիգ մը ընեց լով .

— Մի' մոռնար, Տիգրան, իմ զաւակներս քու զաւակներդ թող ըլլան ու դուն երջանիկ ըրէ Սուրբիկը . . .

Օրհասականին ձայնը կտրեցաւ ու անկից վերջը խղզուկ հոնդիւն մը միայն լսուեցաւ . քիչ մ'ատենէն ամեն ինչ վերջացած էր :

Ութ օր վերջը բոլոր Վոսիորի ու Պէօ-յիւքտէրէյի մէջ խօսակցութիւնն երկու դէպքի վրայ կը կեդրոնանար . այն է Արամ էֆէնտիի մահուան ու Խոսրովի կնոջ փախուստին վրայ :

Եւզինէ՛ ի վերջոյ Մարեմեանէ ձանձրացած, խռվաթ սպասաւորի մը հետ սիրահարած ու ամուսնական յարկէն չուած էր պարզապէս :

Խոսրովի յաջողութեան աստղը շատոնց ի վեր խաւարեր էր . Եւզինէ ի փախուստը վերջին հարուածն եղաւ անոր . իր ընտանեկան արկածները բերնէ բերան զբոցուելով իր դիրքին ալ մլաս տուին, ու անոր խոստացուած պաշտօնը չի տրուեցաւ : Պաշտօնէ ու ապրուստէ զուրկ, տունը կործանած, ամենուէն ծաղրին նշաւակ դարձած, Խոսրով օր մը մեկնեցաւ Պոլսէն առանց մէկու մը ձայն տալու ճիշդ ինչպէս որ Եւզինէ ալ իր տունէն մեկնած էր : Ո՛չ ոք կրցաւ անոր ո՛ւր երթալն իմանալ . ոմանք կը պնդէին թէ Ամերիկա կը գտնուէնա այժմ ու բողոքական միսիոնար եղած է, անտանելի աղքատութեան ու տառապանաց մատնուելէ յետոյ . ուրիշներ կը յարեն թէ նա իր հայրենիքը Խարբերդ դարձած է :

Այսպէս հեռացաւ այս մայրաքաղաքէն

այն երիտասարդն որ պարտէր զուցէ բնաւ
ոռք չի կոխել հոս . բազդը՝ վայրկեան մը
ժպտեցաւ անոր իր դառնութիւնը վեր-
ջէն աւելի սաստկութեամբ զգացնելու հա-
մար :

Իսկ Տիգրան Արամ էֆէնտիի մահուա-
նէն մի քանի օր վերջն իր գոյքն ու կարա-
սիքը վաճառելէ յետոյ, Սուրբիկի ու անոր
զաւակացը հետ Ադրիանուպոլիս երթալու
համար ճամբայ ելաւ . վայրահաչ բերան-
ներն այս ուղեւորութիւնն իրենց առջի ամ-
բաստանութեանց ապացոյց համարեցին :

— Չ'էի՞ ըսեր ձեզի, կ'ըսէր այս առթիւ
յիսուննոց գիրուկ կինը, խեղճ մարդուն
մահուան պատճառ եղան ու քառսունքին
չ'են սպասեր անգամ . այս տեսակ սէր տես-
նուած չ'է դեռ . ամեն մարդ շատ բան ը-
րած է, բայց ամօթը մէկդի թողած չ'է աշ-
խարհի առջեւ :

— Առաջուց ի վեր մարդ չ'էին սեպեր
անոնք, աւելցուց զրացի խօսակից մը :

Երիտասարդ փաստաբանն երբէք կա-
րեւորութիւն տուած չ'էր այս թուհաւոր
լեզուներուն . նա՛ Ադրիանուպոլսոյ մէջ եր-
կաթուղւոյ կայարանին ըով, Քարաղաճի
դաշտին մէջ առանձին տան մը մէջ կը բը-
նակի . ընդարձակ պարտէզ մը ունի զոր կը
մշակէ եւ ուր կ'գրօսնու . երբեմն աղբատ


ու կարօտ մարդոց դատերը կը վարէ ճը-
րիաբար . այդ կողմերն ամէնքը կը ճանչ-
նան հարուստ փաստաբանն, ինչպէս կ'ան-
ուանեն զինքը բարեմիտ գիւղացիք :

Բայց առջի անփոյթ ու զուարթ երի-
տասարդը մնացած չ'է . հիմա մտախոհ ու
տրտում մարդ մ'է . մօրուք թողած է ու
սպիտակ թելեր կանուխէն անոր մազերուն
մէջ կը տեսնուին : Խիստ քիչ անգամ ան-
ցելոյն վրայ խօսք կ'ընէ : Արամ էֆէնտիի
վերջին կամքն յարգած է . անոր զաւակ-
ներն իր զաւակներն եղած են, վասն զի
Սուրբիկ իրեն կինն է :

Վ Ե Ր Ձ

Վ Ր Ի Պ Ա Կ Ք

Էջ	ՏՊՀ	Սխալ	Ուղիղ
16	5	արգարդէն	արգանդէն
26	15	տուած	տրուած
48	21	ազատանին	ազատամիտն
52	25	ու խօսք հասկը- ցընել	խօսք հասկը- ցընելու
64	8	դատաստանին	դատարանին
70	19	այս	այն
88	14	անորութիւնս	անորութիւնը
89	16	էին	էր
89	19	մնացեր	մնացեր էր
100	28	և մահ	մահ և
108	20	սղփիչ	ողփիչ
111	25	զոր	որոյ համար
111	26	Աննիկ	Եւզինէ
112	9	Աննիկի մը պէս կնոջ	Եւզինէի պէս կնոջ մը
112	19	,	,
114	22	ըլլալը	ըլլալս
151	17	արուստին	արուեստին
145	20	կրնալ	կրնաս
168	12	դիւրագլաց	դիւրագգած
171	18	գրաւեց	գրաւեցին



9340

2013

